

**Bàu Lem tiaq
Mathêu
Achih Biac Chuaq Jêxu Broq Wa Hnài
Bàu Patô Adroi**

Hiniq wa Bàu Xèm Da Sech:

Hiniq cô hadai hiniq da mangai khi wìa mangai hõc tiaq da Chuaq Jêxu. Ta cô i bàu achih: “Bàu Lem Enh Boc Pliñh.”

Mangai Achih wa Hanam Achih:

Mathêu achih Sech Bàu Lem cô. Mathêu aih: “Biac Tabàih da Chuaq”. Adroi nèh haq mangai bòch gop màng. Haq hadai i hiniq Lêwi.

Sech Mathêu cô khi achih adroi ca phòq Jê-ru-sa-lem 'biq raliang đac hanam 70 Atiq C.

Bàu Anoi:

Mathêu enh achih sech cô òi patô ro 'ràng Chuaq Jêxu Haq joq 'nàng Mési - aih Mangai Loh Enh Pliñh òi dèch con mangai. Bàc yàng haq yõc bàu enh Sech Hadròih phàn ma dùnh wa achih bàu: Diac Pliñh (Diac Boc Pliñh).

Bàu ta sech cô jah lah axong 5 phàn: (1) 'Nat 5-7; (2) 'Nat 10; (3) 'Nat 13; (4) 'Nat 18; (5) 'Nat 24-25.

Rìm 'Nat:

1. Hì xa-ông ca Jêxu wa jò òi con 'yoh: 1:1—2:23
2. Baxèm biac broq da Chuaq Jêxu: 3:1—4:11
3. Biac broq da Chuaq Jêxu ta gùng Ga-li-lê: 4:12—14:12

4. 'Bàì yàng Chuaq Jêxu tawìh enh gùng Ga-li-lê: 14:13—17:20
5. Biac lùch Chuaq Jêxu broq ta gùng Ga-li-lê: 17:22—18:35
6. Biac Chuaq Jêxu broq ta gùng Judia wa: 19:1—20:34
7. Biac nan xa da Chuaq Jêxu: 21:1—27:66
8. Hì Rìh Hlài: 28:1-20

Xinoi Chuaq Jêxu Crich
(*Luc 3:23-38*)

¹ Cô xinoi da Chuaq Jêxu Crich, hadrech Đawit, con xau Ap-ra-ham.

- ² Ap-ra-ham xa-ông ca Isac,
Isac xa-ông ca Jacôp,
Jacôp xa-ông ca Judã wa oh daq haq.
³ Judã wa Tama mai haq, xa-ông ca Perex wa Xêra,
Perex xa-ông ca Hêtrôn,
Hêtrôn xa-ông ca Aram.
⁴ Aram xa-ông ca A-mi-na-đap,
A-mi-na-đap xa-ông ca Na-ach-son,
Na-ach-son xa-ông ca Sanhmôn.
⁵ Sanhmôn wa Rahap mai haq, xa-ông ca Bô-ô,
Bô-ô wa Rut xa-ông ca Ôbêt,
Ôbêt xa-ông ca Jê-sê.
⁶ Jê-sê xa-ông ca bùa Đawit.

Đawit yỗc mai Uria xa-ông ca Sa-lô-môn.

- ⁷ Sa-lô-môn xa-ông ca Rê-hô-bô-am,
Rê-hô-bô-am xa-ông ca A-bi-ja,

A-bi-ja xa-ông ca Asap.

⁸ Asap xa-ông ca Jê-hô-sa-phot,
Jê-hô-sa-phot xa-ông ca Jôram,
Jôram xa-ông ca Ôxia.

⁹ Ôxia xa-ông ca Jôtham,
Jôtham xa-ông ca Acha,
Acha xa-ông ca Ê-xê-chia.

¹⁰ Ê-xê-chia xa-ông ca Ma-na-se,
Ma-na-se xa-ông ca Amon,
Amon xa-ông ca Jôsia.

¹¹ Jò ti rùp wì tồc Diac Ba-bi-lôn, Jôsia xa-ông
ca Jê-cô-nia wa oh daq haq.

¹² Ôi ta Ba-bi-lôn,
Jê-cô-nia xa-ông ca Sa-an-thi-ên,
Sa-an-thi-ên xa-ông ca Xô-rô-ba-bên.

¹³ Xô-rô-ba-bên xa-ông ca A-bi-ut,
A-bi-ut xa-ông ca Ê-li-a-kim,
Ê-li-a-kim xa-ông ca Axô.

¹⁴ Axô xa-ông ca Xađoc,
Xađoc xa-ông ca Achim,
Achim xa-ông ca Ê-li-ut.

¹⁵ Ê-li-ut xa-ông ca Ê-li-a-xa,
Ê-li-a-xa xa-ông ca Mathan,
Mathan xa-ông ca Jacôp.

¹⁶ Jacôp xa-ông ca Jôsep, aih ổng Mari. Mari,
haq xa-ông ca Jêxu, wì creo Haq Chuaq
Jêxu Crich.

¹⁷ 'Màng aih, enh Ap-ra-ham trùh Đawit, dịq
dống 14 'nhòng. Enh Đawit trùh jò wì 'bìq rùp

tốc Diac Ba-bi-lôn, hadai 14 'nhòng. Enh jò wì 'bìq rùp tốc Diac Ba-bi-lôn trùh Chuaq Jêxu Crich, hadai 14 'nhòng.

*Bìac Xa-ông ca Chuaq Jêxu
(Luc 2:1-7)*

¹⁸ Bìac xa-ông ca Chuaq Jêxu Crich khoi i 'màng cô: Jò Mari miq Chuaq Jêxu khoi hùaq broq mai Jôsep, wa 'nhòq lah caq òi ti dabau, mahaq Mari khoi hadràp nhò cwìang Yiang Hadròih. ¹⁹ Jôsep mangai ma hùaq broq òng haq, aih mangai lem manoh, ùh enh wì capoch 'mèq, haq hèm trong cađac hlèp Mari.

²⁰ Mahaq jò haq 'nang hèm bìac aih, i mòiq 'bình plình Chuaq loh mahno ca haq jò haq apô, doi: “Ô Jôsep con xau Đawit, ìh apaq yùq yốc Mari broq mai, ma jah 'màng aih Con haq ma 'nang hadràp enh Yiang Hadròih. ²¹ Haq jah xa-ông mòiq toq Con Calô, ìh ep hiniq ca Haq, Jêxu, ma jah 'màng aih Haq jah dèch jàn Haq loh khoi enh tôiq lôì.”

²² Rìm bìac khoi i 'màng aih, đòiq broq xít bàu Chuaq ma Haq khoi am mangai capoch thai Boc Plình achìh adroi: ²³ “Cô èh, i mòiq ngai gu adrùh xriu òi jiang, xa-ông mòiq toq Con Calô.” Khoi èh wì hiniq ca Con Calô aih hiniq: “Em-manu-ên, aih Boc Plình òi ti bèn.”

²⁴ Jôsep rìu, broq tiaq troi bàu 'bình plình khoi tanap, hi yốc Mari broq dèh mai. ²⁵ Mahaq wa ùh caq òi ti dabau trùh jò Mari xa-ông mòiq toq Con Calô, hiniq Haq Jêxu.

2

'Bàì Thài Rabiaq ma Hõc Hlõng

¹ Jò xa-ông ca Chuaq Jêxu ta phôq 'Bêl-lê-hem, gùng Judia, 'nhòng Hêrôt broq bùa, i 'bài thài rabiaq òi enh Diac pah mat mahì loh, lam trùh ta phôq Jê-ru-sa-lem. ² Wì bòch: “Bùa Yothaiq neo xa-ông òi ta leq? Ma jah 'màng aih nhèn khoi hnoq halõng Haq enh Diac pah mat mahì loh. Nhèn lam trùh ta aih ðoìq cùh waiq Haq.”

³ Hìa tàng bàu 'màng aih, bùa Hêrôt wa diq ca phôq Jê-ru-sa-lem hlè lèt ta manoh. ⁴ Bùa tagop ðõng ðìq 'bài pajàu càn wa 'bài thài ranenh, haq bòch: “Mangai Crich khoi xa-ông ta leq?” ⁵ Wì tèo: “Ta 'Bêl-lê-hem, gùng Judia, ma jah 'màng aih i bàu mangai capoch thai Boc Plình khoi achìh:

⁶ “ ‘Ô 'Bêl-lê-hem gùng Juda,
joq 'nàng ìh ùh thùa cleq 'bài phôq càn ta
gùng Juda,
ma jah 'màng aih, enh nòi ìh jah loh mòiq Ngai
broq gàu,
cla Haq wèq ban jàn Is-ra-ên, aih jàn Au.’ ”

⁷ Bùa Hêrôt creò ca 'bài thài rabiaq trùh hlèp ti haq, hi bòch wì jò leq bu hnoq halõng aih loh. ⁸ Khoi èh haq thê wì lam ta 'Bêl-lê-hem, rai tanap: “Pì lam ti bòch bìac Con Nga aih beq, jò chaq khoi hnoq, am ca au loq ðìq, au hadai lam trùh cùh waiq Haq.”

⁹ Khoi ca wì tamàng bùa doi, wì haq lam hloi jò aih. Halõng wì ma hnoq enh pah mat mahì loh, lam adroi ca wì trùh jang nòi Con Nga òi, halõng yòng. ¹⁰ Jò 'bài thài hnoq halõng, wì lem

bùi dìq jaq. ¹¹ Jò wì mùt ta hnem hnoq Con Nga wa Mari miq Haq, wì cùp gàu hacùn cràng cùh waiq Haq, khoi èh wì 'noh 'bài ngè canaq 'bac am ca Haq, aih wang, nhù hùang wa mùc jùac. ¹² Atìq ca aih wì apô, Boc Plình pa'yèp ca wì ùh thê wì hlài ta bùa Hêrôt, mahaq lam trong 'noi q hlài dèh ta Diac.

Cadàu Mot ta Diac Aicàp

¹³ Khoi ca 'bài thài aih lam, i 'bình plình Chuaq loh doi ca Jôsep ta jò haq apô. 'Bình plình doi: "Riù beq! 'Nong Con Nga wa miq Haq cadàu mot ta Diac Aicàp, khoi èh òi hloi ta aih trùh jò Au thê ìh, ma jah 'màng aih bùa Hêrôt 'nang ti chaq Con Nga waq ca jah jêh đac Haq." ¹⁴ Jôsep padinh yòng, 'nong Con Nga wa miq Haq lam cwa ta Diac Aicàp jò damang. ¹⁵ Haq òi ta aih trùh jò bùa Hêrôt cachit, òi broq xit bàu mangai capoch thài Boc Plình khoi doi adroi: "Au khoi creo dèh ca Con loh enh Diac Aicàp."

¹⁶ Jò Bùa Hêrôt hnoq 'bài thài rabiaq 'nùt haq, haq nòih dìq jaq. Haq thê mangai lình jêh đac dìq đống con nga baiq hanam dàng loh òi ta phôq 'Bê-t-lê-hem wa jàp ta gùng aih, tiaq troq hì, khê 'bài thài rabiaq ma khoi am bùa loq. ¹⁷ 'Màng aih broq xit bàu Jê-rê-mi mangai capoch thài Boc Plình khoi doi adroi:

¹⁸ "Khoi tàng bàu wì cachech,
 hmoi ta phôq Rama,
 aih Rachên hmoi dèh ca 'bài con,
 haq ùh jah àt, ùh chiùq cabô alòng haq,
 ma jah 'màng aih 'bài con haq pi i hòm."

Enh Diac Aicàp Wìh Hlài Yothaiq

19 Mahaq khai ca bùa Hêrôt cachit, i 'bình plình Chuaq trùh ti Jôsep ta jò haq apô, ôi ta Diac Aicàp doi ca haq: ²⁰ “Yòng beq, 'nong Con Nga wa miq Haq hlài ta Diac Yothaiq, ma jah 'màng aih 'bài mangai ma enh jêh đac Con Nga, khai cachit.”

²¹ Jôsep padinh yòng, 'nong Con Nga wa miq Haq hlài ta Diac Yothaiq. ²² Mahaq jò tàng wì doi, A-chê-lau broq bùa thai Hêrôt baq haq ta gùng Judia, Jôsep crè, ùh hùa hlài ta aih. Èh khai ca Boc Plình pa'yèp ca haq jò haq apô, haq mùt ta gùng Ga-li-lê. ²³ Haq lam ôi gùng Na-xa-ret. Bìac aih broq xit bàu mangai capoch thai Boc Plình khai doi adroi: “Wì jah creó Haq Mangai Na-xa-ret.”

3

Jon 'Baptit Anoi Hnài

(Môc 1:1-8; Luc 3:1-18; Jon 1:19-28)

¹ Jò aih, Jon 'Baptit hnài Bàu Lem ta ðùng hawit gùng Judia. ² Haq doi: “Pì ep cađac ðèh manoh broq tôiq beq, ma jah 'màng aih Diac Plình trùh khai haten!” ³ Aih mangai ma Êsai, mangai capoch thai Boc Plình, khai doi:

“I bàu creó ta ðùng hawit,
'Padon trong ca Chuaq beq,

Broq da-adàng 'bài trong Haq.’ ”

⁴ Jon caxùnh eo xam xac lổcđã, cật ca'nam xam caxi akia, caq lip tùc wa diac xùt. ⁵ Jò aih, ðiq ca jàn ta phôq Jê-ru-sa-lem, jàp gùng Judia wa gùng haten ca diac Jôđan lam trùh ti Jon. ⁶ Jò

wì khai pa'noh dèh tôiq lôi, wì chiùq haq broq 'baptem ta diac Jôđan.

⁷ Mahaq jò Jon hnoq bacc ngai Pha-ri-si wa Sa-đu-sê trùh ti haq xìn haq broq 'baptem, Jon doi ca wì: “Ô xinoi bìh plǒng! Cabô khai pa'yèp pì loq wia claih ca can nòih Boc Plình hì atìq èh? ⁸ 'Màng aih, pì wìh wìa loh plì ma lem beq òòiq tajì ca pì khai cađac dèh manoh broq tôiq.

⁹ Apa q hèm dèh ta manoh: ‘Ap-ra-ham haq baq bèn, ma jah 'màng aih.’ Au doi ca pì, Boc Plình jah broq hmu cô wìa con xau am ca Ap-ra-ham.

¹⁰ Manàiq cô chòng khai òòiq jang xem long. Long leq ùh loh plì lem, coh bùh đac ta ùnh.

¹¹ “Phàn au, au 'baptem ca pì xam diac òòiq pì cađac dèh manoh broq tôiq. Mahaq i mòiq Ngai trùh atìq ca au i cwìang itai yì càn ca au. Au ùh đàng ca yinh jai Haq. Haq broq 'baptem ca pì xam Yiang Hadròih wa xam ùnh. ¹² Tì Haq wê tòn dè hreo manùh, Haq 'mùt 'mau len ta hapom, manùh bùh ta ralùng ùnh ùh jò leq pat.”

Chuaq Jêxu Chiùq 'Baptem

(Môc 1:9-11; Luc 3:21-22)

¹³ Wop jò aih, Chuaq Jêxu lam enh gùng Ga-li-lê trùh ti Jon ta diac Jôđan, òòiq chiùq Jon broq 'baptem am ca Haq. ¹⁴ Mahaq Jon ùh waq. Haq doi: “Cla au nhet chiùq Ìh broq 'baptem ca au, mahaq Ìh xìn au broq 'baptem ca Ìh 'mòh?”

¹⁵ Chuaq Jêxu doi: “Manàiq cô phai broq 'màng cô, ma jah 'màng aih bèn broq waq ca gèh rìm biac ta-atoq.”

¹⁶ Jò chiùq 'baptem khai gèh, Chuaq Jêxu tồc enh diac. Tajòì 'mòi hnoq plình tapèh, Haq hnoq

Yiang Hadròih Boc Plình tìah ca chìm trù, jràp ti chac Haq. ¹⁷ I bàu capoch enh Plình: “Cô Con Calô Au. Au loq waq ca Haq. Haq broq lem manoh Au rìm trong.”

4

Can Kiác Satan Padô 'Nùt Chuaq Jêxu (Môc 1:12-13; Luc 4:1-13)

¹ Khoi èh Yiang Hadròih 'ràng Chuaq Jêxu lam ta nòi ðùng hawit ðoìq can kiác Satan padô 'nùt Haq. ² Haq khoi rôn ca acaq 40 hì, 40 mang, khoi ca aih Haq pangot. ³ Can kiác Satan trùh haten padô 'nùt Haq, doi: “Tàng Ìh joq 'nàng Con Boc Plình, thê hmu cô wìa 'benh beq.”

⁴ Chuaq Jêxu padreo bàu doi: “Khoi achìh ta Sech Hadròih: ‘Con mangai rìh ùh xài toq nhò dahwèq caq, mahaq ep canòm ca rìm bàu loh enh hacùng Boc Plình.’[☆] ”

⁵ Khoi èh, can kiác Satan 'ràng Haq mùt ta phôq hadròih, ðoìq Haq jang bôì grôi của Hnem Cùh Waiq, ⁶ hi doi ca Haq: “Tàng Ìh joq 'nàng Con Boc Plình, ca'nìh dađeh beq, ma jah 'màng aih i bàu khoi achìh ta Sech Hadròih:

“ ‘Chuaq jah thê 'bài 'bình plình wèq Ìh ta tì, ðoìq jènh Ìh ùh troq hmu.’[☆] ”

⁷ Chuaq Jêxu padreo bàu doi: “Hadai khoi i bàu achìh ta Sech Hadròih: ‘Ìh apaq thù Chuaq, Boc Plình ìh.’[☆] ”

⁸ Can kiác Satan 'ràng atốc Haq ta bôì wang ðìq jaq ha'nhèq, patô ca Haq ðìq ðống Diac ta crống

☆ 4:4 4:4 RAH 8:3. ☆ 4:6 4:6 BCP 91:11,12. ☆ 4:7 4:7 RAH 6:16.

taneh wa bìac 'ngah 'ngai 'bài Diac aih, ⁹ hi doi ca Haq: “Tàng Ìh hacùn cràng cùh waiq au, au am ca Ìh dìq dõng Diac cô.”

¹⁰ Chuaq Jêxu doi ca haq: “Ô can kiac Satan, wia beq! Ma jah 'màng aih i bàu khi achi ta Sech Hadròih: ‘Ìh ep cùh waiq Chuaq, Boc Pình ìh, wa patih toq ca Haq hêq.’✧”

¹¹ Can kiac Satan loh lam. Tajòì 'mòi i 'bình pình trùh haten patih ca Haq.

*Chuaq Jêxu Baxèm Broq Bìac ta Ga-li-lê
(Mõc 1:14-15; Luc 4:14-15)*

¹² Jò Chuaq Jêxu hìa tàng wì khi rùp Jon 'mùt ta tù, Haq lam ta gùng Ga-li-lê. ¹³ Haq cađac phòq Na-xa-ret lam trùh òi ta phòq Ca-bê-na-um, haten ca diac raxìq, jap acang gùng Xa-bu-lun wa Nep-ta-li. ¹⁴ 'Màng aih, troq troi bàu Êsai, mangai capoch thai Boc Pình khi doi adroi:

¹⁵ “Gùng Xa-bu-lun wa gùng Nep-ta-li,
òì ti trong trùh ta diac raxìq, pah tau diac Jôđan,
aih mòiq phàn taneh da gùng Ga-li-lê khi
wìa taneh mangai jàn 'noiç.

¹⁶ Mangai ta gùng aih ha'ngui ta clam clòiq,
khi hnoq can 'ngah càn,
wa 'bài mangai ha'ngui ta yàp can cachìt,
khi i can 'ngah xreo wì.”✧

¹⁷ Enh jò aih, Chuaq Jêxu baxèm anoi hnài wì:
“Pì ep cađac dèh manoh broq tôiq beq, ma jah 'màng aih Diac Pình trùh khi haten.”

✧ 4:10 4:10 RAH 6:13. ✧ 4:16 4:16 Êsai 9:1,2.

*Mangai Hốc Tiaq Baxèm
(Mốc 1:16-20; Luc 5:1-11)*

¹⁸ Jò Haq lam ti 'bò diac raxìq Ga-li-lê, hnoq wa baiq ngai oh daq, aih Simôn wì creó haq Pêtrô, oh haq Anrê, tang hlàm ta diac raxìq, ma jah 'màng aih wa mangai ranang ca. ¹⁹ Haq creó ca wa: "Lam tiaq Au beq, Au broq chòp dèch mangai 'màng ca chòp ranang ca." ²⁰ Wa oh daq cađac hlàm lam tiaq Haq.

²¹ Enh nòi aih lam tam toq 'biaq hòm, Haq hnoq wa oh daq 'noi, aih Jacò con Xê-bê-đê, wa oh haq, aih Jon. Wa 'nang hminh hlàm ti Xê-bê-đê, baq wa òi ta bong, Haq creó ca wa. ²² Tajòì 'mòi wa cađac dèh baq wa bong, lam tiaq Haq.

²³ Chuaq Jêxu lam jàp ta gùng Ga-li-lê, hnài wì ta hnem tagop, anoi ca wì Bàu Lem Diac Plinh, wa broq brêh òi đòng ca wì mangai ùh hróc. ²⁴ Wì anoi hlài biac Haq broq jàp gùng Siri. Wì 'ràng ca Haq òi ca mangai ùh hróc, 'bài mangai i hinìq enh jò òi nga, 'bài mangai i kiac òi ta chac, mangai troq kenh wa mangai pen. Haq broq am wì brêh òi đòng. ²⁵ Bào mangai hrìn tiaq Haq enh gùng Ga-li-lê, gùng Đê-ca-pô-lò, phòq Jê-rusa-lem, gùng Judia, wa enh gùng pah tau diac Jôđan.

5

*Bàu Xôq Ramõt Anoi Hnài ta Wang
(Luc 6:20-23)*

¹ Chuaq Jêxu hnoq mangai bào, Haq tọc ta bòi wang. Jò Haq ha'ngui, mangai hóc tiaq thia haten. ² Haq hnài wì doi:

- 3 “Xôq ramöt am ca wì ma ngan ca dađeh ùh
đang cleq,
taiq wì haq jah hùang Diac Plình.
- 4 Xôq ramöt am ca mangai crò hmoi,
ma jah 'màng aih jah alòng wì haq.
- 5 Xôq ramöt ca mangai i manoh ùh padèch
dađeh,
ma jah 'màng aih, èh haq jah nhàn yöc
taneh.
- 6 Xôq ramöt ca mangai i manoh enh waq caq òi
ta-atoq,
ma jah 'màng aih wì haq jah tòm tàu.
- 7 Xôq ramöt ca mangai loq xa-öch,
ma jah 'màng aih jah xa-öch chao ca wì haq.
- 8 Xôq ramöt ca mangai i manoh hadròih,
ma jah 'màng aih wì haq jah hnoq Boc Plình.
- 9 Xôq ramöt ca mangai loq broq ca con mangai
hatroq ca dabau,
ma jah 'màng aih jah creo wì haq, con caiq
Boc Plình.
- 10 Xôq ramöt ca mangai chiùq wì ti rùp taiq wì
haq tiaq trong ta-atoq,
ma jah 'màng aih wì haq jah hùang Diac
Plình.
- 11 “Xôq ramöt ca pì jò wì hanip pì, ti rùp pì, jù
lê wa capoch rìm hiniq ngang dù ca pì taiq pì tiaq
Au. 12 Yöc manoh manè wa lem bùi beq, ma jah
'màng aih, pì jah i biac baha càn òi ta plình èh.
Calah nèh wì hadai khoi ti rùp mangai capoch
thai Boc Plình, 'màng ca wì rùp pì manàiq.

Boh wa Can 'Nghah
(Möc 9:50; Luc 14:34–35)

13 “Pì boh crǒng taneh, mahaq tàng boh pi xang, yǒc ca cleq broq hlài òiđiq haq xang? Boh aih pi wìa waq hòm, ep ùc đac enh gùng òiđiq mangai jòiq enh 'neq ca jènh.

14 “Pì can 'ngah crǒng taneh. Mòiq toq phòq òi ta bôh wang ùh jah hlèp. 15 Hadai ùh i cabô bùh đen èh gùp đac ta thùng, mahaq òiđiq ti nòi ha'nhèq, xreo 'ngah òiđiq òiđiq rìm ngai òi ta hnem. 16 Can 'ngah pì ep xreo 'ngah enh ngìa wì 'màng aih, òiđiq wì hnoq biac lem da pì, wì jah manè Baq pì òi ta plình.

Ranenh Boc Plình

17 “Pì apaq xoh Au trùh òiđiq raliang đac Ranenh Boc Plình wa bàu anoi da Mangai Capoch Thai Boc Plình. Au trùh, ùh xài òiđiq raliang, mahaq òiđiq broq jah gèh. 18 Ma jah 'màng aih Au òi ca pì joq 'nàng, jò plình wa crǒng taneh 'nhòq hnhung, hadai ùh jah xùt đac mòiq teo loq mòiq chù leq ta Sech Ranenh Boc Plình trùh jò rìm biac jah gèh. 19 'Màng aih, mangai leq cađac mòiq hiniq òiđiq ca jaq 'yoh ta bàu thê cô, wa hnài wì broq tiaq 'màng aih, jah creò haq 'yoh òiđiq jaq ta Diac Plình, èh mangai leq wèq 'bài bàu thê aih wa hnài wì 'noiđiq wèq òiđiq, jah creò haq càn òi ta Diac Plình. 20 Ma jah 'màng aih Au òi ca pì, tàng biac ta-atoq pì, ùh yi càn ca biac ta-atoq da 'bài thài ranenh wa 'bài mangai Pha-ri-si, pì ùh jah mùt Diac Plình.

21 “Pì i tàng bàu òi ca wì mangai calah nèh: 'Ìh ùh jah jèh cachìt ca mangai.✧ Tàng mangai leq jèh cachìt mangai, haq ep chiuq hadrah

✧ 5:21 5:21 LEA 20:13.

baxa.’ ²² Mahaq Au doi ca pì: Tàng mangai leq nòih dèh ca oh daq, èh haq ep chiùq hadrah baxa. Mangai leq lech dèh ca oh daq: ‘Gè blùng,’ haq ep chiùq hatinh hiniq nòi hadrah ha’nhèq. Mangai leq lech dèh ca oh daq: ‘Gè ranhùa,’ èh haq ep chiùq ‘bau ùnh baxa.

²³ “ ‘Màng aih, jò ìh yòng am nègè tadreo jang ngìa ca ca’bông tadreo, ìh hmàng hlài, i oh daq ìh i biac ùh bùi ca ìh, ²⁴ ìh ep đòiq dò nègè tadreo jang ngìa ca ca’bông tadreo, thê ìh wìh hlài broq hatroq dèh ca oh daq hòiq, khi ìh hi trùh am nègè tadreo.

²⁵ “Jò lam pajùm ti mangai ma git ca ìh, ìh ep renh hatroq ca haq. Tàng ùh broq ‘màng aih, haq jao am ìh ca cwan hadrah. Cwan hadrah jao ìh ta ti mangai wèq hnem tù, èh ìh ‘biq clèh ta tù. ²⁶ Joq ‘nàng Au doi ca ìh, tàng ìh ca’naih òi thiùq mòiq òng, xôq ìh ùh jah loh khi enh hnem tù.

²⁷ “Pì i tàng bàu doi: ‘Ìh apaq broq tôiq tango.’[☆] ²⁸ Mahaq Au doi ca pì loq: Mangai leq ngan gù cadrì rai hèm ta manoh enh tango ca haq, mangai aih khi broq tôiq tango ta manoh ca gù cadrì aih. ²⁹ Tàng mat pah ‘ma broq ìh broq tôiq, thê ìh dõih tèm đac hangai ca ìh beq, ma jah mang aih cađac mòiq apah mat lem yi hnao ca cađac òiq ca chac hamac mùt ‘bau ùnh. ³⁰ Tàng tì pah ‘ma broq ìh broq tôiq, thê ìh coh tèm đac hangai ca ìh beq, ma jah ‘màng aih, cađac mòiq apah tì, lem yi hnao òiq ca chac hamac mùt ta ‘bau ùnh.

☆ 5:27 5:27 LEA 20:14.

³¹ “I bàu doi: ‘Tàng mangai leq enh cađac dèh mai, haq ep achìh jàiq cađac.’[✠] ³² Mahaq Au doi ca pì: Tàng mangai leq cađac dèh mai, ùh xài taiq mai haq tango, mangai aih khi broq dèh mai loh mangai broq tôiq tango. Tàng mangai leq yõc mangai cadrì wì khi cađac, èh haq hadai broq tôiq tango.

³³ “Pì òi tàng bàu doi ca wì calah nèh: ‘Ìh ùh jah pachac ‘nùt, mahaq enh ngìa ca Chuaq, ep wèq dèh bàu pachac.’ ³⁴ Mahaq Au doi ca pì: Apa q pachac broq cleq. Apa q patô plình khi èh pachac, ma jah ‘màng aih plình, aih gèq bùa da Boc Plình. ³⁵ Apa q patô crõng taneh khi èh pachac, ma jah ‘màng aih crõng taneh, aih nòi long thòt ðòiq roh jènh da Boc Plình. Apa q patô phòq Jê-ru-sa-lem khi èh pachac, taiq aih phòq Bùa càn. ³⁶ Ìh apa q patô dèh gàu, khi èh pachac, ma jah ‘màng aih ìh xôq ‘nhòq jah broq dèh mòiq hadrang xàc ta gàu loh ca gam loq loh ca taboc. ³⁷ Mahaq ìh phai doi: ‘Jòq,’ ‘jòq,’ ‘ùh,’ ‘ùh.’ Biac leq wì ma anoi tam, biac aih loh enh ngang dù.

³⁸ “Pì i tàng bàu doi: ‘Mat ðèn mat, hanenh ðèn hanenh.’[✠] ³⁹ Mahaq Au doi ca pì: Apa q tajraq ca mangai dù, tàng haq tep hadrò ìh pah ‘ma, am hloi haq tep pah ‘ngeo. ⁴⁰ Tàng mangai leq enh kìa ìh waq ca jah yõc da ìh eo ðèq, ìh am hloi ca haq eo yôh. ⁴¹ Tàng mangai leq enh rùp ìh lam mòiq apõt trong, ìh lam tiaq haq baiq apõt trong. ⁴² Mangai leq xin dahwèq ìh, am ca haq

✠ 5:31 5:31 RAH 24:1. ✠ 5:38 5:38 LEA 21:23; Lêwi 24:20; RAH 19:21.

beq, mangai leq enh bòch òo dahwèq ìh, apaq wia đac.

⁴³ “Pì ì tàng bàu doi: ‘Thê ìh loq waq ca mangai haten hatìa, ✧ git ca mangai tagit ca ìh.’ ⁴⁴ Mahaq Au doi ca pì: Thê loq waq ca mangai tagit ca pì, wa waiq khàn am ca mangai ma ti rùp pì beq, ⁴⁵ òoìq pì jah broq con caiq Baq pì ma òi ta plình, ma jah ‘màng aih Haq jah broq mat mahì tồc òoìq xreo mangai dù wa mangai lem, broq mè am ca mangai ta-atoq wa ca mangai ngang dù. ⁴⁶ Tàng pì loq waq toq ca mangai loq waq ca pì, èh pì jah biac baha cleq? ‘Bàì mangai gop thèq, ma ùh loq broq ‘màng aih ‘mòh? ⁴⁷ Tàng pì loq waq dèh toq oh daq, ì crài leq, mangai ma ùh tiaq Chuaq ma ùh loq broq ‘màng aih ‘mòh? ⁴⁸ ‘Màng aih èh, pì ep lem rìm trong, tìah ca Baq pì òi ta Plình lem rìm trong.

6

Biac Broq Lem

¹ “Wèq dèh manoh beq, apaq broq biac ta-atoq enh ngìa ca mangai waq ca wì hnoq. Tàng broq ‘màng aih Baq pì òi ta plình ùh ‘noh biac baha cleq.

² “ ‘Màng cô, jò broq biac jùp òo, apaq hlôi ken enh ngìa ca phù cròng, tìah ca ‘bài mangai bàu lem, manoh dù broq ta hnem tagop wa roc trong òoìq ì mangai jah padèch wì. Joq ‘nàng Au doi ca pì, ‘bài mangai aih khai jah dèh biac baha cla wì haq. ³ Mahaq jò ìh broq biac jùp òo tì pah ‘ma broq, paq am tì pah ‘ngeo loq, ⁴ òoìq biac ìh

✧ 5:43 5:43 Lêwi 19:18.

jùp òò jah hlèp. Baq ìh ta Plình hnoq ta nòi hlèp,
Haq jah 'noh bìac baha ca ìh.

Bìac Waiq Khàn

(Luc 11:2-4)

⁵ “Jò pì waiq khàn, apaq broq tìah ca 'bài mangai bàu lem, manoh dù, ma jah 'màng aih wì haq toq enh waiq khàn nòi hnem tagop wa ti 'mang ngo plài òòiq phù cròng hnoq wì haq. Joq 'nàng Au doi ca pì, 'bài mangai aih khi jah dèh bìac baha cla wì haq. ⁶ Mahaq jò ìh waiq khàn, thê ìh mùt ta adùq ìh ma òi dèh mòiq ngai, clenh 'mang, khi èh waiq khàn. Baq ìh hnoq rìm bìac khi broq ta nòi hlèp, Haq jah 'noh bìac baha ca ìh. ⁷ Cô, jò pì waiq khàn, apaq capoch lam capoch hlài bàc yàng 'màng ca wì mangai ùh i tiaq Chuaq, ma jah 'màng aih wì xoh dèh capoch bàc, aih jah tàng wì haq. ⁸ 'Màng aih, pì apaq tìah troi wì haq, ma jah 'màng aih, adroi ca pì xìn, Baq pì khi loq pì nhet bìac cleq.

⁹ “ 'Màng aih, pì waiq khàn 'màng cô:
“ ‘Waiq Baq nhèn òi ta plình,
hiniq Baq jah padèch Hadròih.

¹⁰ Diac Baq jah trùh.

Manoh enh da Baq jah wìa

òì ta cròng taneh tìah ca òi ta plình.

¹¹ Xìn am ca nhèn dahwèq caq panàc rìm hi.

¹² Xìn baxǒng tòi loì da nhèn,

tìah ca nhèn hadai baxǒng tòi loì wì ma
broq tòi ca nhèn.

¹³ Xìn apaq 'mùt nhèn òi ta nòi padô 'nùt,

mahaq dèch dǒih nhèn khi ca can kiac dù.

Taiq Diac, cwìang itai, wa can 'ngah 'ngai joq òi ta tì Baq hloi hloi. Amen.'

14 “Ma jah 'màng aih tàng pì loq baxǒng tòiḡ ca mangai broḡ lòi ca pì, Baq pì òi ta Plình hadai baxǒng tòiḡ lòi ca pì. 15 Mahaq tàng pì ùh baxǒng tòiḡ ca wì, Baq pì òi ta Plình hadai ùh baxǒng tòiḡ ca pì.

Bìac Rôn ca Acaq

16 “Jò pì rôn ca acaq, pì apaḡ i hadrò mango tìah ca 'bài mangai bàu lem, manoh dù, ma jah 'màng aih wì haq to broḡ dèh hadrò mango òiḡ con mangai loḡ ca wì haq rôn ca acaq. Joq 'nàng Au doi ca pì, wì haq khi jah dèh bìac baha cla wì haq. 17 Mahaq jò ìh rôn ca acaq, ìh 'mùḡ mat, xùt dàu ta gàu beḡ, 18 òiḡ wì ùh hìaq loḡ ca ìh rôn ca acaq, mahaq toḡ Baq ìh hnoḡ ta nòi hlep. Haq hnoḡ bìac ìh broḡ, Haq jah 'nòh bìac baha ca ìh.

Cùng Hang Canaq 'Bac ta Diac Plình (Luc 12:33-34)

19 “Pì apaḡ don òiḡ cùng hang òi ta crǒng taneh, aih nòi i 'mài damang, axiang broḡ raliang wa mangai atùng pùng panàt mùt yǒc. 20 Mahaq pì ep don òiḡ dèh cùng hang òi ta plình, aih nòi ùh i ca 'mài damang, axiang broḡ raliang, hadai ùh i mangai atùng pùng panàt mùt yǒc. 21 Ma jah 'màng aih cùng hang ìh òi jang leḡ, manoh ìh òi jang aih.”

Mat 'Nghah (Luc 11:34-36)

22 “Mat, aih đen chac hamac. Tàng mat ìh 'ngah, òi ca chac hamac ìh jah 'ngah. 23 Mahaq tàng mat ìh ùh lem, èh òi ca chac hamac ìh òi jaq clam clòiq. 'Màng aih tàng can 'ngah ta chac ìh bu dàng can clam, èh can clam aih càn tam dàng leq hòh!

Bìac Lo Hèm
(Luc 12:22-31)

24 “Ùh i ca mangai leq jah broq hapõng baiq ngai craq, ma jah 'màng aih haq git ca mangai cô, loq waq ca mangai tau, loq padèch mangai cô, khin mangai tau. Pì ùh jah rai broq hapõng Boc Plình wa rai broq hapõng 'bac jèn hòh.

25 “ 'Màng cô Au òi ca pì: Apa q taiq can rih pì lèt ca dahwèq caq, hadai apa q taiq chac hamac pì lèt ca eo cwàn. Can rih ma ùh yi nhet ca dahwèq caq 'mòh? Chac hamac ma ùh yi hnao ca dahwèq caxùnh 'mòh? 26 Thê pì ngan 'bài chìm beq: Wì haq ùh rai, ùh gat, hadai ùh tah òi ta hapom, mahaq Baq pì òi ta Diac Plình xôq ban wì haq. Pì ma ùh yi hnao ca 'bài chìm 'mòh? 27 Ngan cô, i ca mangai leq òi ta pì taiq haq loq lo, haq broq 'nhòng haq jah rih tam toq 'biaq ùh?

28 “Phàn da eo cwàn, pì lèt hrin broq cleq? Pì ngan riang tacreo hon ta òi tàng 'màng leq beq. Haq ùh broq cleq, ùh caxenh brai, 29 mahaq Au òi ca pì: 'Nhac ca bùa Sa-lô-môn rahù dàng leq, xôq 'nhòq lah ca caxùnh eo lem tìah ca 'bài riang tacreo aih. 30 Ô mangai 'biaq manoh lù, nhat hon ta òi tàng, aih adrech hì cô rih, hì da èh tah ta ralùng ùnh, mahaq Boc Plình xôq am haq caxùnh eo lem 'màng aih, ùh dùh dèh ca

pì con caiq Haq. ³¹ 'Màng aih, pì apaq lèt, apaq doi: 'Cò èh, bèn caq cleq?' 'Ôq cleq?' 'Caxùnh cleq?' ³² Ma jah 'màng aih rìm biac aih mangai jàn 'noiq xôq loq chaq yôt. Baq pì ỏi ta Diac Pình khi loq ca pì nhet rìm biac aih. ³³ Mahaq adroi dõng dìq, phai chaq Diac Boc Pình wa can ta-toq da Haq, èh Haq jah am tam ca pì rìm biac ma 'noiq hòh. ³⁴ 'Màng aih, apaq lèt biac hì da èh, ma jah 'màng aih biac hì da èh jah lèt ca hì da èh, biac xalep hì leq 'nang lem dèh ca hì aih.

7

Biac Hadrah (Luc 6:37-38,41-42)

¹ "Pì apaq hadrah mangai 'noiq, òi q pì ùh hìaq chiùq biac hadrah. ² Ma jah 'màng aih pì hadrah wì 'noiq 'màng leq, èh wì hadai hadrah hlài pì 'màng aih. Pì tống am ca wì dàng leq, èh wì hadai tống hlài ca pì dàng aih dìq.

³ "Gleq ìh ngan hnoq khenh ta mat oh daq ìh, mahaq ùh hnoq caxaih long ỏi ta mat cla ìh.

⁴ Gleq ìh hùa doi dèh ca oh daq: 'Òi q au dõih da ìh khenh ta mat,' mahaq i caxaih long ỏi ta mat cla ìh? ⁵ Ô mangai bàu lem, manoh dù, adroi dõng ìh ep yõc caxaih long loh khi enh mat ìh beq, khi èh ìh men xau hnoq ro dõih đac khenh loh khi enh mat oh daq ìh.

⁶ "Apaq am ca coq nè hadròih. Apaq hwenh nõc pì jang ngĩa chũa, yùq wì haq jõi q enh 'neq ca jèn h, èh wì haq wìh hlài cap hich cla pì.

Ti Chaq (Luc 11:9-13)

⁷ “Xìn beq, èh jah. Chaq beq, èh hnoq. Clôq 'mang beq, jah pèh. ⁸ Ma jah 'màng aih, tàng mangai leq xìn, jah am ca haq. Mangai leq ti chaq, jah chaq hnoq. Mangai leq clôq 'mang, jah pèh am ca haq.

⁹ “Öi ta pì i ca mangai leq, jò con haq xìn 'benh, haq am dèh ca con hmu ùh? ¹⁰ Loq con haq xìn ca, haq am dèh ca con bih ùh? ¹¹ 'Màng aih, pì mangai 'mèq xôq loq am dèh ca con biac lem, ùh dùh dèh ca Baq pì öi ta plình ma ùh am biac lem ca 'bài mangai leq xìn Haq 'mòh? ¹² Pì enh waq ca wì broq ca pì 'màng leq, pì hadai ep broq am ca wì 'màng aih. Aih Ranenh wa bàu anoi da Mangai Capoch Thai Boc Plình.

'Mang Chit
(Luc 13:24)

¹³ “Mùt 'mang chit beq, ma jah 'màng aih, 'mang rùng wa trong càn, 'ràng trùh nòi hù hnhung, mangai mùt ta aih bàc. ¹⁴ Mahaq 'mang chit wa trong 'yoh ma 'ràng trùh nòi can rìh, 'biaq mangai chaq jah nòi aih.

Ngan Plì, hi Canao Loq Long
(Luc 6:43-44)

¹⁵ “Ep ngan kenh 'bài mangai amòng capoch bàu loq adroi, aih 'bài mangai caxùnh eo trùu lam trùh ti pì, mahaq manoh wì tiàh ca coq brì loq tacap hich. ¹⁶ Pì hnoq plì, èh pì jah canao ca long. I ca mangai leq lah gich plì nho ta long hila, loq gich plì póc ta long hila cadê ùh? ¹⁷ 'Màng aih, tàng long leq lem, loh plì lem, mahaq long leq 'mèq loh plì 'mèq. ¹⁸ Long lem ùh jah loh plì

'mèq, long 'mèq ùh jah loh plì lem. ¹⁹ Tàng long leq ùh loh plì lem, ep coh bùh đac. ²⁰ 'Màng aih èh, pì hnoq plì wì haq, pì jah canao ca wì haq.

Chuaq Loq Manoh Mangai
(Luc 13:25–27)

²¹ “ Ûh xài mangai leq hi doi ca Au: ‘Waiq Chuaq, waiq Chuaq,’ èh jah mùt đống Diac Plình đòh, mahaq toq mangai ma broq tiaq manoh Baq òi ta Diac Plình raq. ²² Hì aih èh, i bàc mangai doi ca Au: ‘Waiq Chuaq, waiq Chuaq, nhèn ùh khi lah canòm ca hiniq Chuaq capoch bàu loq adroi; canòm ca hiniq Chuaq hnan đac can kiac; loq canòm ca hiniq Chuaq broq bàc bìac halac ‘mòh?’ ²³ Jò aih èh, Au jah doi ca wì haq ro rang: ‘Ô pì mangai broq bìac ngang dù, Au ùh ‘nì ca pì, lùì khi ca Au beq.’

Phai Broq Tiaq Bàu Boc Plình
(Luc 6:47–49)

²⁴ “ ‘Màng aih, mangai leq tàng wa broq tiaq bàu Au doi cô, Haq tìah ca mangai khôn rabiaq broq hnem enh cởng hmu càn. ²⁵ ‘Nhac ca i mè dèh, diac làn, bahùt tep, hnem aih ùh tacro, ma jah ‘màng aih, khi broq cajap enh cởng hmu. ²⁶ Mangai leq tàng bàu Au doi cô, mahaq haq ùh broq tiaq, haq tìah ca mangai blùng broq hnem ta braih. ²⁷ I mè dèh, diac làn, bahùt tep, hnem aih tacro raliang đống đìq.”

²⁸ Jò Chuaq Jêxu hnài wì bàu aih bu hêq, mangai jàn tamàng bàu Haq, wì đìq hamàih, ²⁹ ma jah ‘màng aih Haq hnài i cwìang itai càn, ùh troi ‘bài thài ranenh.

8

*Chuaq Broq Brêh Mangai Bacùn**(Môc 1:40-45; Luc 5:12-16)*

¹ Jò Chuaq Jêxu loh enh bôl wang, i mangai jàn bəc tiaq Haq. ² Wop jò aih i mòiq ngai bacùn thia haten waiq Haq, rai doi: “Waiq Chuaq, tàng lem manoh Ìh, xìn Ìh broq au jah brêh.”

³ Chuaq Jêxu hnhu tì bèq haq, rai doi: “Au lem manoh, brêh beq.” Tajòl 'mòi mangai aih jah brêh. ⁴ Chuaq Jêxu doi ca haq: “Wèq oq, apaq doi ca mangai 'noiç loq, mahaq ìh phai lam patô dađeh ca 'bài pajàu càn, èh am tadreo tiaq Ranenh Môise hnài, ðòiq wì hnoq Boc Plinh khi broq brêh ca ìh.”

*Broq Brêh ca Hapõng Ðòiq Trùang**(Luc 7:1-10)*

⁵ Jò Chuaq Jêxu mùt ta phòq Ca-bê-na-um, i mòiq ngai ðòiq trùang trùh xìn Haq, ⁶ doi: “Chuaq ôi, hapõng au ùh hróc pen. Haq cùi ôi ta hnem au. Haq jìq xa ðìq jaq.”

⁷ Chuaq Jêxu doi: “Au lam trùh broq brêh ca haq.”

⁸ Ðòiq trùang padreo bàu doi: “Waiq Chuaq, hnem au ùh tajì ca 'mùt Chuaq mùt. Xìn Chuaq toq doi mòiq bàu raq, hapõng au jah brêh. ⁹ Ma jah 'màng aih, au ôi enh 'neq ca cwàng mangai 'noiç. Au hadai i lình enh 'neq ca au hòm. Au thê mangai cô: ‘Lam beq,’ haq lam; thê mangai tau: ‘Trùh beq,’ haq trùh; wa au thê dèh hapõng: ‘Broq biac cô beq,’ haq broq.”

¹⁰ Jò Chuaq Jêxu tàng bàu aih, Haq hamàih ta manoh, doi ca 'bài mangai ma lam tiaq Haq: “Jòq

'nàng Au doi ca pì ỏi ta Is-ra-ên, Au 'nhòq lah hnoq mangai leq i manoh lùì 'màng cô. ¹¹ Au doi ca pì, cô èh jah i bàc ngai loh enh Diac pah mat mahì loh wa enh Diac pah mat mahì mùt, lam trùh, ha'ngui caq pajùm ti Ap-ra-ham, Isac wa Jacôp ta Diac Plình. ¹² Mahaq 'bài mangai Yothaiq ma jah creò con jàn Diac Plình, Haq jah hwenh đac enh gùng nòi clam cloìq; ta aih i toq bàu crò hmoi wa cadrit hanenh."

¹³ Chuaq Jêxu doi ca đoiq truang: "Hlài beq, tiaq troi biac ìh lùì, ìh jah 'màng aih." Tajòì 'mòì jò aih, hapông da đoiq truang ỏi ta hnem jah brêh.

*Chuaq Jêxu Broq Brêh ca Bàc Ngai 'Noiq
(Môc 1:29-34; Luc 4:38-41)*

¹⁴ Jò Chuaq Jêxu mùt ta hnem Pêtrô, hnoq miq mai Pêtrô ùh hróc tacat cùi ta jùang. ¹⁵ Chuaq Jêxu hnhu tì bèq mangai ùh hróc, tajòì 'mòì can tacat hnhung hloi, khi èh haq yông patìh ca Chuaq Jêxu.

¹⁶ Trùh chùu, wì 'ràng ca Chuaq Jêxu bàc ngai i kiac ỏi ta chac. Mòiq nà bàu capoch Chuaq Jêxu khi jah hnan đac kiac dù, èh hadai broq brêh đìq ca mangai hinìq. ¹⁷ 'Màng aih, đoiq troq troi bàu Êsai, mangai capoch thai Boc Plình, khi doi: "Haq khi yóc can ùh hróc bèn, genh can hinìq bèn."✧

*Ep Broq 'Màng Leq Tiaq Chuaq
(Luc 9:57-62)*

¹⁸ Khi èh, jò Chuaq Jêxu hnoq bàc mangai jàn ỏi wawenh ca Haq, Haq thê dèh mangai hóc

✧ 8:17 8:17 Êsai 53:4.

tiaq chùng bong tọc pah tau. ¹⁹ I mòi q ngai thài ranenh thia trùh doi ca Chuaq Jêxu: “Thài ôi, Ìh lam ta leq, au lam tiaq ta aih.”

²⁰ Chuaq Jêxu padreo bàu doi: “Chôn i còp, chòm i pù, mahaq Con Mangai ùh i ca nòi angèn gàu.”

²¹ I mòi q ngai hóc tiaq 'noi q hòm lam trùh doi ca Haq: “Chuaq ôi, xin Ìh am au hlài catùh dèh baq hòiq, khoi èh au lam tiaq Ìh.”

²² Mahaq Chuaq Jêxu doi: “Lam tiaq Au beq, òiq mangai cachit catùh mangai cachit da wì.”

Bahùt 'Ne Diac Raxìq

(Mòc 4:35–41; Luc 8:22–25)

²³ Atìq ca aih, Chuaq Jêxu tọc ta bong. 'Bài mangai hóc tiaq, tiaq Haq. ²⁴ Ta'ngac i bahùt càn hlôi dèh, diac lai laq glàm bong, mahaq Chuaq Jêxu òi cùi. ²⁵ 'Bài mangai hóc tiaq thia haten, padriù Haq. Wì doi: “Waiq Chuaq, xin dèch nhèn dìq! Nhèn cachit manàiq raq!”

²⁶ Haq doi: “Ô 'bài mangai 'biaq manoh lùì, gleq pì ma crè?” Haq yòng, lech ca cayeo wa diac raxìq. Tajòì 'mòi diac raxìq haten, pi lai laq.

²⁷ 'Bài mangai aih hamàih, wì doi: “Mangai cô Cabô? Gleq cayeo wa diac raxìq dìq iu bàu Haq?”

Broq Brêh ca Mangai i Kiac

(Mòc 5:1–20; Luc 8:26–39)

²⁸ Jò Chuaq Jêxu khoi tọc 'bò diac pah tau, ta gùng Ga-đa-ra, Haq glàm wa baiq ngai i can kiac òi ta chac. Wa loh enh cadràng hanang hnoq ramòt dìq jaq, ùh i ca mangai leq hùa lam cwa trong aih. ²⁹ Wa cachech bàu dèh doi: “Waiq Con

Boc Plình, au wa Ìh i bìac cleq? I joq Ìh trùh ta cô òiòq baxa ma adroi ca jò pajaq 'mòh?"

³⁰ Wop jò aih, i mòiq calùh chùà 'nang acaq òi hangai ca wì haq toq 'biaq. ³¹ 'Bài can kiac xìn Chuaq Jêxu, wì haq doi: "Tàng Ìh hnan nhèn loh, xìn Ìh am nhèn mùt ta calùh chùà tau."

³² Haq thê 'bài can kiac aih: "Lam beq!" 'Bài can kiac loh khoi enh wa baiq ngai, mùt òng ta 'bài chùà. Tajòì 'mòi calùh chùà aih cadàu enh bòi criang hadrùc ta diac raxìq. Dìq cram òng ta diac. ³³ 'Bài mangai ban chùà cadàu hlài ta plài anoi hlài bìac ma khoi loh, wa bìac mangai i kiac òi ta chac. ³⁴ Dìq ca plài wì loh chaq Chuaq Jêxu. Bu hnoq Haq, wì thê Haq loh khoi ca gùng wì haq.

9

Chuaq Broq Brêh Mangai Pen (Môc 2:1-12; Luc 5:17-26)

¹ Chuaq Jêxu tọc ta bong cwa diac raxìq hlài dèh ta phòq. ² I wì 'ràng ca Haq mòiq ngai mangai pen cùi ta jùang. Chuaq Jêxu hnoq manoh lùì 'bài mangai aih. Haq doi ca mangai pen: "Ô con, lem bùi beq, tôiq lôì con khoi jah baxõng."

³ Jò aih, i toq 'biaq 'bài thài ranenh hèm ta manoh: "Mangai cô capoch bàu 'mèq òng Boc Plình!"

⁴ Mahaq Chuaq Jêxu loq ca manoh 'bài thài aih, Haq doi: "Gleq pì ma jah hèm bìac 'mèq òi ta manoh? ⁵ Trom baiq nà bàu capoch: Mòiq nà doi: "Tôiq lôì ìh khoi jah baxõng," mòiq nà

doi: 'Ìh yòng lam beq,' nà leq ma yi xùang ca capoch? ⁶ Cô èh, òiôq pì loq Con Mangai jò Haq òi ta crống taneh, xôq i cwiàng baxông tôiq lôi." Khoi èh, Haq doi ca mangai pen: "Yòng lam beq, xùì dradrah ahlài ta hnem ìh." ⁷ Tajòì 'mòì mangai pen yòng hlài dèh ta hnem. ⁸ Mangai jàn hnoq cwiàng halac aih, mangai leq ji yùq crè, wa manè Boc Plình khoi am ca con mangai cwiàng itai 'màng aih.

Chuaq Creo ca Mathêu
(Môc 2:13-17; Luc 5:27-32)

⁹ Jò Chuaq Jêxu loh khoi enh hnem aih, Haq hnoq mòiq ngai 'nang ha'ngui gop thèq ta hnem thèq, hiniq haq Mathêu. Chuaq Jêxu doi ca haq: "Lam tiaq Au beq!" Haq padinh yòng lam tiaq Chuaq Jêxu.

¹⁰ Atiq ca aih, jò Chuaq Jêxu ha'ngui acaq ta hnem Mathêu, i 'bài mangai gop thèq wa mangai i tôiq, ha'ngui acaq ti Haq wa mangai hóc tiaq Haq. ¹¹ 'Bài mangai Pha-ri-si hnoq 'màng aih. Wì doi ca mangai hóc tiaq Haq: "Gleq Thài pì ma ha'ngui acaq pajùm ti 'bài mangai gop thèq wa 'bài mangai i tôiq aih?"

¹² Chuaq Jêxu tàng bàu aih, Haq doi: "Ùh xài mangai tadêh ma nhet ca 'bacsì sì, mahaq mangai ùh hróc ma nhet ca 'bacsì sì. ¹³ Lam beq, phai hóc loq bàu cô enh doi cleq: 'Au enh can xa-ốch, mahaq ùh enh ngè tadreo.'[☆] Ma jah 'màng aih, Au trùh ta cô ùh xài òiôq creo ca mangai ta-atoq, mahaq creo ca wì ma i tôiq."

☆ 9:13 9:13 Ôsê 6:6.

14 Jò aih, i 'bài mangai hỏc tiaq da Jon lam trùh chaq Chuaq Jêxu, wì bòch: “Nhèn wa 'bài mangai Pha-ri-si, rôn ca acaq, gleq 'bài mangai hỏc tiaq ìh ùh rôn ca acaq?”

15 Chuaq Jêxu padreo bàu doi: “Jò con ổng ỏi caq hiniang lem bùi pajùm dèh ti 'bài bua, 'bài bua haq ùh loq mango. Mahaq trùh hì wì 'nong đac con ổng hangai ca wì haq hì aih èh, wì men rôn ca acaq.

16 “Ừh i ca cabô ma lah clep ha'nech bai neo 'mùt ta eo dùnh. Tàng broq 'màng aih, ha'nech bai neo dùng đac eo dùnh, èh trong hyah rai èh rai rùng hòm. 17 Ji ùh i cabô ma lah ùc alac nho neo ta 'bao akia dùnh, tàng broq 'màng aih 'bao akia aih padah, alac nho loh đong, 'bao hadai om, mahaq tàng cabô ùc alac nho neo ta 'bao neo, jah wèq đong điq baiq.”

*Con Cadri Jairu Cachit wa Gu Cadri Ûh Hrỏc
(Mỏc 5:21-43; Luc 8:40-56)*

18 Jò Chuaq Jêxu ỏi anoi ca wì biac aih, i mòiq ngai, mangai wèq hnem tagop cadiang mùt hacùn cràng jang ngìa Haq rai doi: “Con cadri au neo cachit, xìn Chuaq trùh òi ti ti chac haq, haq jah rìh.” 19 Chuaq Jêxu padinh yòng lam ti mangai aih. Mangai hỏc tiaq lam tiaq.

20 Jò aih i mòiq ngai gu cadri ùh hrỏc loh mahem khoi 12 hanam, thia haten enh cloh, bèq ha'mai eo Chuaq Jêxu. 21 Ma jah 'màng aih haq hèm: “Tàng au jah bèq ha'mai eo Chuaq Jêxu au jah brêh.”

²² Chuaq Jêxu hwi ngan, hnoq mangai cadrì, Haq doi: “Ô con, lem bùi beq, manoh lùì da con khoi broq am ca con jah brêh.” Tajòi 'mòi jò aih, mangai cadrì aih jah brêh ca ùh hróc.

²³ Jò Chuaq Jêxu trùh ta hnem mangai wèq hnem tagop, hnoq wì hlôi taliaq wa 'bài mangai hmoi tagràng tagrèt, ²⁴ Haq doi: “Pì loh dǒng enh gùng beq! Mangai cadrì 'yoh cô ùh xài haq cachit, mahaq haq cùi.” Tàng bàu aih wì lê Haq. ²⁵ Jò khoi thê wì loh enh gùng dìq dǒng, Haq mùt ta hnem rùp tì mangai 'yoh cadrì. Tajòi 'mòi mangai 'yoh cadrì aih yòng. ²⁶ Wì anoi bìac aih jàp ta gùng aih.

Chuaq Broq Brêh Baiq Ngai ùh Xau

²⁷ Jò Chuaq Jêxu loh lam enh nòi aih, i baiq ngai ùh xau mat, tiaq haq rai creo: “Ô con xau Dawit, xin xa-öch ca ma dìq.”

²⁸ Jò Haq khoi mùt ta hnem, baiq ngai, mangai ùh xau mat lam trùh. Haq bòch wa: “Chôp lùì Au broq jah bìac chôp enh 'mòh?”

Wa tèo: “Waiq Chuaq, ma lùì.”

²⁹ Haq bèq mat wa, rai doi: “Tiaq troi manoh chôp lùì, khoi jah 'màng aih.” ³⁰ Mat wa baiq ngai tajòi 'mòi jah xau hnoq. Chuaq Jêxu gràm padràng pa'yèp wa: “Wèq oq, apaq am cabô loq bìac cô.” ³¹ Mahaq jò wa baiq ngai loh khoi enh hnem, wa am dìq ca wì jàp ta gùng aih loq ca bìac Chuaq khoi broq.

³² Jò lam khoi ca nòi aih, i wì 'ràng ca Haq mòi q ngai, mangai làu i kiac ỏi ti chac. ³³ Haq hnan đac can kiac, khoi èh mangai làu jah capoch. Mangai

jàn hamàih, wì doi: “ 'Nhòq lah hnoq bìac halac 'màng cô ỏi ta Is-ra-ên!”

³⁴ Mahaq mangai Pha-ri-si doi: “Mangai cô canòm ca bùa can kiac hnan đac can kiac.”

³⁵ Chuaq Jêxu lam jàp ta 'bài phòq wa plài, hnài Bàu Lem Diac Boc Plình ta 'bài hnem tagop, wa broq brêh rìm ngai ùh hróc. ³⁶ Jò Haq hnoq mangai jàn bàc, Haq xa-öch ca wì, ma jah 'màng aih wì xalep, pac lac tìah ca trìu ùh i ca mangai ban. ³⁷ Haq doi ca 'bài mangai hóc tiaq: “ 'Mau bàc, mahaq mangai gat toq 'biaq. ³⁸ 'Màng aih ep xìn Chuaq da jò gat, thê tam mangai gat lam gat 'mau Haq.”

10

Chuaq Ràih Mòi q Jàt Ngai Hóc Tiaq (Mốc 3:13-19; Luc 6:12-16)

¹ Chuaq Jêxu creò dèh ca 12 ngai hóc tiaq trùh, am ca wì cwàng itai hnan đac can kiac wa broq brêh rìm hiniq.

² Hiniq sùq đò Haq 12 ngai: Adroi baxèm, aih Simôn, wì hadai creò haq Pêtrô, wa Anrê oh haq, Jacò con Xê-bê-đê, wa Jon oh haq. ³ Philip wa 'Ba-thê-lê-mi, Thôma wa Mathêu, mangai gop thèq, Jacò con Aphê wa Thadê. ⁴ Simôn mangai Ca-nan, wa Juđa Ich-ca-ri-ôt, mangai blòq Chuaq.

Mòi q Jàt Baiq Ngai Lam Anoi Hnài (Mốc 6:7-13; Luc 9:1-6)

⁵ Chuaq Jêxu thê wì 12 ngai sùq đò loh lam, Haq doi: “Pì paq lam trùh ti mangai jàn 'noi q, hadai paq mùt ta phòq mangai Sa-ma-ri.

⁶ Mahaq lam chaq 'bài con trìu Is-ra-ên khoi lac

trong. ⁷ Jò pì lam, doi ca wì 'màng cô: 'Diac Plình trùh khoi haten.' ⁸ Pì broq brêh ca mangai ùh hrốc, broq mangai cachit jah rih hlài, broq mangai bacùn jah brêh, wa hnan đac can kiac. Pì khoi jah nhàn dech, hadai ep am dech.

⁹ "Apaq wê wang, 'bac, loq 'bac jèn ti caxi ca'nam pì. ¹⁰ Lam ti trong, hadai paq wê 'bao, loq eo baiq blah, jai loq long canhra. Ma jah 'màng aih, pì broq biac đàng ca wì am ca pì dahwèq caq. ¹¹ Jò pì mùt ta phôq loq plài, ep bòch ngan hnem leq ma tajì ca đìh yốc pì, èh ỏi hloi hnem haq trùh jò pì loh lam. ¹² Jò pì mùt hnem leq, ep waiq khàn xin am can catèm ca hnem aih. ¹³ Tàng hnem aih tajì ca jah, èh can catèm pì loh ỏi ti hnem aih. Tàng ùh, èh can catèm pì, jah ỏi hlài da cla pì. ¹⁴ Tàng ma leq ùh đìh yốc pì, ùh tamàng bàu pì, jò pì loh khoi enh hnem aih, loq phôq aih, pì ep hapùih hreo blo ma top ta jènh pì. ¹⁵ Joq 'nàng au doi ca pì, trùh hì hadrah, gùng Sôđôm wa gùng Gô-mô-ra jah chiùq baxa yi 'biaq ca phôq aih.

Biac Ti Rùp Atìq Cô Èh
(Mốc 13:9-13; Luc 21:12-17)

¹⁶ "Au thê pì loh lam tìah ca trìu mùt ta'ne cadrong coq brì. 'Màng aih, pì ep rabiaq tìah ca bìh, habùat tìah ca chìm trù. ¹⁷ Ep wèq dađeh, ma jah 'màng aih, wì jah rùp 'ràng pì enh ngìa ca wì mangai tinh hiniq. Wì blai pì ta hnem tagop. ¹⁸ Taiq pì tiaq Au wì ma jah 'ràng pì enh ngìa ca 'bài cwan, 'bài bùa, đòiq pì anoi biac Diac Plình ca wì haq wa ca mangai jàn 'noi. ¹⁹ Mahaq jò wì rùp pì, pì apaq hèm ep capoch 'màng leq, anoi

'màng leq, ma jah 'màng aih bàu leq đang ca anoi jah patô 'mòi ca pì jò aih. ²⁰ Aih ùh xài cla pì capoch đeh, mahaq Yiang Hadròih da Baq pì jah mùt ta manoh pì capoch 'noh.

²¹ “Đaq blòq oh waq ca jêh đac. Baq blòq con waq ca jah jêh đac. Con caiq tajraq hlài dèh ca miq baq waq ca jah jêh đac ca cachit. ²² Wì rìm ngai tagit ca pì taiq pì tiaq Au, mahaq mangai leq cajap manoh trùh jò lùch, èh haq jah dèch. ²³ Jò leq wì ti rùp pì ta phôq cô, èh phai mot cwa phôq tau, ma jah 'màng aih, Au doi ca pì bàu joq 'nàng, pì lam 'nhòq jàp ta 'bài phôq mangai Is-ra-ên adroi Con Mangai trùh.

²⁴ “Mangai hỏc tiaq ùh jah yi hnao ca thài, hapõng ùh yi hnao ca cla craq. ²⁵ Mangai hỏc tiaq jah troi thài, hapõng jah troi cla craq, aih khi lem. Tàng wì khi creo ca craq hnem aih can kiac 'Bê-ên-xê-bun, èh wì creo ca con caiq Haq dàng leq!

Khòh Yùq Crè Cabô?

(Luc 12:2-7)

²⁶ “ 'Màng aih, pì apaq crè ca wì, ma jah 'màng aih ùh i ca biac cleq cadoc ma ùh jah pa'noh loh, ji ùh i ca biac leq jrùq ta manoh atiq èh ma ùh jah loq. ²⁷ Taiq 'màng aih, bàu Au doi ca pì ta nòi clam clôiq, ep anoi ro ta nòi 'ngah. Bàu pì tàng jang don, anoi 'noh ti cùa hnem beq. ²⁸ Apaq crè ca mangai jah jêh đac toq chac hamac ma ùh jah jêh đac mahua yiang. Mahaq pì phai crè ca Haq ma jah broq hnhung mahua yiang wa chac hamac ta 'bau ùnh. ²⁹ Baiq toq chìm xê tech jah mòiq hliac 'bac joq ùh? Mahaq tàng Baq pì

ùh thê, èh ùh i mòiq toq con leq jah taclih ta taneh. ³⁰ Dìq ca hadrang xàc ta gàu pì, Haq ji khoi jah rên dǒng. ³¹ 'Màng aih, pì apaq crè, ma jah 'màng aih, pì yi canaq yi hnao ca chím xê."

Anoi 'Noh Hiniq Chuaq Jêxu

(Luc 12:8-9,15-53; 14:26-27)

³² "Taiq 'màng aih, mangai leq pa'noh hiniq Au jang ngìa phù cròng, èh Au ji pa'noh hiniq haq jang ngìa Baq Au òi ta plình. ³³ Mahaq mangai leq hangah ùh 'nì ca Au jang ngìa phù cròng, Au hadai hangah ùh 'nì ca haq jang ngìa Baq Au òi ta plình.

³⁴ "Apaq xoh Au trùh òiq am can catèm ca cròng taneh. Au trùh ùh xài 'ràng can catèm mahaq 'ràng pla chang gùm. ³⁵ Au trùh òiq " 'lah con calô tajraq dèh ca baq haq, lah con cadrì tajraq dèh ca miq haq, lah con mai tajraq dèh ca miq ǒng.

³⁶ Mangai ma tagit ca wì haq, aih mangai ta hnem cla wì haq.'✧

³⁷ "Mangai leq loq waq dèh ca miq baq yi hnao ca haq loq waq ca Au, ùh tajì ca Au. Hadai 'màng aih, tàng mangai leq loq waq dèh ca con calô, con cadrì yi hnao ca Au, hadai ùh tajì ca Au. ³⁸ Mangai leq ùh xùì dèh long pagat lam tiaq Au, ji ùh tajì ca Au. ³⁹ Mangai leq ham ca can rìh 'nhòng cô, èh jah hnhung, mangai cađac dèh can rìh 'nhòng cô taiq haq tiaq Au, haq jah chaq hnoq hlài.

⁴⁰ "Mangai leq òih yǒc pì, aih òih yǒc Au, mangai òih yǒc Au, aih òih yǒc Haq ma khoi thê

✧ **10:36** 10:36 Mica 7:6.

Au trùh ta cô. ⁴¹ Mangai leq ðìh yǒc mòiq ngai, mangai capoch thai Boc Plình, taiq haq broq mangai capoch thai Boc Plình, haq jah nhàn yǒc biac baha tiah ca mangai capoch thai Boc Plình. Mangai leq ðìh yǒc mòiq ngai, mangai ta-atoq taiq haq mangai ta-atoq, èh haq hadai jah nhàn yǒc biac baha troi mangai ta-atoq. ⁴² Mangai leq am ca mòiq ngai òi ta 'bài mangai 'yoh cô, ôq mòiq doi chrǒng diac hangeo, taiq mangai 'yoh aih mangai hǒc tiaq Au, joq 'nàng, Au doi ca pì, mangai aih ùh hnhung ca biac baha da haq."

11

Jon 'Baptit òi ta Hnem Tù

¹ Jò Chuaq Jêxu khoi hnài wì 12 ngai hǒc tiaq Haq ðiq ca biac aih, Haq lam khoi ca nòi aih, hnài ta 'bài phòq da gùng wì haq.

² Jò Jon òi ta hnem tù tàng wì anoi hlài biac broq da Chuaq Jêxu Crich, Haq thê dèh mangai hǒc tiaq lam bòch Chuaq Jêxu: ³ "Thài i joq Mangai nhèn ngèh gòm ùh, loq nhèn ep gòm Mangai 'noi q hòm?"

⁴ Chuaq Jêxu padreo bàu doi: "Pì hlài anoi hlài ca Jon loq, biac pì khoi tàng, khoi hnoq.

⁵ Mangai ùh xau jah hnoq, mangai cwê jah lam, mangai bacùn jah brêh, mangai clich don jah tàng, mangai cachit jah rìh hlài, mangai pa jah tamàng Bàu Lem Diac Boc Plình. ⁶ Xôq ramót ca mangai leq ùh catòih cro ta manoh taiq Au."

⁷ Jò mangai hǒc tiaq Jon khoi hlài, Chuaq Jêxu men anoi hlài biac Jon am ca mangai jàn tàng: "Pì khoi lam ngan ta ðùng hawit jah hnoq cleq?"

I joq lam ngan cayeo hlôi long blùm tadroq ùh?
 8 Pì lam ngan cleq hòm? I joq pì lam ngan mangai
 caxùnh eo rahù ùh? Tau, 'bài mangai caxùnh eo
 rahù òi ta hnem bùa. 9 Pì lam ngan cleq hòm?
 I joq pì lam ngan mangai capoch thai Boc Plình
 ùh? Joq, Au doi ca pì: Haq yi hnao ca mangai
 capoch thai Boc Plình hòm. 10 Taiq mangai aih
 raq i bàu achìh:

“ ‘Cô, Au thê dèh hapǒng lam adroi ca Ìh
 òiđiq padon trong am ca Ìh.’[☆]

11 “Joaq 'nàng, Au doi ca pì, òiđiq ca mangai
 ma xa-ông loh enh chac mangai cadrì, ùh i ca
 mangai leq jah padèch yi hnao ca Jon 'Baptit,
 mahaq mangai ma 'yoh òiđiq jaq ta Diac Plình,
 òi jah padèch yi hnao ca haq hòm. 12 Enh jò
 Jon 'Baptit baxèm anoi hnài trùh manàiq, i bàc
 mangai yǒc manoh dèh nhang mùt ta Diac Plình,
 mahaq wì haq 'bìq mangai broq gàu enh tət
 padràng taiq wì xòq enh wèq wì haq. 13 Ma jah
 'màng aih òiđiq ca bàu 'bài mangai capoch thai
 Boc Plình wa Sech Ranenh khoi anoi biac aih enh
 adroi trùh 'nhòng da Jon. 14 Tàng pì enh 'nì enh
 loq, Jon, aih Êli, haq ma ep trùh. 15 Mangai leq i
 don tàng, tamàng beq.

16 “Au achùa xinoi cô tìah ca cabô? Xinoi cô
 tìah ca wì 'yoh ha'ngui ta chòq, creò dèh ca bua.

17 Wì haq doi:

“ ‘Nhèn khoi hlôi taliaq,
 gleq pì ùh nhaiq muaq?
 Nhèn khoi ta-oih,
 gleq pì ùh hmoi?’

☆ **11:10** 11:10 Mal 3:1.

18 Ma jah 'màng aih Jon trùh, ùh caq, ùh ôq, èh wì doi: 'Jon i kiac òi ta chac.' 19 Con Mangai trùh, caq, ôq, èh wì doi: 'Ngan tau, Mangai ham ca caq, ôq alac, broq bua ti 'bài mangai gop thèq wa mangai i tôiq lôi.' Mahaq can khôn rabiaq jah pa'noh loq nhò biac broq."

*Con Jàn Ûh Lùi Taiq Cadoq Manoh
(Luc 10:13-15)*

20 Chuaq Jêxu trech wì ta 'bài phôq, nòi Haq khoi broq bacc biac halac, taiq wì ùh chiùq cađac dèh manoh broq tôiq. 21 "Nan xa ca gè phôq Cô-ra-xin! Nan xa ca gè phôq 'Bêt-sai-đa! Ma jah 'màng aih tàng biac halac ma khoi lah broq òi ti pì, khoi lah broq ta phôq Tirò wa Sidôn, wì aih joq 'nàng khoi dùnh nèh caxùnh eo briang, rai blo tanùh ta chac, wa cađac dèh manoh broq tôiq. 22 'Màng cô Au doi ca pì: Trùh hì hadrah, phôq Tirò wa phôq Sidôn chiùq baxa yi 'biaq ca pì. 23 Ô mangai Ca-bê-na-um, pì xoh dađeh ha'nhèq trùh plình, cô èh jah ca'nìh pì trùh ta nòi cachit baxa, ma jah 'màng aih, tàng biac halac ma khoi lah broq òi ta'ne pì, khoi lah broq ta phôq Sôđôm, phôq aih jah òi i trùh manàiq. 24 'Màng cô Au doi ca pì, trùh hì hadrah, gùng Sôđôm chiùq baxa yi 'biaq ca pì."

*Phai Trùh ta Chuaq Jêxu Jah i Catèm
(Luc 10:21-22)*

25 Jò aih, Chuaq Jêxu doi: "Ôi Baq, Chuaq da plình crông taneh, Au manè pôi Baq, ma jah 'màng aih Baq khoi cadoc biac cô ca mangai khôn rabiaq, mahaq òi pa'noh am ca con 'yoh

loq. ²⁶ Baq ôi, joq 'nàng 'màng aih, Ìh khoi hnoq biac aih lem manoh Ìh.

²⁷ “Rìm biac Baq Au khoi am ca Au. Enh gùng ca Baq, ùh i ca cabô loq ca Con. Enh gùng ca Con wa mangai leq Con ma enh pa'noh ca wì haq, hadai ùh i ca cabô loq ca Baq.

²⁸ “Ôi, òi ca pì ma lep tagah wa pòq trap, lam trùh ti Au beq, Au am ca pì jah padài. ²⁹ Au i manoh habùat wa ùh catèh. Pì bac long ech Au beq, hóc tiaq Au, èh mahua yiang pì jah padài. ³⁰ Ma jah 'màng aih long ech Au xùang wa agenh Au hèo.”

12

Prot 'mau

(Môc 2:23–28; Luc 6:1–5)

¹ Jò aih, wop hì Sabat, Chuaq Jêxu lam ta ðùng i 'mau. 'Bài mangai hóc tiaq pangot, èh wì prot 'mau caq. ² 'Bài mangai Pha-ri-si hnoq mangai hóc tiaq broq 'màng aih. Wì doi ca Chuaq Jêxu: “Ngan tau, mangai hóc tiaq Ìh broq biac ùh khòh broq ta hì Sabat.”

³ Haq padreo bàu doi: “Pì 'nhòq ðóc biac Ðawit wa 'bài mangai lam tiaq haq khoi broq jò wì haq pangot 'mòh? ⁴ Aih, haq mùt ta hnem cùh waiq da Boc Plình, caq 'benh ma padon òoiq ta ca'bông tadreo, aih 'benh haq wa mangai lam tiaq haq ùh khòh caq, toq 'bài pajàu khòh caq. ⁵ Pì ùh lah ðóc Sech Ranenh 'mòh? Hì Sabat, 'bài pajàu ùh tiaq Ranenh hì aih, mahaq wì haq xòq ùh i tôiq lôi cleq? ⁶ Mahaq Au doi ca pì, jang cô i Mangai yi càn ca Hnem Cùh Waiq. ⁷ Tàng pì loq

ca hiniq bàu enh hnài cô: ‘Au enh waq manoh loq xa-öch ca mangai,’[✧] yi hnao ca ngè tadreo, èh pì ùh ta'mòq tôiq mangai ma ùh i ca tôiq. ⁸ Ma jah 'màng aih Con Mangai hadai broq Chuaq hì Sabat.”

*Chuaq Broq Brêh ca Mangai 'Yoh Tì
(Môc 3:1-6; Luc 6:6-11)*

⁹ Chuaq Jêxu loh khoi ca nòi aih, Haq mùt ta hnem tagop. ¹⁰ Õi ta hnem tagop aih i mòiq ngai 'yoh tì mòiq apah. I mangai bòch Haq: “Ta hì Sabat, khòh broq brêh mangai ùh?” Taiq wì enh chaq trong kìa Haq.

¹¹ Haq doi ca wì: “Õi ta pì i mangai leq i mòiq toq trùu. Hì Sabat, trùu haq clìh ta ralùng jrùq, haq ma ùh dèch atóc dèh trùu 'mòh? ¹² Mòiq ngai canaq yi hnao ca trùu, joq ùh? 'Màng aih, ta hì Sabat jah broq bìac lem.”

¹³ Khoi èh, Haq doi ca mangai 'yoh tì: “Hnhu tì beq!” Mangai aih hnhu tì, èh tì haq pah cô jah brêh tìa ca tì pah tau. ¹⁴ 'Bàì mangai Pha-ri-si loh enh gùng, tình ca dabau, chaq trong jêh đac Haq.

¹⁵ Mahaq Chuaq Jêxu loq bìac aih, èh Haq lam đac khoi nòi aih. I bàc ngai lam tiaq, wa Haq broq brêh dõng ca wì. ¹⁶ Haq thê wì paq doi ca mangai 'noi q loq ca Haq. ¹⁷ Đòi q troq troi bàu Êsai mangai capoch thai Boc Plình khoi doi:

¹⁸ “Cô, Hapõng Au khoi rài h,

Mangai Au òiq jaq loq waq, lem ca manoh
Au rìm trong.

Au am Yiang Hadròih òi ti Haq,

[✧] 12:7 12:7 Ôsê 6:6.

Haq jah hnài biac ta-atoq am ca mangai jàn 'noiq.

¹⁹ Haq ùh tarahen, ùh cachech bàu dêh, hadai ùh i cabô tàng bàu Haq ti trong caiq.

²⁰ Haq ùh goh long blùm khi ten tagoh, ùh pù pat đên jình jò khi ten lùch, trùh jò Haq broq biac ta-atoq jah 'blêq.

²¹ Mangai jàn 'noiq jah gòm canòm ca hiniq Haq.”[✧]

*Chuaq Jêxu wa Kiac 'Bê-ên-xê-bun
(Môc 3:20-30; Luc 11:14-23)*

²² Khi òh wì 'ràng ca Chuaq Jêxu mòi q ngai, mangai i kiac òi ta chac. Haq ùh xau mat wa ùh jah capoch. Chuaq Jêxu broq brêh ca haq, òh haq jah capoch wa jah hnoq. ²³ Wì hamàih, bòch dabau: “I jòq Mangai cô, Haq Con Xau Đawit ùh?”

²⁴ Mahaq 'bài mangai Pha-ri-si tàng biac aih, wì doi: “Mangai cô canòm ca 'Bê-ên-xê-bun bùa can kiac, Haq hnan đac can kiac.”

²⁵ Chuaq Jêxu loq ca manoh wì hêm, Haq doi: “Tàng mòi q Diac talah ca dabau, Diac aih jah raliang. Mòi q phòq loq mòi q hnem talah ca dabau ji ùh jah yòng cajap. ²⁶ Tàng kiac Satan hnan kiac Satan, haq talah dabau, broq 'màng leq Diac haq ma nui òi i 'mòh? ²⁷ Tàng Au canòm ca 'Bê-ên-xê-bun hnan đac kiac dù, òh con caiq pì canòm ca cabô hnan đac can kiac? 'Màng aih òh, mangai hỏc tiaq pì hadrah cla pì raq. ²⁸ Mahaq tàng au canòm ca Yiang Hadròih Boc Plinh hnan

✧ **12:21** 12:21 Êsai 42:1-4.

đac can kiac, 'màng aih èh joq 'nàng Diac Boc Plình khoi trùh òi ta pì.

²⁹ “I mangai leq mùt atùng ta hnem mangai i padren dèh, adroi dõng ma ùh càt cla haq 'mòh? Èp càt cla haq hòiq, men jah yõc da haq cùng hang ta hnem.

³⁰ “Mangai leq ùh òi ta Au, haq tajraq ca Au, mangai leq ùh broq bìac gop ti Au, èh haq prai priang cađac. ³¹ 'Màng aih, au doi ca pì, rìm tôiq lôi wa bàu capoch 'mèq ðùng Boc Plình èh jah baxõng, mahaq bàu capoch 'mèq ðùng Yiang Hadròih ùh jah baxõng tôiq aih. ³² Tàng mangai leq capoch ha'nhèq tajraq ca Con Mangai, tôiq lôi haq òi jah baxõng, mahaq tàng mangai leq capoch ha'nhèq tajraq ca Yiang Hadròih, 'nhac ca 'nhòng cô loq 'nhòng ma atiq, xõq ùh jah baxõng tôiq ca haq.

³³ “Long lem loh plì lem, long 'mèq loh plì 'mèq, ma jah 'màng aih, ngan plì, èh loq ca long. ³⁴ Ô pì bìh plõng, mangai ngang dù, broq 'màng leq ma jah capoch bàu lem? Ma jah 'màng aih cacleq bình halùih ta manoh men capoch loh jang hacùng. ³⁵ Mangai lem taiq khoi i manoh lem, jah hloh bàu lem, mahaq mangai dù, taiq khoi i manoh ngang dù, èh capoch bàu dù. ³⁶ Mahaq, Au doi ca pì: Trùh hì hadrah rìm ngai phai anoi 'noh dèh rìm bàu cla ma capoch ùh lem.

³⁷ “Tiaq bàu capoch jah doi haq mangai ta-atoq, hadai taiq bàu capoch jah ta'mòq cla haq.”

*I Mangai Xìn Hnoq Teo Halac
(Mõc 8:11-12; Luc 11:29-32)*

³⁸ Wop jò aih i 'bài thài ranenh wa mangai Phari-si bòch Chuaq Jêxu: “Thài ôi, nhèn enh hnoq ìh broq teo halac.”

³⁹ Haq padreo bàu doi: “Xinoi ngan dù ùh wèq dèh bàu, xìn teo halac, mahaq ùh jah am teo halac leq enh gùng ca teo halac Jôna, mangai capoch thai Boc Plình. ⁴⁰ 'Màng ca Jôna ôi ta cliac ca càn piq hì piq mang, Con Mangai hadai ôi ta taneh piq hì piq mang. ⁴¹ Trùh hì hadrah, mangai ta phôq Ni-ni-we jah yòng ta'mòq tôiq ca xinoi cô, ma jah 'màng aih jò jàn aih khi tàng bàu Jôna anoi hnài, wì cađac dèh manoh broq tôiq, mahaq ôi ta cô, i mòiq Ngai càn yi hnao ca Jôna. ⁴² Trùh hì hadrah, mangai cadrì broq bùa Diac pah 'ma mat mahì loh yòng ta'mòq xinoi cô, ma jah 'màng aih haq trùh enh nòi ma lùch ca crông taneh, tamàng bàu khôn rabiaq da Sa-lô-môn, mahaq jang cô, i mòiq Ngai càn yi hnao ca bùa Sa-lô-môn.

⁴³ “Jò can kiac loh khi enh chac mangai, haq lam trùh ta nòi croh crenh chaq nòi padài, mahaq chaq ùh jah. ⁴⁴ Haq hèm ta manoh doi: ‘Manàiq cô au wìh hlài hòm ta hnem au ma neo loh aih.’ Haq wìh hlài hnoq hnem dech, hwit hreo, padon òoiq khi tôm. ⁴⁵ Haq lam adràc tam tapèh toq kiac ma 'noi q dù yi hnao ca haq hòm. Dìq mùt ôi ta hnem aih, khi èh, chac hamac mangai aih atiq cô èh, hamoq yi hnao ca adroi. Xinoi cô hadai 'màng aih.”

*Miq wa Oh Chuaq Jêxu
(Mòc 3:31-35; Luc 8:19-21)*

⁴⁶ Jò Chuaq Jêxu 'nang ôi capoch tùang ca mangai jàn, i miq wa oh Haq ôi yòng enh gùng, enh anoi ca Haq. ⁴⁷ I wì doi ca Haq: “Thài ôi! Miq wa 'bài oh Ìh ôi enh gùng enh anoi ca Ìh.”

⁴⁸ Haq padreo bàu doi: “Cabô miq Au? Cabô oh daq Au?” ⁴⁹ Haq hnhu tì patô 'bài mangai hóc tiaq rai doi: “Cô miq Au wa oh daq Au. ⁵⁰ Ma jah 'màng aih, tàng mangai leq ma broq tiaq manoh enh da Baq Au ôi ta plình, mangai aih oh daq Au wa miq Au.”

13

Chuaq Jêxu Anoi Hnài Xam Bàu Aliah (Môc 4:1-20; Luc 8:4-15)

¹ Hadai trom hì aih Chuaq Jêxu loh khoi enh hnem, ha'ngui ti 'bò diac raxiq. ² 'Bài jàn tagop ôi dudan ca Haq bàc hrin, trùh 'mòi Haq ep tọc ha'ngui ta bong. Mangai jàn yòng ti 'bò diac. ³ Haq hnài aliah ca wì bàc trong. Haq doi 'màng cô: “Ì mòiq ngai loh lam rai adrech. ⁴ Jò haq rai, mòiq 'nah cìh ti trong, chìm trùh caq dìq. ⁵ Mòiq 'nah cìh ta hmu raga, tajòi 'mòi haq hon, taiq i toq 'biaq taneh catùh ùh jrùq. ⁶ Mahaq jò mat mahì tọc, haq hõnh taiq ùh i ca riah, haq cachit. ⁷ Mòiq 'nah cìh ôi ta nòi hila. Adrech plôh pajùm ti hila, broq ca adrech aih ùh jah càn. ⁸ Mòiq 'nah hòm cìh ta nòi taneh jiang, loh plì, mòiq pliang loh mòiq hrinh, mòiq pliang loh 60, mòiq pliang loh 30. ⁹ Mangai leq i don, tamàng beq.”

¹⁰ 'Bài mangai hóc tiaq thia haten jang Haq, wì bòch: “Gleq Ìh ma yóc bàu aliah òi miq wì?”

¹¹ Haq doi: “Khoi am ca pì loq bàu halac halùai da Diac Plình, mahaq ùh am ca wì haq loq. ¹² Ma jah 'màng aih, mangai leq khoi i, jah am tam ca haq, wì haq jah i rah, mahaq mangai leq ùh i, jah yõc hlài bìac haq khoi i. ¹³ Au capoch alìaah ca wì haq:

“Taiq wì ngan mahaq ùh hnoq,
halang don mahaq ùh tàng.

¹⁴ 'Màng aih, jah troq troi bàu Êsai mangai capoch thai Boc Plình khoi doi bìac wì haq:
'Pì halang don tamàng, mahaq ùh 'nì tàng cleq,
yõc mat ngan mahaq ùh hnoq cleq.

¹⁵ Taiq manoh jàn cô khoi cadoq cadang,
broq ca don wì haq loh ca trap,
mat wì haq khoi ca'nhip,
tàng mat blèch wì jah hnoq,
don wì jah tàng, manoh wì jah 'nì,
wì wìh hlài cađac dèh tôiq lôl,
au jah broq brêh ca wì. '☆

¹⁶ Mahaq xôq ramõt ca pì taiq mat jah hnoq wa don jah tàng. ¹⁷ Joq 'nàng, Au doi ca pì: I bàc mangai capoch thai Boc Plình, bàc mangai rìh ta-atoq ngèh ca enh hnoq bìac pì hnoq, mahaq ùh jah hnoq; ngèh ca enh tàng bìac pì tàng mahaq ùh jah tàng.

¹⁸ “ 'Màng cô, Au thê pì tamàng bàu alìaah ca mangai rai adrech enh doi cleq: ¹⁹ Mangai leq ma tamàng Bàu Lem Diac Boc Plình, mahaq haq ùh 'nì tàng, èh kiac dù trùh atùng yõc pliang adrech khoi rai ta manoh haq, aih mangai tìah ca pliang adrech cìh ti trong. ²⁰ Adrech ma taclìh

☆ **13:15** 13:15 Êsai 6:9,10.

nòi hmu raga, aih aliah ca mangai khoi ca haq tàng Bàu Lem, tajòì 'mòi haq lem bùi nhàn yốc, ²¹ mahaq adrech aih ùh hon riah ta manoh, haq rih toq 'biaq hì raq, èh jò glàm biac nan xa, biac wì ti rùp, tajòì 'mòi haq cađac Chuaq. ²² Adrech taclìh nòi hila, aih aliah ca mangai tamàng Bàu Lem, mahaq haq hèm hrìn biac crống taneh cô. Haq ham ca padrống can, broq Bàu Lem loh ca ùh yòng càn, ùh loh plì. ²³ Mahaq, adrech ma clìh nòi taneh jìang, aih aliah ca mangai tamàng Bàu Lem, èh 'nì loq ca bàu aih. Mangai aih jah loh plì, mòi q pliang loh mòi q hrinh, pliang 'noi q 60, pliang 'noi q hòm 30.”

²⁴ Chuaq Jêxu 'mon bàu aliah ma 'noi q ca wì haq: “Diac Plình tìah ca mangai rai adrech lem ta ðùng cla, ²⁵ mahaq jò haq cùi, i mangai ma git ca haq lam trùh, rai nhat ta 'mau haq, khoi èh loh lam. ²⁶ Mahaq trùh jò 'mau xròc, nhat hadai loh jò aih.

²⁷ “ 'Bài hapống da craq ðùng trùh doi ca Haq: ‘ Ùh xài ìh rai adrech lem ta ðùng ìh 'mòh? 'Màng aih nhat cô loh enh leq?’

²⁸ “Cla craq doi: ‘Aih mangai ma git ca au, haq khoi broq biac aih.’

“ 'Bài hapống bòch: ‘ 'Màng aih ìh enh nhèn lam bùi q đac nhat aih ùh?’

²⁹ “Cla craq doi: ‘ Ùh khòh, yùq jò pì bùi q nhat, loq troq bùi q đac 'mau ði q. ³⁰ Đôq haq, ðòi q wa càn pajùm trùh jò gat, èh au jah tanap ca 'bài mangai gat: Lah ðống ði q nhat, achauq crài èh bùh đac, mahaq 'ràng 'mau mì 'mùt ðòi q ta hapom.’ ”

³¹ Haq 'mon bàu aliah ma 'noiç hòm. Haq doi: “Diac Plình tiah ca mòiq pliang clong habài, i mangai yõc rai dèh ta ðùng. ³² Pliang adrech aih yi 'yoh ðõng ca 'bài pliang adrech 'noiç, mahaq jò haq khi hon, haq yi càn ca 'bài cachiq 'noiç. Haq wìa long càn, mech wìa ca chìm broq pù ta hamenh haq.”

³³ Haq hadai ta'mon hòm bàu aliah ma 'noiç doi: “Diac Plình tiah ca blo broq cadroh, i mòiq ngai gu cadrì alôn blo ta piq cađap dác, trùh jò dác aih bôq ðõng.”

³⁴ Chuaq Jêxu yõc bàu aliah aih hnài mangai jàn. Rìm biác hnài, Haq ðiq yõc bàu aliah hnài wì, ³⁵ ðòiq troq troi bàu mangai capoch thai Boc Plình khi doi:

“Au yõc bàu aliah hnài wì,
anoi hlài ca wì biác jrùq hlèp enh jò broq
crõng taneh.”✧

³⁶ Khi ca aih, Chuaq Jêxu thê wì hlài. Haq mùt ta hnem. Mangai hõc tiaq thia òi haten bõch Haq: “Thài ôi, xin ìh doi ro ca nhèn bàu aliah nhat òi ta ðùng.”

³⁷ Haq padreo bàu doi: “Mangai rai adrech lem, aih Con Mangai. ³⁸ Rùang, aih crõng taneh. Adrech lem, aih con caiq Diac Boc Plình. Nhat adròngh, aih con caiq kiác dù. ³⁹ Haq ma rai adrech 'mèq, aih can kiác Satan. Jò gat, aih hì pulùch. Mangai gat, aih 'bình plình.

⁴⁰ “ 'Màng aih, nhat ma jah bùiq tah ta ùnh 'màng leq, hì pulùch hadai 'màng aih. ⁴¹ Con Mangai jah thê dèh 'bình plình Haq gop ðiq

rìm ngai ma baxrùq broq catöih cro wa mangai ngang dù loh khoi ca Diac Haq. ⁴² Èh hwenh 'bài mangai aih mùt ta 'bau ùnh, aih nòi crò hmoi wa cadrit hanenh. ⁴³ Jò aih, 'bài mangai ta-atoq 'ngah ca-ah ca-iang tìah ca mat mahì ta Diac Baq cla wì. Cabô i don tàng, tamàng beq.

⁴⁴ “Diac Plinh alìah tìah ca hang canaq 'bac catùh ta taneh. I mòiq ngai chaq hnoq hang aih, èh haq cadoc hlài. Haq lem bùi cadàu hlài tech đống dèh cùng hang rớt taneh ðùng aih.

⁴⁵ “Diac Plinh hadai tìah ca mòiq ngai, mangai padro ngốc chaq ngốc lem. ⁴⁶ Jò khoi chaq hnoq pliang ngốc canaq 'bac, haq tech đống dèh cùng hang rớt pliang ngốc aih.

⁴⁷ “Diac Plinh hadai tìah ca mangai tang hlàm ta diac raxiq, rùp rìm hiniq ca. ⁴⁸ Jò ca khoi hlech bình ta hlàm, èh wì haq ðùng hlàm atốc ta 'bò, hi khoi wì ha'ngui ràih ca lem tah ta rô, ca 'mèq tèm đac. ⁴⁹ Trùh hì pulùch hadai 'màng aih, 'bài 'bình plinh jah trùh lah mangai ngang dù wa mangai rìh ta-atoq loh crài ca dabau, ⁵⁰ hwenh 'bài mangai dù mùt 'bau ùnh; òi ta aih toq crò hmoi wa cadrit hanenh.

⁵¹ “Pì loq tàng bìac aih ùh?”

'Bài mangai hốc tiaq padreo bàu doi: “Loq tàng.”

⁵² Haq doi: “Taiq bìac aih, rìm ngai thài ranenh khoi hốc bìac Diac Plinh, èh haq tìah ca mòiq ngai, mangai craq hnem tau, 'noh dèh cùng hang ðình wa cùng hang neo loh enh hnem.”

*Chuaq Jêxu Hlài ta Na-xa-ret
(Mốc 6:1-6; Luc 4:16-30)*

⁵³ Khoi ca Chuaq Jêxu hnài bàu aliah aih, Haq lam khoi ca nòi aih. ⁵⁴ Haq hlài trùh dèh ta gùng, hnài wì ta hnem tagop. Mangai leq tàng ji hamàih, wì bòch dabau: “Mangai cô 'nì Haq jah can khôn rabiaq wa cwìang itai cô enh leq? ⁵⁵ Cô ajoq Con Calô da mangai broq thòq long 'mòh? Miq Haq Mari, wì oh Haq Jacò, Jôsep, Simôn, Juda ajoq? ⁵⁶ Oh Haq ma cadrì diq òi ti bèn cô joq ùh? Nhò enh leq Mangai cô jah broq rìm biac aih 'màng cô?” ⁵⁷ Wì ùh lem bùi ca Haq.

Mahaq Chuaq Jêxu doi ca wì: “Mangai capoch thai Boc Plình jah wì rìm nòi padèch haq, mahaq toq mangai ta gùng haq wa mangai hnem haq lê haq.”

⁵⁸ Òi ta aih, Haq ùh broq bàc biac halac, ma jah 'màng aih taiq wì ùh lùì Haq.

14

Bùa Hêrôt Jêh Đac Jon 'Baptit (Môc 6:14-29; Luc 9:7-9)

¹ Jò aih, bùa Hêrôt tàng wì anoi hlài biac Chuaq Jêxu. ² Haq doi dèh ca hapöng: “Aih Jon 'Baptit cachit rìh hlài, taiq 'màng aih raq haq broq bàc trong halac.”

³ Taiq bùa Hêrôt khoi thê wì rùp càt Jon tah ta hnem tù, taiq biac Hê-rô-đĩa, mai Philip oh bùa.

⁴ Ma jah 'màng aih Jon khoi doi ca bùa: “Tiaq ranenh, ìh ùh khòh yóc mangai aih broq mai.”

⁵ Hêrôt chaq trong jêh đac Jon, mahaq bùa crè ca jàn, ma jah 'màng aih diq ca mangai jàn doi Jon mangai capoch thai Boc Plình.

6 Trùh hì caq hiniang manè hì xa-ông ca bùa Hêrôt, con cadrì Hê-rô-đia nhaiq muaq ta'ne 'bài mangai caq hiniang, lem manoh bùa dìq jaq. 7 'Màng aih bùa yõc bàu pachac hùaq ca con cadrì aih rìm biác con cadrì aih enh xìn haq. 8 Khoi èh miq con cadrì aih thê haq xìn doi: “Põt gàu Jon 'Baptit tah ta màm 'ràng am ca au.” 9 Tàng bàu cô, bùa loh ca mango, mahaq taiq haq khoi lò pachac enh ngĩa ca mangai caq hiniang ỏi ta aih, 10 bùa thê wì pốt gàu Jon ỏi ta hnem tù, 11 tah gàu aih ta màm hi 'ràng am ca con cadrì aih. Con cadrì aih 'ràng am deh ca miq. 12 'Bài mangai hõc tiaq Jon lam trùh, yõc hanang Jon lam catùh. Khoi èh wì lam anoi ca Chuaq Jêxu.

*Chuaq Jêxu am Padam Ngõng Ngai Caq
(Mõc 6:3-44; Luc 9:10-17; Jon 6:1-14)*

13 Chuaq Jêxu bu tàng bàu aih, Haq cađac nòi aih loh ta bong, lam ta nòi ðùng hawit. Jò mangai jàn loq biác aih, wì loh enh 'bài phõq lam jènh tiaq Haq. 14 Haq cadiang loh enh bong, hnoq mangai jàn bəc hrìn, Haq xa-õch ta manoh, broq ca 'bài mangai ùh hrõc jah brêh.

15 Trùh chiù, mangai hõc tiaq thia haten jang Haq, wì doi: “Õi ta cô hawit, khoi xèq, xìn Thài am wì mùt ta 'bài plài rõt dahwèq caq.”

16 Chuaq Jêxu doi: “Ùh nhet ca wì haq ep hlài. Pì raq phai am ca wì haq caq.”

17 Mangai hõc tiaq tèo: “Nhèn i padam toq 'benh wa baiq pliang ca raq.”

18 Haq doi: “'Ràng ca wa 'benh ca Au cô.”

19 Haq thê wì ha'ngui ta nhat, khoi èh, yõc padam toq 'benh wa baiq pliang ca, ngoi ngan ta plình

manè pôi Boc Plình. Khoi èh goh 'benh am ca 'bài mangai hóc tiaq, mangai hóc tiaq am ca mangai jàn. ²⁰ Mangai leq caq ji panàc, tóch hlài rah haq jah 12 rajo. ²¹ 'Bài mangai caq jah 5.000 ngai, ùh tình gu cadri wa con 'yoh.

Chuaq Lam ti Riang Diac
(Mốc 6:45-56; Jon 6:15-21)

²² Khoi ca aih, Haq bahôiq mangai hóc tiaq tóc ta bong cwa pah tau adroi ca Haq, hi khoi Haq thê mangai jàn hlài. ²³ Jò wì khoi hlài, Haq tóc ta bôl wang waiq khàn mòi q ngai, trùh xèq. Haq xôq ôi ta aih mòi q Ngai. ²⁴ Jò aih bong khoi loh trùh 'ne diac raxìq, 'bìq diac raxìq lai laq tep taiq i cayeo hlôi dang lùl.

²⁵ Mahaq trùh jò ten 'ngah damang aih, Chuaq Jêxu lam ti riang diac trùh ti 'bài mangai hóc tiaq. ²⁶ Jò wì mangai hóc tiaq hnoq Haq lam ti riang diac, wì yùq crè cachech bàu dêh. Wì xoh aih kiac cachöc.

²⁷ Mahaq Chuaq Jêxu doi: “Catèm beq, apaq crè, cla Au cô.”

²⁸ Pêtrô doi: “Waiq Chuaq, tàng joq Ìh, xìn thê au lam ti riang diac trùh ta Ìh.”

²⁹ Chuaq tèo: “Lam ta cô beq.”

Pêtrô loh enh bong, cadiang lam ti riang diac trùh ti Chuaq Jêxu. ³⁰ Mahaq jò haq hnoq cayeo hlôi, Pêtrô crè, hlòp clih ta diac, haq cachech bàu dêh: “Chuaq ôi, xìn dèch au!”

³¹ Tajòl 'mòi Chuaq Jêxu hnhu tì rùp yóc haq, rai doi: “Ô mangai 'biaq manoh lùl, gleq ìh ma jah hèm ra'ngòt 'màng 'mat?”

³² Jò Haq wa Pêtrô khoi tồc ta bong, cayeo pi hlôi. ³³ 'Bàì mangai ôi ta bong thia trùh hacùn cràng cùh waiq Haq. Wì doi: “Chuaq ôi, Ìh joq 'nàng Con Boc Pình.”

³⁴ Jò khoi cwa pah tau, Haq wa mangai hóc tiaq tồc ta 'bò ôi ta gùng Gê-nê-sa-rê. ³⁵ Mangai ta nòi aih canao ca Haq, thê mangai lam anoi jàp gùng aih, wa 'ràng trùh ca Haq 'bàì mangai ùh hróc. ³⁶ Wì xìn Haq am wì bèq ha'mai eo Haq. Èh dìq ca 'bàì mangai ma bèq jah brêh.

15

Bìac 'Nheo Tì Adroi ca Acaq (Mốc 7:1-23)

¹ Khoi èh, i 'bàì mangai Pha-ri-si wa thài ranenh enh phòq Jê-ru-sa-lem, lam trùh ti Chuaq Jêxu, wì bòch Haq: ² “Gleq mangai hóc tiaq Ìh ùh broq bìac tiaq craq enh calah nèh, taiq wì haq ùh 'nheo tì adroi ca acaq?”

³ Haq padreo bàu doi: “Gleq pì ma cađac bàu thê Boc Pình, ma broq tiaq bìac da mangai calah nèh? ⁴ Ma jah 'màng aih Boc Pình khoi doi: ‘Pì ep iu dèh miq baq,’[✧] èh bìac cô hòm, ‘mangai leq hanip dèh miq baq, phai jêh haq cachit.’[✧] ⁵ Mahaq pì blòq hlài doi: ‘Bìac leq au jah jùp òò dèh miq baq, au khoi am ca Boc Pình. Mangai aih pì ep wèq ban dèh ca miq baq hòm.’ ⁶ 'Màng aih, taiq pì khoi broq bìac tiaq craq enh calah nèh, aih pì khoi cađac bàu Boc Pình. ⁷ Ô mangai bàu lem, manoh dù, khoi troq da Êsai mangai

✧ 15:4 15:4 LEA 20:12; RAH 5:16. ✧ 15:4 15:4 LEA 21:17; Lêwi 20:9.

capoch thai Boc Plình khoi doi adroi biac pì, haq doi:

⁸ “Jàn cô yǒc hacùng cùh waiq Au,
mahaq manoh wì haq hangai ca Au.

⁹ Biac wì haq cùh waiq Au aih 'ngwan,
ma jah 'màng aih wì haq hnài thê tiaq 'bǒi
ranenh con mangai broq loh. ☆”

¹⁰ Haq creo ca mangai jàn trùh ti Haq, èh doi
ca wì: “Pì tamàng beq, èh phai 'nì loq. ¹¹ Ûh xài
dahwèq caq leq mùt ta hacùng broq mangai ùh
hadròih, mahaq biac leq loh enh hacùng, biac
aih ma broq ca mangai ùh hadròih.”

¹² Mangai hǒc tiaq thia haten, bòch: “Ìh i loq,
'bài mangai Pha-ri-sí ùh lem ta manoh jò wì tàng
bàu cô?”

¹³ Haq padreo bàu doi: “Long leq Baq Au ǒi
ta Plình ùh pìt, ep bùiq đac. ¹⁴ Dôq da wì
haq 'màng aih raq. Wì haq aih mangai ùh xau
'nong trong ca mangai hadai ùh xau, òiq taclìh
ta ralùng.”

¹⁵ Pêtrô doi: “Xìn Thài anoi ro ca nhèn bàu
aliah aih.”

¹⁶ Chuaq Jêxu bòch: “Pì hadai 'nhòq 'nì tàng
'mòh? ¹⁷ Pì ma 'nhòq 'nì biac cleq mùt ta hacùng
clìh ta cliac, hi khoi ep 'noh đac 'mòh? ¹⁸ Mahaq
biac leq tǒc enh manoh hloh ti hacùng, aih ma
biac dù, biac aih ma broq mangai ùh hadròih.

¹⁹ Ma jah 'màng aih enh manoh hèm loh biac
dù, biac jêh đac mangai, tango anang, rê rùai,
atùng, bàu amòng wa bàu jù atùng. ²⁰ Aih biac
ma broq mangai ùh hadròih, mahaq biac acaq
ùh 'nheo tì, ùh broq ca mangai loh ùh hadròih.”

☆ 15:9 15:9 Êsai 29:13.

Mangai Gu Cadri Ca-na-an
(Môc 7:24-30; 8:1-10)

²¹ Chuaq Jêxu cađac nôi aih, mùt ta gùng Tirò wa Sidôn. ²² I mòiq ngai gu cadri Ca-na-an lam trùh creò bàu dêh: “Waiq Chuaq, Con Xau bùa Đawit, xìn xa-öch ca au ðìq. Con cadri au i kiac ôi ta chac. Haq 'bìq baxa ðìq jaq.”

²³ Mahaq Chuaq Jêxu ùh tèò nà leq. 'Bàì mangai hõc tiaq trùh ti Haq, doi: “Xìn Ìh thê gu cadri cô hlài beq, ma jah 'màng aih, haq tiaq creò yôt ca bèn.”

²⁴ Mahaq Chuaq doi: “Boc Plinh thê Au trùh toq ta 'bài con trùu lac ta Diac Is-ra-ên.”

²⁵ Mahaq gu cadri aih thia hacùn cràng enh ngìa ca Chuaq Jêxu rai doi: “Waiq Chuaq, xìn jùp ðò au ðìq.”

²⁶ Haq padreo hlài doi: “Ùh khòh yõc 'benh con caiq tèm ca 'bài coq con caq.”

²⁷ Gu cadri doi ca Haq: “Waiq Chuaq, joq 'nàng 'màng aih, mahaq 'bài coq con hadai jah caq 'benh ha'monh cìh enh ca'bõng craq haq.”

²⁸ Chuaq Jêxu doi: “Ô gu cadri tau, ìh i manoh lùì canòm càn, jah broq am tiaq troi manoh ìh ma enh.” Adrinh ca jò aih, con haq jah brêh.

Yàng Baiq, Chuaq Jêxu Broq 'Benh Loh Bàc

²⁹ Chuaq Jêxu lam enh aih trùh ta diac raxìq Ga-li-lê, khi òh tõi ta wang ha'ngui. ³⁰ I mangai jàn bàc lam trùh ti Haq, 'ràng 'bài mangai cwê, ùh xau, lâu, mangai pen wa bàc ngai hinìq tôq ma 'noiq, ðòiq jang jènìh Chuaq Jêxu. Èh Haq broq brêh ca wì ðìq ðõng. ³¹ 'Màng aih, wì

hamàih dìq jaq jò wì hnoq mangai làu khi jah capoch, mangai ngwenh jènh tì jah brêh, mangai pen jah lam, wa mangai ùh xau jah xau hnoq. Wì manè padèch Boc Plinh da mangai Is-ra-ên.

³² Chuaq Jêxu creò dèh ca 'bài mangai hóc tiaq trùh, Haq doi: “Au xa-öch ca mangai jàn cô, wì haq khi òi ti Au piq hì, manàiq pì i ca dahwèq caq. Au ùh enh òi wì hlài cliac dech, yùq wì pangot, wì hlat ti trong.”

³³ 'Bài mangai hóc tiaq tèò Haq: “Òi ta nòi hawit 'màng cô chaq 'benh ta leq ma panàc ca mangai bàc 'màng cô?”

³⁴ Chuaq Jêxu bòch: “Pì i toq leq toq 'benh?”

Wì doi: “Tapèh toq 'benh wa toq 'biaq pliang ca 'yoh.”

³⁵ Haq thê mangai jàn ha'ngui ta taneh. ³⁶ Hi khi, Haq yóc tapèh toq 'benh wa ca, manè pôi Boc Plinh, èh goh am ca mangai hóc tiaq, mangai hóc tiaq axong am ca jàn. ³⁷ Rìm ngai caq panàc. 'Benh òi i rah, tóch jah tapèh rojo. ³⁸ 'Bài mangai ma caq aih 4.000 ngai, ùh tình gu cadrì wa con 'yoh. ³⁹ Khi ca aih, Haq thê wì hlài. Khi èh, Haq tọc ta bong lam ta gùng Ma-ga-đan.

16

Wì Xìn Haq Broq Teo Halac

(Môc 8:11-13; Luc 12:54-56)

¹ 'Bài mangai Pha-ri-si wa mangai Sa-đu-sê trùh ti Chuaq Jêxu, xìn Haq broq teo halac enh plinh, ma jah 'màng aih wì i manoh enh thù Haq.

² Mahaq Haq tèò: “Trùh jò daxèq, pì doi: ‘Cô èh plinh tồq lem, ma jah 'màng aih pì hnoq plinh

gòh,' ³ èh jò daxroq, pì doi: 'Hì cô i mè prò, ma jah 'màng aih hnoq plình gòh blùc.' Pì loq hadro plình mè, plình tôq, gleq pì ma ùh 'nì hadro 'bài teo halac ta 'nhòng crông taneh? ⁴ Xinoi ngang dù, ùh wèq dèh bàu cô chaq teo halac, mahaq ùh am ca wì mòiq teo halac leq enh gùng ca teo halac da Jôna, mangai capoch thai Boc Plình." Hì khoi Haq loh lam enh wì.

⁵ Jò khoi cwa 'bò pah tau, 'bài mangai hóc tiaq hèt wê 'benh. ⁶ Chuaq Jêxu doi ca 'bài mangai hóc tiaq: "Phai hmàng ta manoh wa ngan kenh ca blo mangai Pha-ri-si wa Sa-đu-sê."

⁷ Mangai hóc tiaq bòch dabau doi: "Cô taiq bèn ùh wê 'benh."

⁸ Chuaq Jêxu loq ca wì hèm biac aih, Haq doi ca wì: "Ô mangai 'biaq manoh lùì, gleq pì ma hèm taiq pì ùh i ca 'benh? ⁹ Pì ma 'nhòq 'nì, 'nhòq hnoq, pì ùh hmàng, padam toq 'benh am 5.000 ngai caq, èh pì tóch hlài rah jah toq leq rajo? ¹⁰ Èh pì ahmàng tapèh toq 'benh am ca 4.000 ngai caq, pì tóch rah jah toq leq rajo? ¹¹ Gleq pì ma ùh 'nì tàng ùh xài Au enh anoi ca pì biac 'benh caq? Mahaq Au enh anoi ca pì ep ngan kenh blo mangai Pha-ri-si wa Sa-đu-sê." ¹² Khoi ca Haq doi bàu aih, wì men loq tàng, ùh xài Haq thê wì ngan kenh blo ma tah ta 'benh, mahaq ngan kenh bàu hnài da mangai Pha-ri-si wa Sa-đu-sê.

*Pêtrô Pa'noh Loh Chuaq Jêxu Joq Crich
(Môc 8:27-30; Luc 9:18-21)*

¹³ Jò Chuaq Jêxu trùh ta gùng Sê-sa-rê Philip, Haq bòch dèh mangai hóc tiaq: "Tiaq bàu wì doi, Con Mangai aih Cabô?"

14 Mangai hóc tiaq Haq tèo: “ 'Nah ngai doi: Jon 'Baptit. 'Nah ngai doi: Êli. Wì 'noiç hòm doi: Ìh Jê-rê-mi, loq mòiq ngai, mangai capoch thai Boc Plình ma 'noiç.”

15 Haq bòch wì: “Cla pì doi, Au Cabô?”

16 Simôn Pêtrô tèo: “Ìh Mangai Crich, Con Calô Boc Plình ma rìh hloi.”

17 Chuaq Jêxu doi ca haq: “Am xôq ramõt ca Ìh, Simôn con Jôna, ma jah 'màng aih biác cô ùh xài mangai patô ca ìh, mahaq Baq Au òi ta plình khoi mahno ca ìh. 18 Au hadai doi ca ìh: Ìh Pêtrô. Au jah broq Tagop Hadròih Au enh crông hmu cô, èh 'bài 'mang da Cwìang Ngang Dù ùh jah 'blêq Tagop Hadròih aih. 19 Au am ca ìh chà khwaq Diac Plình, biác leq ìh càt òi ta crông taneh, hadai jah càt òi ta Diac Plình, biác leq ìh ma dõih òi crông taneh, hadai jah dõih òi ta Diac Plình.” 20 Khoi èh, Haq ùh am dèh mangai hóc tiaq anoi ca mangai 'noiç loq ca Haq Crich, Con Calô Boc Plình.

21 Pàng aih, Chuaq Jêxu baxèm am ca 'bài mangai hóc tiaq loq, Haq ep lam trùh ta Jê-ru-sa-lem, ep chiùq 'bài craq broq gàu Yothaiç, 'bài pajàu càn wa 'bài thài ranenh baxa Haq, ep chiùq wì jêh đac, trùh hì piq, Haq jah rìh hlài.

22 Pêtrô 'ràng crài Haq lam ta kenh, doi ca Haq: “Chuaq ôi, Boc Plình leq manaq òiç Ìh 'màng aih, biác aih ùh trùh ca Ìh òh!”

23 Mahaq Chuaq Jêxu hwi ngan Pêtrô doi: “Ô kiác Satan, lùì òi enh rù ca Au beq! Ìh broq dua 'mèq am ca Au, ma jah 'màng aih ìh ùh hèm trùh

bìac Boc Plình, mahaq hèm trùh toq bìac con mangai.”

²⁴ Khoi èh Chuaq Jêxu doi dèh ca mangai hõc tiaq: “Tàng mangai leq enh tiaq Au, thê haq cađac dađeh, xùì long pagat lam tiaq Au. ²⁵ Ma jah 'màng aih, mangai leq enh dèch dèh can rìh jah hnhung, mahaq mangai leq cađac dèh can rìh tiaq Au, èh jah yõc hlài. ²⁶ Mangai leq, 'nhac ca haq jah nhàn yõc dìq ca crõng taneh, mahaq mahua yiang haq hnhung, i lòiq cleq? 'Màng aih èh haq yõc cleq ma wìa halìh yõc hlài dèh mahua yiang? ²⁷ Ma jah 'màng aih atiq cô èh, Con Mangai jah òi ti can 'ngah 'ngai Baq Haq lam trùh ta crõng taneh ti 'bài 'bình plình. Jò aih èh, Haq 'noh bìac baha ca tang ngai, wa baxa tang ngai, aih tiaq bìac cla wì haq broq.

²⁸ “Jòq 'nàng, Au doi ca pì, pì ma yòng jang cô, i tang ngai ùh cachit adroi jò wì hnoq Con Mangai trùh òi ta Diac Haq.”

17

Chuaq Jêxu Halìh 'Mù Dađeh (Mõc 9:2-13; Luc 9:28-36)

¹ Atiq ca tadràu hì, Chuaq Jêxu 'ràng Pêtrô wa Jacò, Jon oh Jacò tiaq Haq tõi ta wang ha'nhèq.

² Enh ngìa ca wì, Chuaq halìh 'mù, hadrò Haq canhia tìah ca mat mahì, eo Haq taboc ca-ah.

³ Wop jò aih wì hnoq Môise wa Êli capoch tùang ca Chuaq Jêxu.

⁴ Pêtrô doi ca Chuaq Jêxu: “Chuaq ôi, bèn òi ta cô lem dìq jaq, tàng lem manoh Ìh, au broq

piq toq ranòh ta cô, mòiq ca Ìh, mòiq ca Môise, mòiq ca Êli.”

⁵ Jò haq òi raq capoch, i yùc taboc ca-ah glom wì ta aih. I bàu enh yùc doi: “Cô Con Calô Au, Au loq waq ca Haq. Haq lem manoh Au rìm trong, ep iu bàu Haq.”

⁶ Jò tàng bàu aih wì pacro dadèh ta taneh, rai cùp gàu taiq yùq crè dìq jaq. ⁷ Chuaq Jêxu trùh haten, bèq mangai hóc tiaq doi: “Paq yùq, yòng beq!” ⁸ Jò wì ngoi ngan, pi i ca cabô enh gùng ca Chuaq Jêxu.

⁹ Jò wì haq loh enh wang, Chuaq Jêxu tanap ca wì: “Pì ùh khòh anoi hlài ca mòiq ngai leq bìac pì khi hnoq, gòm trùh jò Con Mangai cachit jah rih hlài.”

¹⁰ 'Bài mangai hóc tiaq bòch Haq: “ 'Màng aih hagleg thài ranenh doi: Êli phai trùh adroi?”

¹¹ Chuaq Jêxu tèo: “Joq Êli phai trùh, òòiq ha'naoq hlài rìm bìac. ¹² Mahaq Au doi ca pì: Êli khi trùh, mahaq wì ùh canao loq. Wì broq cađac ca haq rìm trong tiaq manoh wì enh. Con Mangai hadai phai chiuq jìq xa bàc ta tì wì aih èh.” ¹³ Jò aih 'bài mangai hóc tiaq men loq Haq anoi trùh Jon 'Baptit.

*Chuaq Hnan Drùh Can Kiac
(Mòc 9:14–29; Luc 9:37–43)*

¹⁴ Jò wì trùh hlài ta mangai bàc, i mòiq ngai con calô thia haten, hacùn cràng enh ngia ca Chuaq Jêxu, doi: ¹⁵ “Chuaq ôi, xa-öch ca con calô au mã troq kenh, haq xalep dìq jaq. Haq cro yôt ta ùnh wa ta diac. ¹⁶ Au khi 'ràng haq ca 'bài

mangai hóc tiaq Ìh, mahaq wì ùh jah broq brêh ca haq.”

¹⁷ Chuaq Jêxu tèo: “Ô xinoi manhài trài wa ùh i ca manoh lùì. Au ep ỏi ti pì trùh jò leq? Au ep chiuq àt ca pì trùh jò leq? 'Ràng con calô 'mat ca Au beq.” ¹⁸ Chuaq Jêxu lech ca kiac aih. Tajòi 'mòi jò aih, can kiac loh enh chac haq. Con calô brêh tajòi 'mòi jò aih raq.

¹⁹ Jò pi i ca wì 'noiç, 'bài mangai hóc tiaq trùh ti Chuaq Jêxu bòch hlep Haq: “Gleq nhèn ma ùh jah hnan drùh 'noh kiac?”

²⁰ Chuaq Jêxu tèo wì: “Taiq pì i manoh lùì 'yoh 'yit hrìn. Ma jah 'màng aih, Au doi ca pì joq 'nàng, tàng pì i manoh lùì jah ðeh toq clong habài, pì jah doi ca wang cô: Cwa tọc pah tau beq. Tajòi 'mòi wang cô cwa tọc pah tau. Ùh i biac cleq pì ùh broq jah.

²¹ “Enh hnan ðac can kiac 'màng cô, ep waiç khàn wa rôn ca acaq.”

Bìac Haq Cachit Èh Rìh Hlài

(Mốc 9:30-32; Luc 9:43-45)

²² Jò ỏi ta Ga-li-lê, Chuaq Jêxu doi ca wì: “Cô èh, Con Mangai 'bìç mùt ta tì wì. ²³ Èh wì jêh ðac Haq. Trùh hì piç, Haq rìh hlài.” 'Bài mangai hóc tiaq tàng bàu aih, wì loh ca mango ðiq jaq.

Bìac Am Thèq da Hnem Cùh Waiç

²⁴ Jò Chuaq Jêxu wa mangai hóc tiaq trùh ta Ca-bê-na-um, 'bài mangai gop thèq ta Hnem Cùh Waiç lam bòch Pêtrô: “Thài ìh ùh am thèq da Hnem Cùh Waiç 'mòh?”

²⁵ Pêtrô tèo: “Òq Haq am.”

Jò Pêtrô mùt ta hnem, Chuaq Jêxu bòch Haq adroi: “Simôn, ìh hèm 'màng leq? 'Bàì bùa crõng taneh gop thèq enh cabô, enh 'bài con cla wì, loq gop thèq enh wì Diac 'noiq?”

²⁶ Pêtrô tèo: “Enh mangai Diac 'noiq.”

Chuaq Jêxu doi ca haq: “'Màng aih 'bài con caiq da wì haq ùh ep am. ²⁷ Mahaq òoiq ùh hìaq broq ca wì catõih, ìh loh ta diac raxìq ca'nìh axai, yõc ca cap axai ma adroi, wah hacùng haq, i mòiq hliac 'bac. Yõc 'bac aih lam am thèq ca ba beq.”

18

Õi Diac Plình Cabô Yi Càn? (Mõc 9:33-37; Luc 9:46-48)

¹ Wop jò aih, 'bài mangai hõc tiaq Chuaq Jêxu trùh bòch Haq: “Cabô yi càn õi ta Diac Plình?”

² Haq creò ca mòiq ngai con 'yoh, òoiq haq yòng ta'ne wì. ³ Èh Haq doi: “Au doi ca pì joq 'nàng, tàng pì ùh cađac ðeh manoh broq tôiq wa wìh wìa tiàh ca con 'yoh cô, pì ùh jah mùt Diac Plình. ⁴ 'Màng aih mangai leq chiùq broq ha'neq tiàh ca con 'yoh cô, haq jah broq càn õi ta Diac Plình. ⁵ Mangai leq taiq hiniq Au nhàn con 'yoh cô, aih haq nhàn Au.

⁶ “Mahaq tàng mangai leq baxrùq ca mòiq ngai ta 'bài con 'yoh khi tiaq Au broq tôiq, ðang ca càt apao hmu jang ranõng haq, hwenh ca'nìh ðac haq ta diac raxìq yi lem. ⁷ Nan xa ca crõng taneh cô taiq biac broq loh ca mangai 'noiq catõih cro! Joq i ðeh biac broq ca mangai 'noiq catõih cro, mahaq nan xa am ca mangai leq

ma baxrùq ca mangai 'noiç catöih cro. ⁸ Tàng tì loq jènh ìh baxrùq ìh broq tôiq, coh hwenh đac ma hangai ca cla ìh beq, ma jah 'màng aih yöc ca ìh thiùq mòiq apah jènh, loq mòiq apah tì, mahaq jah mùt nòi can rìh hloi hloi, yi hnao ca tôm jènh tì, mahaq clìh ta 'bau ùnh hloi hloi. ⁹ Tàng mat ìh baxrùq ìh broq tôiq, 'bacsì hwenh đac ma hangai ca ìh beq, ma jah 'màng aih, mòiq apah mat, mahaq jah mùt nòi rìh halinh, yi hnao öi tôm baiç apah mat, mahaq mùt ta 'bau ùnh.

¹⁰ “Wèq dađeh oq, apaç khìn mòiq ngai 'yoh leq ta 'bài con 'yoh cô, ma jah 'màng aih, Au doi ca pì, 'bài 'bình plình da wì haq öi ta plình hloi hloi hnoq hadrò Baç Au. ¹¹ Mạ jah 'màng aih Con Mangai khi trùh đòiq dèch mangai ma hù hnhung.

¹² “Pì hèm 'màng leq, tàng mangai leq i mòiq hrinh toq trùu, èh mòiq toq lam lac, haq ma ùh đòiq đò 99 toq öi ta wang, èh haq lam chaq mòiq toq trùu ma lam lac 'mòh? ¹³ Joç 'nàng Au doi ca pì, jò mangai aih chaq hnoq trùu ma lac aih, haq lem bùi yi hnao ca hnoq 99 toq ùh hìaq lam lac. ¹⁴ Baç pì öi ta plình hadai 'màng aih. Haq ùh enh đòiq mòiq ngai leq ta 'bài con 'yoh cô hù hnhung.”

Bìac Trah Hatroq ca Mangai 'Noiç

¹⁵ “Tàng i mòiq ngai oh daç ìh broq lôi ca ìh, ìh patô da haq toq jò chòp baiç ngai raç. Tàng haq tamàng da ìh, ìh jah oh daç hlài. ¹⁶ Mahaq tàng haq ùh tamàng, ìh adràc tam mòiq loq baiç ngai lam ti ìh. ‘Nhò bàu baiç piç ngai anoi hlài,

rìm bàu da ìh wa mangai aih jah hagao cajap. ¹⁷ Tàng haq xôq ùh tamàng 'bài mangai aih, phai doi ca Tagop Hadròih. Tàng haq hadai ùh iu bàu mangai òi ta Tagop Hadròih, jò aih ngan haq tìah ca mangai ùh tiaq Boc Plình wa mangai gop thèq.

¹⁸ “Jòq 'nàng Au doi ca pì, bìac leq pì càt òi crông taneh, èh hadai càt òi ta Diac Plình. Bìac leq pì dõih òi ta crông taneh, èh hadai jah dõih òi ta Diac Plình.

¹⁹ “Jòq 'nàng, Au doi hòm ca pì, tàng baiq ngai ta pì mòiq manoh ca dabau òi ta crông taneh, ùh kè waiq xìn bìac cleq, Baq Au òi ta Diac Plình jah am ca wa. ²⁰ Ma jah 'màng aih nòi leq i baiq piq ngai canòm ca hiniq Au tagop dabau, Au òi ta'ne wì haq.”

²¹ Pêtrô thia haten bòch Chuaq Jêxu: “Chuaq ôi, jò oh daq au broq tôiq ca au, au ep baxõng tôiq ca haq toq leq yàng? I jòq trùh tapèh yàng ùh?”

²² Chuaq Jêxu tèo: “Au doi ca ìh, ùh xài trùh tapèh yàng, mahaq 70 yàng tapèh.

²³ “ 'Màng cô, Diac Plình tìah ca mòiq ngai bùa, enh tình sô dèh ca hapõng. ²⁴ Jò bùa baxèm tình, i mòiq ngai 'ràng ca haq mòiq ngai pòq bùa 10.000 talàng 'bac. ²⁵ Taiq haq ùh nui claih ca dòih, craq thê wì tech haq, tech cadrì con haq, tech diq ca cùng hang haq, òi q baxõng dòih.

²⁶ “Mahaq hapõng aih hacùng cràng enh ngìa ca bùa rai doi: ‘Xìn ìh òi q au baxõng ðeh adia, èh au baxõng diq ðõng.’ ²⁷ Bùa xa-õch ca haq, baxõng haq hlài, pi tình ca haq dòih.

²⁸ “Mahaq jò hapõng aih loh lam, haq hnoq mòiḡ ngai hapõng 'noiḡ pòḡ haq mòiḡ hrinh ðe-na-ri. Haq rùp hapõng aih it ranõng, rai doi: 'Baxõng da au dòih beḡ.’

²⁹ “Hapõng aih hacùn cràng xìn haq: ‘Xìn ðòiḡ au baxõng ðeh adia, èh au baxõng ðõng da ìh.’

³⁰ “Mahaq haq ùh chiùḡ. Haq xôḡ rùp hapõng aih tah ta hnem tù trùh jò baxõng ðõng da haq.

³¹ ‘Bai hapõng 'noiḡ hnoq biac aih, wì mango ðiḡ jaḡ. Wì anoi hlài ca bùa loḡ rìm biac aih.

³² “Bùa creo ca haq trùh doi ca haq: ‘Ô hapõng dù, au khoi caḡac dòih ca ìh taiḡ ìh khoi xìn au.

³³ Gleḡ ìh ùh xa-õch ðeh ca bua ìh, troi au khoi xa-õch ca ìh 'mòh?’ ³⁴ Bùa loh nòih ca haq, thê 'bai gòm tù rùp tah haq ta hnem tù baxa haq trùh jò leḡ haq ca'naih claih ca dòih aih.

³⁵ “Tàng pì ùh ðiḡ ca manoh baxõng tôiḡ ðeh ca oh daḡ, Baḡ Au òi ta Diac Pình hadai hadrah pì 'màng aih ðiḡ.”

19

Biac Õng Mai Caḡac ca Dabau (Mõc 10:1-12)

¹ Jò Chuaḡ Jêxu hnài khoi gêh ðiḡ ca bàu aih, Haq caḡac gùng Ga-li-lê, lam trùh ta gùng Juḡia, pah tau diac Jôḡan. ² Mangai jàn bàc tiaḡ Haq. Haq broḡ brêh ca wì ta aih.

³ Mangai Pha-ri-si thia haten. Wì bòch ðòiḡ thù Haq, doi: “Thài ôi, 'nhac ca biac càn loḡ biac 'yoh xôḡ jah caḡac mai joḡ ùh?”

⁴ Haq tèo wì: “Pì 'nhòḡ lah ðõc Sech Hadròih 'mòh? Bàu Chuaḡ achìh enh jò baxèm, Boc Pình

'khai broq gu calô wa gu cadri, '☆ 5 hi doi: "Taiq 'màng aih raq gu calô jah talah dèh enh miq baq, yùp pajùm dèh ti mai, èh wa baiq wìa mòiq chac.' ☆ 6 Pàng aih, wa pi xài baiq hòh, mahaq wìa mòiq chac. 'Màng cô, biac leq Boc Plình khi yùp pajùm, con mangai ùh jah lah."

7 Wì bòch: " 'Màng aih gleq Môise khi hnài doi: 'Gu calô am ca mai jàiq cađac, khi èh òiđi dèh mai lam.' "

8 Chuaq Jêxu tèo: "Taiq manoh pì cadoq, ma jah Môise am pì cađac mai, mahaq enh jò baxèm ùh 'màng aih. 9 Au doi ca pì: Mangai leq cađac dèh mai ùh xài taiq mai haq tango, khi èh haq yòc òn mai 'noiq, gu calô aih khi broq tòi q tango. Èh mangai leq ma yòc gu cadri òng haq khi cađac, haq hadai broq tòi q tango."

10 'Bai mangai hóc tiaq doi ca Haq: "Tàng biac òng mai 'màng aih, ùh yòc mai yi lem."

11 Chuaq Jêxu tèo wì: "Ùh xài rìm ngai jah nhàn yòc bàu cô, mahaq toq mangai Boc Plình khi am broq 'màng aih hêq! 12 I 'nah ngai ùh yòc mai taiq khi xa-ông ca wì haq 'màng aih. 'Nah ngai ùh yòc mai taiq cla to enh 'màng aih. 'Nah ngai ùh yòc mai taiq toq enh broq biac Diac Plình. Mangai leq nui nhàn biac cô khòh nhàn."

*Chuaq Jêxu Am Xôq ca Wì Con 'Yoh
(Môc 10:13-16; Luc 18:15-17)*

13 Khi èh wì 'ràng ca Chuaq Jêxu 'bài con 'yoh waq ca Haq òiđi tì ti chac wì wa waiq khàn ca wì haq. 'Bai mangai hóc tiaq lech ca wì.

¹⁴ Mahaq Chuaq Jêxu doi: “Đòiq 'bài wì con 'yoh trùh ti Au beq, apaq tạt wì haq, ma jah 'màng aih Diac Plình jah am ca mangai leq i manoh tìah ca 'bài con 'yoh 'màng cô.” ¹⁵ Khoi ca Haq đòiq tì ti chac wì con 'yoh, èh Haq loh lam.

*Mangai Gu Radam Padrồng Can
(Mốc 10:17-31; Luc 18:18-30)*

¹⁶ Jò aih i mòiq ngai thia bòch Chuaq Jêxu: “Thài ôi, au ep broq lem 'màng leq đòiq jah i can rìh hloi hloi?”

¹⁷ Chuaq Jêxu bòch haq: “Gleq ìh ma bòch Au bìac lem? Toq Boc Plình raq ma lem! Tàng ìh enh mùt rìh halình, ìh ep wèq ìq bàu thê.”

¹⁸ Gu radam aih bòch: “Bàu thê leq?”

Chuaq Jêxu tèo haq: “‘Apaq jêh đac mangai, apaq tango, apaq atùng, apaq capoch hlài amòng. ¹⁹ ep iu bàu miq baq, ✧ 'loq waq ca 'bài mangai ma haten hatia ca ìh, ✧ 'màng ca ìh loq waq ca dađeh.”

²⁰ Gu radam aih doi: “Bàu thê aih au khoi iu tiaq ìq, 'màng aih au ỏi thiùq cleq hòm?”

²¹ Chuaq Jêxu doi: “Tàng ìh enh lem rìm trong, phải lam tech đống cùng hang, am ca 'bài mangai pa beq, 'màng aih ìh jah i cùng hang canaq 'bac ỏi Diac Plình. Khoi èh lam tiaq Au.”

²² Jò gu radam tàng bàu aih, haq loh lam rai mango, taiq haq i bàc cùng hang.

²³ Khoi ca aih, Chuaq Jêxu doi ca 'bài mangai hõc tiaq: “Au doi ca pì joq 'nàng, mangai padrồng, xa ca jah mùt Diac Plình. ²⁴ Au doi

✧ 19:19 19:19 LEA 20:12-16; RAH 5:16-20. ✧ 19:19 19:19 Lêwi 19:18.

tam ca pì hòm, lǒcđã chiu cloh jrùm xùang yi hnao ca mangai padrǒng mùt Diac Boc Plình.”

²⁵ Jò 'bài mangai hǒc tiaq tàng biac cô, wì hamàih òiq jaq, bòch: “'Màng aih, cabô jah dèch?”

²⁶ Chuaq Jêxu ngan wì, èh Haq doi: “Biac cô, mangai broq ùh jah, mahaq Boc Plình broq jah òiq dǒng.”

²⁷ Pêtrô tèo Haq: “Nhèn khoi cađac dǒng rìm biac òiq tiaq Ìh, 'màng aih nhèn jah cleq?”

²⁸ Chuaq Jêxu doi ca wì haq: “Au doi bàu joq 'nàng ca pì ma khoi tiaq Au, jò 'nhòng ma neo, aih jò Con Mangai ha'ngui dèh ta gèq bùa 'ngah 'ngai, pì hadai jah ha'ngui 12 toq gèq bùa, hadrah 12 'bôq Is-ra-én. ²⁹ Mangai leq taiq hiniq Au, ma khoi cađac dèh miq baq, oh daq, con caiq, nòi hnem, taneh, mangai aih jah nhàn hlài bình hrinh phàn haq ma khoi cađac, wa jah i can rìh hloi hloi. ³⁰ Mahaq i bàc ngai manàiq cô ǒi adroi, jah wìa loh ca atìq. Yǒc ca mangai manàiq ma ǒi atìq, èh wì jah atǒc adroi.”

20

Bàu Aliah ca Wùan Plì Nho

¹ “Ma jah 'màng aih Diac Plình tìah ca mòiq ngai craq tau, i wùan nho. Xrǒih xroq haq lam chaq 'bài mangai broq ca haq ta wùan nho. ² Jò haq khoi tèo ca baha wì mòiq ngai mòiq òi-na-ri, haq thê wì mùt broq ta wùan nho haq.

³ “Hachìn jò daxroq, haq loh chaq hnoq 'bài mangai 'noi q ǒi roc chòq ùh i ca biac broq. ⁴ Haq doi ca wì: ‘Pì hadai mùt broq ta wùan nho au

beq, èh au baha pì troq jaq. Tajòì 'mòi wì mùt broq.'

⁵ “Èh enh 12 jò trùh piq jò, haq loh lam hòh, hadai broq 'màng aih. ⁶ Khoi ca aih, trùh padam jò daxèq, haq loh lam hòh xôq hnoq 'bài mangai òi dech. Haq bòch wì: ‘Gleq pì ma yòng yôt ta cô xèq ca hì ùh broq jiang cleq 'mòh?’

⁷ “Wì tèo haq: ‘Taiq ùh i ca mangai bòch nhèn broq.’

“Haq doi ca wì: ‘Pì hadai mùt broq ta wùan au beq.’

⁸ “Trùh xèq, cla craq wùan nho doi ca mangai ma gòm ngan wì broq: ‘Creo ca wì ma broq trùh, am da wì haq cùng. Baxèm am ca mangai ma neo broq, trùh mangai ma adroi.’

⁹ “ ‘Bài mangai ma broq enh padam jò trùh, nhàn mòi q ngai mòi q đê-na-ri 'bac. ¹⁰ Khoi èh, trùh 'bài mangai haq ma creo mùt broq adroi ca aih. Wì xoh jah yi bàc, mahaq dìq ca wì haq hadai nhàn mòi q ngai mòi q đê-na-ri. ¹¹ Jò wì haq khoi nhàn, wì mamùc ca craq wùan nho. ¹² Wì doi: ‘Bài mangai mùt atìq cô, wì broq bu mòi q jò ðùng hô. Ìh xôq baha wì da-adàng ca nhèn, aih 'bài mangai broq ma yi lep tèn h tôq xèq ca hì.’

¹³ “Mahaq craq aih tèo mòi q ngai ta 'bài wì haq: ‘Ô bua, au ùh broq ca ìh ùh ta-atoq, ma ùh xài ìh khoi mòi q manoh ca au baha ìh mòi q đê-na-ri 'mòh? ¹⁴ Yóc da ìh 'bac cô, èh lam beq. Au enh am ca mangai ma atìq cô toq au khoi am ca ìh dìq. ¹⁵ Cùng hang da au, au enh ca'naih ca

mangai leq hi mac ca da au. Ìh i manoh tarènh taiq manoh au khôn khaoq 'mòh?'

¹⁶ “'Màng aih, 'bài mangai atìq jah adroi, mangai adroi jah atìq.”

*Chuaq Jêxu Doi Adroi Bìac Nan Xa ca Haq
(Mốc 10:32-34; Luc 18:31-34)*

¹⁷ Jò Chuaq Jêxu 'nang lam ti trong tọc Jê-ru-sa-lem, Haq 'nong crài dèh 12 ngai hóc tiaq lam ti Haq, rai lam Haq doi ca wì: ¹⁸ “Cô èh bèn tọc Jê-ru-sa-lem, Con Mangai ep ðòiq wì rùp am ca 'bài pajàu càn wa 'bài thài ranenh. Wì jah tình ca jêh đac Haq. ¹⁹ Wì 'ràng Haq am ca mangai jàn 'noi q ðòiq wì hanip Haq, lê Haq, blai Haq, hi khoi tiang ðình Haq ta long pagat. Trùh hì piq Haq jah rìh hlài.”

*Bàu Xìn da Miq Baiq Toq Con Calô
(Mốc 10:35-45)*

²⁰ Khoi èh, mai Xê-bê-đê 'ràng dèh 'bài con calô thia haten ca Chuaq Jêxu, hacùn cràng.

²¹ Chuaq bòch haq: “Ìh enh bòch cleq?”

Haq doi: “Xìn Ìh am ca wa con calô au, mòi q ngai ha'ngui pah 'ma, mòi q ngai ha'ngui pah 'ngeo ca Ìh ta Diac Ìh.”

²² Chuaq Jêxu doi: “Ìh ùh 'nì ca dađeh xìn bìac cleq. Chòp anui ôq doi chrõng Au ôq ùh?”

Wa tèo: “Ma nui.”

²³ Chuaq Jêxu doi ca wa: “Jòq 'nàng chòp jah ôq doi chrõng Au, mahaq ha'ngui pah 'ma loq pah 'ngeo Au, aih jah am toq ca mangai leq Baq khoi padon am.”

²⁴ Jò 12 'bài mangai hỏc tiaq tau tàng wa bỏch biac aih, wì loh nòih ca wa oh daq. ²⁵ Chuaq Jêxu creo ca wì mangai hỏc tiaq trùh, Haq doi: “Pì loq 'bài bùa jàn 'noiq panan jàn thê wì tiaq dađeh. 'Bài cwan canòm dềh ca cwìang padit padiang ca jàn. ²⁶ Mahaq, pì ùh 'màng aih. Mangai leq enh broq càn, ep broq hapỏng pì. ²⁷ Mangai leq enh broq gàu, ep broq hapỏng ma yi 'yoh hòm. ²⁸ 'Màng aih, Con Mangai khoi trùh, ùh xài đòiq wì patih ca Haq, mahaq Haq patih ca wì, èh Haq am dềh can rìh đòiq rỏt dềch bằc ngai.”

*Baiq Ngai Ûh Xau ta Phỏq Jê-ri-cô
(Mỏc 10:46-52; Luc 18:35-43)*

²⁹ Jò Chuaq Jêxu wa mangai hỏc tiaq Haq loh enh phỏq Jê-ri-cô, i mangai jàn bằc tiaq Haq. ³⁰ I baiq ngai, mangai ùh xau ỏi ti trong. Jò wa tàng wì doi i Chuaq Jêxu lam trong aih, wa creo bàu dềh: “Waiq Chuaq, Con Xau Đawit, xìn xa-ỏch ca ma đìq!”

³¹ 'Bài mangai ta aih lech ca wa, thê wa hatenh, mahaq wa creo yi dềh hòm: “Waiq Chuaq, Con Xau Đawit, xìn xa-ỏch ca ma đìq!”

³² Chuaq Jêxu yỏng, creo ca wa, doi: “Chỏp enh Au broq ca chỏp biac cleq?”

³³ Wa tềo: “Waiq Chuaq, xìn am mat ma jah xau hnoq!”

³⁴ Chuaq Jêxu xa-ỏch ca wa. Haq bềq mat wa. Tajòì 'mòì wa xau hnoq wa lam tiaq hloi Haq.

21

*Wì Đìh Yỏc Chuaq Jêxu Mùt Jê-ru-sa-lem
(Mỏc 11:1-11; Luc 19:28-40; Jon 12:12-19)*

¹ Jò Chuaq Jêxu wa mangai hỏc tiaq lam ten trùh phỏq Jê-ru-sa-lem, ỏi ta plài 'Bê-t-pha-jê, haten ca wang Ôliu, Haq thê baiq ngai hỏc tiaq lam, ² doi ca wa: “Chỏp lam trùh ta plài enh ngìa chỏp beq, ềh chỏp jah hnoq mòiq toq lùu can wa con haq cật ðòi q ti aih, chỏp ca'naih ðuì 'ràng ca Au beq. ³ Tàng i cabô bỏch chỏp broq cleq, doi ca haq: Chuaq nhet ca wa haq. Tajòì 'mòi haq jah am ca chỏp.”

⁴ Jah i biac cô ðòi q broq xít bàu mangai capoch thài Boc Plình khoi doi:

⁵ “Doi ca mangai Siôn loq, Ngan cô:

‘Bùa ìh trùh ta ìh,
Haq ùh padềch ðađềh, còi lùu con,
aih con ða lùu can.’✧”

⁶ Wa mangai hỏc tiaq aih lam broq tiaq bàu Haq khoi tanap. ⁷ Wa 'ràng lùu can wa con haq, hẻch ðềh eo enh crỏng lùu, ðòi q Chuaq Jêxu tỏc ha'ngui ti eo. ⁸ 'Bài mangai bàc ðì q jaq lẻh ðềh eo hẻch ti trong, ềh i 'nah ngai coh hla hẻch ti trong. ⁹ Mangai jàn ma lam adroi wa wì ma lam atì q cachech bàu ðềh doi:

“Hỏ-sa-na Con Bùa Đawit.”

“Đang ca manề am ca Haq canòm ca hiniq Chuaq lam trùh.”✧

“Hỏ-sa-na ỏi ta nòi ðì q jaq ha'nhềq.”

¹⁰ Jò Chuaq Jêxu mùt ta Jê-ru-sa-lem, ðì q ca phỏq aih rềo tagràng tagrật, bỏch dabau: “Mangai cô cabô?”

11 Bàc ngai padreo bàu doi: “Aih Chuaq Jêxu, Mangai Capoch Thai Boc Plình enh phôq Na-xa-ret, gùng Ga-li-lê.”

Chuaq Hnan Mangai Padre

(Môc 11:15-19; Luc 19:45-48; Jon 2:13-22)

12 Chuaq Jêxu mùt ta Hnem Cùh Waiq, hnan dǒng 'bài mangai padre ta aih, hacúp đac ca'bǒng mangai halih 'bac, èh gèq mangai tech chìm trù. 13 Haq doi ca wì: “I bàu khi achi: ‘Hnem Au jah creó hnem waiq khàn,’[☆] mahaq pì khi broq hnem cô loh ‘còp da mangai atùng!’[☆]”

14 Jò aih, 'bài mangai ùh xau mat wa mangai pen lam trùh ti Haq ta Hnem Cùh Waiq. Haq broq brêh ca wì. 15 Mahaq jò 'bài pajàu càn wa thài ranenh hnoq biac halac Haq broq, èh wì tàng bàu con 'yoh cachech ta Hnem Cùh Waiq: “Hô-sa-na Con Xau Bùa Đawit,” wì loh nòih diq jaq.

16 Wì doi ca Haq: “Ìh i tàng bàu 'bài con 'yoh cô doi cleq ùh?”

Chuaq Jêxu tèo: “Au tàng, mahaq pì 'nhòq đóc Sech Hadròih 'mòh?

“Chuaq jah hacùng 'bài con 'yoh wa con nga, i bàu manè padèch Haq.’[☆]”

17 Khi èh, Haq cađac wì, loh enh gùng ca phôq, mùt ta plài 'Bê-tha-ni ǒi padài damang ta aih.

18 Xrǒih xroq, jò hlài ta Jê-ru-sa-lem, Haq pangot. 19 Jò hnoq mòiq toq long póc ǒi ti trong, Haq thia haten, mahaq hnoq toq hla. Haq doi ca

☆ 21:13 21:13 Êsai 56:7. ☆ 21:13 21:13 Jêr 7:11. ☆ 21:16 21:16 BCP 8:2.

long pǒc aih: “Gè pi jò leq loh plì hòm.” Tajòi 'mòi long pǒc aih croh.

²⁰ Mangai hǒc tiaq hnoq biác aih, wì hamàih, rai doi: “Gleq long pǒc croh ma renh 'màng cô.”

²¹ Chuaq Jêxu tèo: “Joq 'nàng Au doi ca pì: Tàng i manoh lùì, ùh ra'ngòt, ùh xài pì broq jah toq biác ma khi broq ca long pǒc 'mat, mahaq tàng pì thê wang cô: ‘Dèch dađeh, ca'nìh ta diac raxìq beq,’ biác aih pì broq jah. ²² Jò pì waiq khàn, pì yǒc manoh lùì Au, xin biác cleq ùh kè, òiq jah am ca pì.”

Cwìang Itai Da Chuaq Jêxu
(Mǒc 11:27-33; Luc 20:1-8)

²³ Chuaq Jêxu khi mùt ta Hnem Cùh Waiq. Jò Haq 'nang hnài Bàu Lem, i 'bài pajàu càn wa 'bài craq broq gàu Yothaiq thia haten bòch Haq: “Thài ôi! Ìh yǒc cwìang enh leq broq biác cô? Cabô am ca Ìh cwìang itai aih?”

²⁴ Chuaq Jêxu tèo: “Au hadai bòch pì mòi q biác, tàng pì tèo jah, Au hadai doi ca pì loq Au yǒc cwìang enh leq broq biác cô. ²⁵ Biác 'baptem da Jon ma broq loh enh leq, enh plình loq enh con mangai?”

Wì hatình ca dabau: “Tàng bèn doi: ‘Loh enh plình,’ èh Haq doi ca bèn: ‘Gleq ùh lùì biác aih?’

²⁶ Mahaq tàng bèn doi: ‘Loh enh con mangai,’ bèn crè ca jàn, ma jah 'màng aih wì òiq đồng doi Jon, haq mangai capoch thai Boc Plình.”

²⁷ Khi èh, wì haq tèo: “Nhèn ùh 'nì.”

Chuaq Jêxu doi ca wì: “Au hadai ùh doi ca pì loq, Au yǒc cwìang enh leq broq biác cô.”

Bàu Aliah Baiq Ngai Con Calô

28 “Pì hèm 'màng leq? Mòiq ngai aih i baiq ngai con calô. Haq doi dèh ca con ma adroi: ‘Con ôi, hì cô con loh broq ta wùn nho oq.’

29 “Con aih tèo: ‘Au ùh enh lam broq!’ Mahaq atiq ca aih, haq hèm ùh khwài, hi khoi haq lam broq.

30 “Hi khoi, haq lam trùh dèh ti con ma tia, hadai haq doi 'màng aih. Con aih tèo haq: ‘Au lam oq!’ Mahaq haq ùh lam broq.

31 “Wa baiq ngai aih, con leq ma broq tiaq dèh manoh baq?”

Wì tèo: “Con ma adroi.”

Chuaq Jêxu doi ca wì: “Jòq 'nàng au doi ca pì, 'bài mangai gop thèq wa 'bài mangai gu cadrì tango yǒc 'bac, jah mùt Diac Boc Plinh adroi ca pì. 32 Ma jah 'màng aih Jon khoi tiaq trong ta-toq trùh ti pì, mahaq pì ùh lùì haq. 'Bài mangai gop thèq wa 'bài mangai gu cadrì tango yǒc 'bac khoi canao loq dèh ca tôiq lôì, èh cađac, hi lùì Haq. Pì khoi hnoq bìac aih, xôq ùh chiuq cađac dèh tôiq lôì òiq lùì Haq.”

Bàu Aliah Bìac Mangai Pìt Nho

(Mǒc 12:1-12; Luc 20:9-19)

33 “Pì tamàng bàu aliah 'noi q hòm. I mangai aih pìt mòiq wùn nho, pagông hmu dudan broq pagia. 'Ne wùn haq chĩa hàm òiq padit plì nho. Hì khoi, haq broq mòiq toq hnem gòm ha'nhèq. Èh haq am ca 'bài mangai ma abroq, pachac ca haq broq caq axong. Cla haq lam gùng 'noi q. 34 Trùh jò gich plì, haq thê dèh hapǒng lam bòch mangai ma broq wùn òiq yǒc plì.

35 “ 'Bàì mangai broq wùn nho rùp 'bàì hapǒng aih, 'nah ngai wì blai, 'nah ngai wì jêh đac, 'nah wì tèm hmu jêh đac. 36 Craq wùn aih thê hòm dèh 'bàì hapǒng 'noiq yì bàc ca 'bàì hapǒng yàng adroi, èh wì broq ca 'bàì hapǒng aih tiàh ca 'bàì hapǒng yàng adroi. 37 Yàng ma atìq dǒng, craq aih thê dèh con calô lam trùh ti wì, haq doi: 'Wì jah iu con calô au.’

38 “Mahaq jò 'bàì mangai pìt nho hnoq con calô aih, wì doi ca dabau: ‘Mangai cô raq mangai hatìa. Manàiq beq bèn jêh đac haq, èh bèn yǒc xǒxech haq.’ 39 Wì rùp con calô aih hwenh 'noh enh gùng ca wùn nho, jêh đac.

40 “ 'Màng aih, jò cla craq wùn nho trùh, haq tình ca 'bàì mangai ma broq wùn nho aih 'màng leq?”

41 Wì tèo Chuaq Jêxu: “Cla craq aih trùh jêh cachìt 'bàì mangai ngang dù aih, hi am ca mangai 'noiq mùan wùn haq, aih 'bàì mangai ma jah am pìi ca craq jò i pìi.”

42 Chuaq Jêxu doi ca wì: “Pì 'nhòq lah đóc bàu ta Sech Hadròih 'mòh?

“ 'Piang Hmu mangai thòq ma khai đǒih đac,

hmu aih jah wìa Hmu gàu mùm hnem,

aih biac Chuaq broq,

aih biac halac jang ngìa bèn, pì ùh 'nì 'mòh?’ ☆

43 “Taiq 'màng aih, Au doi ca pì, Diac Boc Pình jah yǒc khai ca pì, am ca jàn ma 'noiq, aih jàn loh pìi lem da Diac aih. 44 Mangai leq cìh troq Hmu aih jah padit hech, mangai leq 'bìq Hmu aih tùc, jah hech hoch tiàh ca blo.”

☆ 21:42 21:42 BCP 118:22,23.

⁴⁵ 'Bàì pajàu càn wa mangai Pha-ri-si tàng bàu aliah aih, wì loq Chuaq Jêxu doi bàu aih patô wì haq. ⁴⁶ Wì chaq trong rùp Chuaq, mahaq crè ca jàn, ma jah 'màng aih jàn doi, Haq mangai capoch thai Boc Plình.

22

Bàu Aliah Biac Ban Ông Mai (Luc 14:15-24)

¹ Chuaq Jêxu hnài hòm wì xam bàu aliah, Haq doi: ² “Diac Plình tiàh ca mòiq ngai bùa ma broq hiniang ta'nèp am con calô haq. ³ Bùa thê dèh hapǒng lam doi ca 'bài mangai haq khi akhen, thê wì trùh caq hiniang, mahaq wì ùh waq trùh.

⁴ “Bùa thê hapǒng ma 'noi q hòm lam, haq tanap: ‘Doi ca 'bài mangai Au ma khi akhen ca wì caq hiniang, 'màng cô: Hiniang khi padon gèh. Khi broq jam 'bo wa jam 'bo con bech. Hiniang khi padon gèh. Xìn pì lam caq oq.’

⁵ “Mahaq wì ùh tamàng. Mòiq ngai lam mòiq trong, mangai cô lam ta ðùng, mangai tau lam atech. ⁶ I 'bài mangai 'noi q rùp hapǒng bùa, blai wì, khi èh jêh đac. ⁷ Bùa loh nòih ðiq jaq, thê lình haq lam jêh đac wì mangai dù aih wa bùh cađac phôq wì.

⁸ “Khi ca aih bùa doi dèh ca 'bài hapǒng: ‘Hiniang khi padon, mahaq 'bài mangai ma khi akhen ùh đang ca caq hiniang cô. ⁹ 'Màng cô, thê pì loh lam òi ti trong càn ta phôq, ùh kè ca glàm mangai leq, khi wì lam trùh ta cô caq hiniang ta'nèp.’ ¹⁰ Hapǒng haq lam jàp trong phôq, ti gop ðiq ca 'bài mangai wì ma glàm, ùh

kè ca mangai 'màng leq, mangai lem loq mangai dù. Wì ha'ngui bình ca hñem caq hiniang ta'nèp.

¹¹ “Bùa mùt ngan mangai caq hiniang, hnoq mòiq ngai ùh caxùnh eo hiniang ta'nèp. ¹² Haq doi ca mangai aih: ‘Ê ôi, gleq ìh mùt ta cô ùh caxùnh eo hiniang ta'nèp?’ Mangai aih ùh tèo.

¹³ “Bùa thê dèh 'bài hapông: ‘Rùp càt jènh tì haq beq, cađac haq enh gùng nòi clam clôiq, aih nòi hmoi crò wa cadrit hanenh.’

¹⁴ “Ma jah 'màng aih i bàc mangai khoi jah creo, mahaq toq 'biaq ngai ma jah ràih.”

Bìac Am Thèq ca Sêsa

(Mốc 12:13-17; Luc 20:20-26)

¹⁵ Khoi èh 'bài mangai Pha-ri-si pađim ca dabau, chaq trong òoìq bahlac Chuaq Jêxu ta bàu capoch da Haq. ¹⁶ Wì thê dèh mangai hóc tiaq, wa toq 'biaq ngai, mangai tiaq bùa Hêrôt, lam bòch Chuaq: “Thài ôi, nhèn loq Ìh Mangai da bìac joq 'nàng, hñai wì trong Boc Plình joq 'nàng, ùh gen can mangai leq. ¹⁷ 'Màng aih, xìn Ìh am nhèn loq: Khòh am thèq ca bùa Sêsa loq ùh?”

¹⁸ Chuaq loq ca manoh 'mèq da wì Haq, doi: “Ôi 'bài mangai bàu lem, manoh dù, gleq pì ma thù Au? ¹⁹ Am ca Au ngan mòiq hliac 'bac.” Wì am ca Haq mòiq hliac 'bac. ²⁰ Haq doi ca wì: “'Mù cô 'mù cabô? Hiniq cô hiniq cabô?”

²¹ Wì doi: “Hiniq wa 'mù Sêsa.”

Chuaq Jêxu doi ca wì: “Thê pì am ca Sêsa bìac leq da Sêsa, am ca Boc Plình bìac leq da Boc Plình.”

²² Jò tàng bàu aih, wì hamàih ta manoh loh lam.

Bìac Rìh Hlài
(Mồc 12:18-27; Luc 20:27-40)

²³ Trom hì aih, i mangai Sa-đu-sê, aih mangai ma doi, ùh i ca can rìh hlài, lam haten ca Chuaq Jêxu bôch: ²⁴ “Thài ôi, Môise i doi: Tàng i mangai cachit, mahaq ùh i ca con, 'màng cô oh mangai aih, phai yôc mai daq haq ðoìq jah i con, hi wèq xinoi wì haq. ²⁵ 'Màng cô, i tapèh ngai oh daq. Mangai daq yôc mai, khoi èh haq cachit, mahaq ùh i ca con. Haq ðoìq hlài dèh mai dèh ca oh. ²⁶ Oh haq hadai cachit, diq ca wì oh daq, tapèh ngai cachit dǒng. ²⁷ Khoi èh, mangai cadrì aih hadai cachit. ²⁸ 'Màng aih, jò rìh hlài, mangai cadrì cô broq mai cabô ǒi ta wì tapèh ngai oh daq, ma jah 'màng aih diq ca wì khoi broq ǒng haq?”

²⁹ Chuaq Jêxu tèo haq: “Pì khoi lac trong, taiq pì ùh loq ca Sech Hadròih, hadai ùh 'nì ca cwàng itai Boc Plình 'màng leq? ³⁰ Ma jah 'màng aih jò wì rìh hlài, pi i ban ǒng mai, mahaq 'bài mangai ma jah rìh hlài, tìah ca 'bình plình ǒi ta plình. ³¹ Pì ùh lah đốc bàu Boc Plình khoi anoi bìac rìh hlài enh mangai cachit 'mòh? ³² 'Au Boc Plình da Ap-ra-ham, Boc Plình da Isac, Boc Plình da Jacôp.’☆ Boc Plình, ùh xài Boc Plình da mangai cachit, mahaq da mangai rìh.”

³³ Wì mangai bacc tàng bàu aih, wì hamàih ta manoh bìac hnài da Haq.

Ranenh ma Yi Nhet
(Mồc 12:28-34; Luc 10:25-28)

³⁴ Mangai Pha-ri-si tàng doi Chuaq Jêxu broq ca 'bài Sa-đu-sê pi i ca trong jah tèo Haq. Wì

☆ 22:32 22:32 LEA 3:6.

tagop dabau. ³⁵ I mòiḡ ngai thài ranenh ỏi ta wì bòch bàu cô ðòiq thù Chuaq:

³⁶ “Thài ôi, ỏi ta Ranenh, bàu thê leq ma yi nhet?” ³⁷ Chuaq Jêxu tèo Haq: “ Ìh phai ðìḡ ca manoh, ðìḡ ca mahua yiang, ðìḡ ca manoh hèm, loḡ waḡ ca Boc Plình, aih Boc Plình ìh.”[☆]

³⁸ Aih bàu thê baxèm adroi wa yi nhet ðõḡ ðìḡ.

³⁹ Hadai 'màng aih, bàu thê baiḡ 'màng cô: “Thê ìh loḡ waḡ ca mangai haten hatìa tìaḡ ca ìh loḡ waḡ ca ðaḡeh.”[☆] ⁴⁰ ðìḡ ca Sech Ranenh, wa Bàu Mangai Capoch Thai Boc Plình, hadai loh enh baiḡ bàu thê aih.”

*Chuaq Jêxu Con Xau Bùa Đawit
(Mõc 12:35-37; Luc 20:41-44)*

⁴¹ Jò wì mangai Pha-ri-si tagop ti dabau, Chuaq Jêxu bòch wì: ⁴² “Chuaq Crich, pì hèm 'màng leḡ? Haq Con cabô?” Wì tèo: “Haq Con Xau bùa Đawit.”

⁴³ Chuaq Jêxu doi ca wì haq: “Tàng 'màng aih, gleḡ bùa Đawit nhò Yiang Hadròih creò Crich, Chuaq. Haq doi:

⁴⁴ “ ‘Chuaq doi ca Chuaq au:

“Ìh ha'ngui ti pah 'ma Au beḡ,
trùḡ jò Au ðòiq wì ma git ca ìh
enh 'neḡ ca jènh ìh.”[☆]

⁴⁵ 'Màng aih, tàng Đawit creò Haq Chuaq, 'màng leḡ Haq jah Con Xau bùa Đawit?” ⁴⁶ Ìh mangai leḡ jah tèo Haq. Pàng hì aih, pì i mangai leḡ hùa bòch Haq hòm.

[☆] **22:37** 22:37 RAH 6:5. [☆] **22:39** 22:39 Lêwi 19:1. [☆] **22:44** 22:44 BCP 110:1.

23

Chuaq Jêxu Trech Mangai Pha-ri-si

(Môc 12:38-40; Luc 11:39-44,46-52; 20:45-47)

¹ Khoi êh, Chuaq Jêxu doi ca mangai jàn wa mangai hóc tiaq Haq: ² “ 'Bàì thài ranenh wa mangai Pha-ri-si yóc cwàng Môise òiôq hnài jàn. ³ 'Màng aih, thê pì iu wa broq tiaq òiô ca bàu wì ma hnài, mahaq ùh thê pì tiaq dua bìac wì haq broq, ma jah 'màng aih, wì doi, mahaq ùh broq tiaq. ⁴ 'Bàì aih thê mangai broq lep, pòq trap, mahaq cla wì ùh enh òùng trùh mòiq hadrang tì.

⁵ “Wì haq broq bìac leq xôq waq ca mangai 'noiô hnoq. I 'balet tah bàu enh Sech Hadròih da wì haq waq ca yi càn, caxi ha'mai cõng eo lè da wì haq xôq cadrai yi yôh. ⁶ Jò caq hiniang, wì haq loq enh ha'ngui gèq ti gàu ca'bõng wa ha'ngui tì nòi yi ha'nhèq òi ta hnem tagop, ⁷ enh wì chao dađeh 'ne chòq, wa enh wì creo ca dađeh thài.

⁸ “Mahaq, pì apaq thê mangai leq creo ca pì thài, ma jah 'màng aih pì i mòiq toq Thài, wa òiô òng ca pì broq oh òaq. ⁹ Òi ta cõng taneh, apaq creo ca mangai leq baq, ma jah 'màng aih pì i mòiq toq Baq, òi ta plinh. ¹⁰ Hadai apaq thê mangai leq creo ca pì craq, ma jah 'màng aih pì i mòiq toq Craq, aih Chuaq Jêxu Crich. ¹¹ Cabô broq càn òi ti pì, mangai aih ep broq hapõng pì. ¹² Mangai leq padèch dađeh, èh haq 'bìô ha'neq, mangai leq broq 'yoh èh jah dèch haq ha'nhèq.

¹³ “Nan xa am ca pì 'bài thài ranenh wa mangai Pha-ri-si. Pì mangai bàu lem, manoh dù, taiq pì clenh 'màng Diac Plinh enh ngĩa ca wì, èh pì ùh

mùt, hadai ùh am ca mangai 'noiç mùt. ¹⁴ Nan xa am ca pì 'bài thài ranenh wa mangai Pha-ri-si, bàu lem, manoh dù, pì waiç khàn dùnh òiç bahlèp biac padô 'nùt 'bài gu cadri hadrô, òiç hi yõc atùng hnem wì, 'màng aih pì ep chiùç can baxa yi hlàm.

¹⁵ “Nan xa am ca pì 'bài thài ranenh wa mangai Pha-ri-si, bàu lem, manoh dù. Pì lam jàp trong Diac trong go, òiç broç ca mòiç ngai mùt ðaoç pì. Jò wì khoi tiaç pì, pì hnài wì haç broç wìa con da ùnh baxa yi hnao ca pì baiç yàng.

¹⁶ “Nan xa am ca pì, mangai ùh xau mat ma ajèn trong. Pì hnài: “Tàng mangai leç patô Hnem Cùh Waiç haç pachac, èh jah cađac bàu pachac, mahaç patô wang ta Hnem Cùh Waiç pachac, èh ùh jah cađac bàu pachac aih.’ ¹⁷ Ô mangai blùng wa ùh xau mat! Wang loç Hnem Cùh Waiç ma broç ca wang hadròih? Ma leç yi nhet? ¹⁸ Pì doi: “Tàng ma leç patô ca'bõng tadreo èh pachac, bàu pachac aih jah cađac, mahaç patô dahwèç caç ta ca'bõng tadreo, èh ùh jah cađac bàu pachac aih.’ ¹⁹ Ô mangai ùh xau mat tau! Dahwèç caç loç ca'bõng tadreo broç ca dahwèç loh hadròih, ma leç ma yi nhet? ²⁰ 'Màng aih mangai leç patô ca'bõng tadreo èh pachac, aih patô ca'bõng tadreo wa dahwèç ta ca'bõng tadreo. ²¹ Mangai leç patô Hnem Cùh Waiç haç pachac, aih patô Hnem Cùh Waiç wa Haç ma òi ta Hnem Cùh Waiç. ²² Mangai leç patô plình èh pachac, aih patô gèç bùa Boc Plình wa Haç ma ha'ngui ta gèç bùa aih.

²³ “Nan xa ca pì thài ranenh wa mangai Pha-ri-

si, bàu lem, manoh dù! Ma jah 'màng aih pì am ca Boc Plình mòiq phàn mòiq jàt cachiq 'bồchà, ngè xua thùm, wa cachiq càng, mahaq pì cađac biac ma càn òi ti Ranenh, aih biac ta-atoq, biac loq xa-ốch ca wì, wa biac wèq dèh manoh. Aih biac pì phai broq, mahaq xôq broq biac ma 'yoh tau. ²⁴ Ô mangai ùh xau mat ma ajèn trong! Pì lốc đac roi 'yoh, mahaq lôn lốcđa!

²⁵ “Nan xa am ca pì 'bài thài ranenh wa mangai Pha-ri-si, bàu lem, manoh dù! Pì haliang doi wa dọt enh gùng, mahaq enh trom, bình halùih biac atùng wa manoh ham. ²⁶ Ô mangai Pha-ri-si ùh xau mat! Adroi phai haliang enh trom doi chrống wa dọt, khoi èh enh gùng hadai jah hreo.

²⁷ “Nan xa am ca pì thài ranenh wa mangai Pha-ri-si, bàu lem, manoh dù! Pì tiah ca ralùng hanang broq taboc enh gùng òoiq haq lem, mahaq enh trom toq caxènh mangai cachit wa can xua om. ²⁸ Pì hadai 'màng aih, enh gùng broq tiah ca mangai ta-atoq, mahaq enh trom pì bình bàu lem manoh dù wa ùh òi tiah ranenh.

²⁹ “Nan xa am ca pì 'bài thài ranenh wa mangai Pha-ri-si, bàu lem, manoh dù! Pì broq am ralùng hanang mangai capoch thài Boc Plình, wa padì hmu teo ralùng hanang mangai ta-atoq. ³⁰ Pì doi: ‘Tàng nhèn rìh adrình ta 'nhòng 'bài boc yaq bèn, nhèn ùh thê wì jêh đac mangai capoch thài Boc Plình.’ ³¹ 'Màng aih, pì doi òoiq 'bài con xau mangai ma jêh đac mangai capoch thài Boc Plình. ³² 'Màng aih pì broq gêh biac dù boc yaq pì beq!

33 “Ô xinoi bîh plǒng tau! Broq 'màng leq pì ma jah claih ca 'bau ùnh? 34 Taiq 'màng aih Au thê 'bài mangai capoch thai Boc Plinh, mangai khôn rabiag, wa thài ranenh lam trùh ti pì. Pì jêh cađac wì, tiang đình wì ta long pagat, blai wì ta hnem tagop, wa pì chaq rùp wì enh phôq cô trùh phôq tau. 35 'Màng aih, đìq ca mahem ùh i ca tôiq khoi ta-ùc ta crǒng taneh, ta-ùc hlài ta pì, enh mahem Abên, mangai ta-atoq, trùh mahem Xa-cha-ri, con 'Ba-ra-chi, aih mangai pì jêh đac ta'ne Hnem Cùh Waiq wa ca'bǒng tadreo. 36 Joq 'nàng Au doi ca pì, đìq ca biac aih jah trùh ti xinoi cô.

37 “Ô Jê-ru-sa-lem! Jê-ru-sa-lem! Gè jêh cađac wì mangai capoch thai Boc Plinh, tèm hmu 'bài mangai wê bàu lam trùh ta gè! Khoi bacc yàng Au enh tagop 'bài con caiq gè, 'màng ca ia creo dèh ca con trùh, rôp enh 'neq ca panan haq, mahaq pì ùh waq. 38 Cô èh hnem pì ùh i cabô ối. 39 Ma jah 'màng aih, Au doi ca pì, pàng cô pì ùh hnoq Au hòm trùh jò pì jah doi: ‘Am xôq ramốt ca Haq ma canòm hiniq Chuaq lam trùh.’☆”

24

Chuaq Jêxu Anoi Biac Haq Wìh Hlài (Mốc 13:1-2; Luc 21:5-6)

¹ Chuaq Jêxu loh enh Hnem Cùh Waiq padon lam. 'Bài mangai hǒc tiaq patô ca Haq đìq ca biac broq lem da Hnem Cùh Waiq. ² Mahaq Chuaq Jêxu doi ca wì: “Pì i hnoq đìq ca biac 'mat ùh? Joq 'nàng Au doi ca pì, ùh jah i mòi q toq hmu leq

☆ 23:39 23:39 BCP 118:26.

õi raxon enh 'nhèq ca hmu 'noiç, ma ùh taclìh dǒng.”

³ Jò Chuaq Jêxu 'nang ha'ngui ta wang Ôliu, mangai hǒc tiaq trùh crài ti Haq, bòch Haq: “Xìn Chuaq doi ca nhèn, jò leq biac aih jah trùh? I ca teo patô leq òiç patô ca nhèn biac Ìh trùh hì ma atiq lùch?”

⁴ Chuaq Jêxu tèo wì: “Thê pì wèq dađeh, apaq òiç mangai leq padô 'nùt pì. ⁵ Ma jah 'màng aih i bacc ngai lam trùh patiah ca hiniç Au, doi: 'Au Crich.' 'Màng aih padô 'nùt bacc ngai. ⁶ Pì jah tàng anoi trùh biac tajêh poh gùng haten, wa bàu anoi trong tajêh poh gùng hangai. Khòh wèq dađeh, apaq yùq crè, ma jah 'màng aih biac aih phai trùh, mahaq 'nhòq trùh hì atiq lùch. ⁷ Jàn cô ta'blêq ca jàn tau, Diac tau ta'blêq ca Diac ti. Bacc gùng i biac pangot hrah wa taneh dalac. ⁸ Mahaq biac aih toq baxèm jò nan xa càn.

⁹ “Khoi èh, wì jah rùp càt pì, jêh đac pì, rìm Diac git ca pì taiç pì canòm ca hiniç Au. ¹⁰ Jò aih bacc ngai ùh enh tiaq hòm, blòq dèh oh daç wa git ca dabau. ¹¹ 'Bài mangai amòng capoch bàu loq adroi, jah padô 'nùt bacc ngai. ¹² Biac dù jah bacc tam, 'màng aih biac loq waç ca dabau pì i hòm. ¹³ Mahaq mangai leq cajap manoh trùh lùch, jah dèch haq. ¹⁴ Bàu Lem cô da Diac Boc Plình hì jah anoi hlài ca rìm jàn jàp ta crǒng taneh. Jò aih biac atiq lùch da crǒng taneh jah trùh.

¹⁵ “Jò pì jah hnoq biac 'mèq 'mac hech hoch òi ta nòi Hadròih,✧ 'màng ca Đa-ni-ên mangai capoch thai Boc Plình khoi doi adroi, cabô leq

✧ 24:15 24:15 Đan 9:27; 11:31; 12:11.

đốc phai hèm. ¹⁶ Cabô 'nang ỏi ta gùng Judia, cadàu tồc ta wang beq. ¹⁷ Mangai leq ỏi ta của hnem phai cadàu, apaq loh yỏc cùng hang ta hnem. ¹⁸ Mangai leq ỏi ta ðùng hadai, apaq hlài ta hnem yỏc eo. ¹⁹ Ta 'bài hì aih nan xa am ca gu cadrì ỏi jiang wa ban con nga. ²⁰ Pì phai waiq khàn ðoìq ùh nhet cadàu lam jò ralìm loq Hì Sabat. ²¹ Jò aih jah i bìac nan xa càn, enh jò baxèm broq plình crống taneh trùh manàiq, 'nhòq lah i 'màng aih. Atìq ca aih xỏq pi i hòm.

²² “Tàng 'bài hì aih ùh yi 'biaq, ùh i mòiq ngai leq jah ỏi rìh, mahaq taiq mangai khoi jah rài, 'bài hì aih khoi jah yi 'biaq. ²³ Jò aih, tàng i cabô doi ca pì: ‘Cô Crich ỏi ta cô,’ loq ỏi ta tau, ‘apaq lùì.’ ²⁴ Ma jah 'màng aih bàc Crich amòng wa mangai amòng capoch bàu Boc Plình broq trong halac càn. Tàng gleq jah, wì haq hadai lam padô 'nùt 'bài mangai khoi jah rài. ²⁵ Cô, Au doi adroi am ca pì:

²⁶ “Tàng wì doi ca pì: ‘Haq ỏi ta nòi ðùng hawit, apaq lam trùh.’ Cô, ‘Haq ỏi trom hnem.’ Apaq lùì. ²⁷ Ma jah 'màng aih, 'màng ca camlet xreo enh pah mat mahì loh trùh mat mahì mùt, bìac Con Mangai trùh hadai 'màng aih. ²⁸ Nòi leq i ngè cachìt, nòi aih bàc chìm cliang kèn tagop.

²⁹ “Atìq ca hì nan xa aih,
 “ ‘tajòì 'mòi mat mahì loh ca clam,
 mat khê pi 'ngah,
 'bài halống cìh enh plình
 wa cwìang itai ỏi ta plình dalàc.’✧

✧ 24:29 24:29 Êsai 13:10; 34:4.

³⁰ “Jò aih i teo Con Mangai mahno loh ỏi ta plình, òi ca con mangai ỏi crống taneh loh ca mango, crò hmoi, jò hnoq Con Mangai loh ỏi ta yùc xam can cwiang itai 'ngah 'ngai càn. ³¹ Haq thê 'bình plình hlôi dên atêh ken, 'ràng tagop mangai Haq khoi ràih loh enh pôn pah òi ca crống taneh.”

Bàu Aliah Biac Long Pốc

(Mốc 13:28-31; Luc 21:29-33)

³² Ngan bàu aliah ca long póc beq. Jò hamenh long loh hamǒng chet hla, aih pì loq ten trùh jò padrang. ³³ “ 'Màng aih jò pì hnoq biac cô, pì loq Con Mangai ten trùh. Haq 'nang yòng enh gùng ca 'mang. ³⁴ Joq 'nàng Au doi ca pì: Xinoi cô ùh cwa adroi jò biac tau 'nhòq trùh. ³⁵ Plình crống taneh cô èh jah nhhung, mahaq bàu Au capoch ùh jò leq nhhung.”

Hì wa Jò Chuaq Trùh

(Mốc 13:32-37; Luc 17:26-30,34-36)

³⁶ “Mahaq hì wa jò aih, ùh i ca mangai leq jah loq. 'Bình Plình ỏi ta plình ùh loq, Con hadai ùh loq, toq Baq loq hêq. ³⁷ Tìah da hì Noah 'màng leq, hì da Con Mangai hadai 'màng aih. ³⁸ Ma jah 'màng aih adroi ca diac càn wì caq, wì ôq, wì ta'nèp ǒng mai, trùh hì Noah mùt ta bong, ³⁹ wa wì ùh 'nì cacleq trùh jò diac càn trùh, hapùih đac òi ca mangai. Jò Con Mangai trùh, hadai 'màng aih. ⁴⁰ Jò aih i baiq ngai gu calô ỏi ta ðùng, jah yǒc mòiq ngai, èh ðòiq mòiq ngai ỏi hlài. ⁴¹ I gu cadrì baiq ngai 'nang xai 'mau, jah yǒc mòiq ngai, èh ðòiq mòiq ngai ỏi hlài.

42 “ 'Màng aih phai riu hmàng, pì ùh loq hì leq Chuaq da pì trùh. 43 Pì loq, tàng craq hnem jah loq adroi jò leq mangai atùng padon mùt ta hnem haq, haq riu ngan, ùh am pùng panàt mùt dèh ta hnem. 44 'Màng aih, pì hadai phai padon, ma jah 'màng aih Con Mangai trùh ta jò pì ùh ngò.

45 “Mangai leq broq hapǒng ma i manoh loq wèq dèh bàu wa rabiaq, craq haq thê haq wèq wì hapǒng ta hnem. Rìm hì haq padon am ca wì dahwèq caq troq jò. 46 Xôq ramòt ca hapǒng aih, jò craq haq trùh, hnoq haq broq 'màng aih. 47 Joq 'nàng au doi ca pì, craq haq am ca hapǒng aih cwìang wèq dìq ca bìac craq haq. 48 Mahaq tàng hapǒng dù hèm ta manoh: ‘Craq au dùnh men trùh,’ 49 'màng aih, haq blai wì ma broq hapǒng pajùm ca haq, hì ôq wa caq ti mangai dù. 50 Craq haq jah lam trùh ta hì haq ùh ngò wa jò haq ùh loq. 51 Craq haq baxa haq hlac hlac cađac haq enh gùng ỏi ti 'bài mangai bàu lem, manoh dù. Aih nòi i hmoi crò wa cadrit hanenh.”

25

Bàu Aliah Mòi q Jàt Ngai Cadri Adrùh

1 “Diac Plình tìah ca 10 ngai adrùh wê đen lam ãnh con ǒng. 2 Ỏi ta wì aih i padam ngai blùng, padam ngai khôn rabiaq. 3 Mangai blùng wê đen mahaq ùh wê tam dầu. 4 Mangai khôn rabiaq wê đen wa wê tam dầu hòm. 5 Jò con ǒng xòi trùh, dìq ca wì enh cùi, hì khoi wì haq cùi hnìa.

6 “Trùh 'ne 'màng, i bàu creo dêh, doi: ‘Tau, con ǒng khoi trùh, loh ãnh haq beq!’

7 “Điạ ca wì haq yòng, bùh hlài dèh đên.
8 Mangai blùng doi ca mangai khôn rabiaq, xìn am ca nhèn dầu pì điạ, đên nhèn khoi ten pat.

9 “Mahaq wì ma khôn rabiaq doi: ‘Yùq dầu ùh tòm điạ ca bèn, thê pì chaq wì ma tech dầu, èh pì rớt beq.’

10 “Jò wì lam rớt dầu, con ớng trùh. Ma leq ma gòm aih jah mùt ti haq nòi caq hiniang, khoi èh clenh 'mang.

11 “Khoi ca aih, 'bài mangai gu adrùh ma 'noiạ lam trùh doi: ‘Chuaq ôi, Chuaq ôi, xìn pèh 'mang ca nhèn!’

12 “Mahaq Haq doi: ‘Joa 'nàng Au doi ca pì, Au ùh 'nì ca pì.’

13 “ ‘Màng aih pì phai ngan, taiạ pì ùh 'nì hì leq wa jò leq Con Mangai trùh.”

Bàu Aliah ca Talàng 'Bac

(Luc 19:11–27)

14 “Điac Pình tìah ca mangai tau padon lam hangai. Haq creo điạ ca hapõng am ca wì wèq cùng hang haq. 15 Haq am ca mangai cô, padam talàng 'bac, mangai tau, baiạ, mangai tì, mòiạ. Haq am tiaạ can hlàt da tang ngai, khoi èh haq loh lam. 16 Tajòì 'mòi mangai ma khoi yõc padam talàng lam padro, jah padam talàng ma 'noiạ hòm. 17 Mangai ma yõc baiạ talàng hadai lam padro jah tam baiạ ma 'noiạ. 18 Mangai ma yõc mòiạ talàng, broq trom ta taneh catùh hlèp 'bac craạ haq.

19 “Khoi ca aih dùnh, craạ wì haq hlài, creo dèh ca wì hapõng aih trùh thê wì tình sô.

20 Mangai ma khoi yõc padam talàng, 'ràng tam

padam talàng 'noiç hòm. Haç doi: 'Waiç Chuaç, ìh khi am ca au padam talàng. Ngan cô, au khi jah tam padam talàng 'noiç hòm.'

²¹ "Craç haç doi: 'Ôi hapõng i manoh lem wa manoh wèç bàu, ìh khi i manoh wèç bàu ta biac 'yoh, au jah am ca ìh cwìang broç biac càn, ìh trùh ta cô bùi pajùm ti au.'

²² "Mangai ma khi yõc baiç talàng 'bac, hadai lam trùh doi: 'Waiç craç, ìh khi am ca au baiç talàng. Ngan cô, au khi jah tam baiç talàng 'bac ma 'noiç hòm.'

²³ "Craç haç doi: 'Ôi hapõng i manoh lem, ìh khi i manoh lem enh biac 'yoh, au jah am ca ìh cwìang broç biac càn, ìh trùh ta cô bùi pajùm ti au beç.'

²⁴ "Mangai ma khi yõc mòiç talàng 'bac hadai lam trùh doi: 'Waiç craç, au loç ca ìh mangai gang manoh, gat nòi ìh ùh rai adrech, ìh tóch nòi ìh ùh rai 'noh. ²⁵ Taiç 'màng aih au crè. Au broç trom catùh hlèp òi ta taneh talàng 'bac ìh. Cô 'bac ìh, au am hlài da ìh.'

²⁶ "Craç haç padreo bàu hlài doi ca haç: 'Ôi hapõng dù wa aroh, ìh loç au gat nòi au ùh rai, au tóch nòi au ùh rai 'noh. ²⁷ 'Màng cô ìh khòh am 'bac au ca mangai padro, trùh jò au hlài, au jah yõc hlài 'bac aih wa lòiç haç.

²⁸ " 'Màng aih pì phai yõc 'bac enh mangai cô, am ca mangai ma khi i 10 talàng. ²⁹ Taiç mangai leç khi i, jah am tam ca haç, mangai aih jah bàc, mahaç mangai leç ma ùh i, jah yõc hloi phàn haç ma i. ³⁰ Hapõng ma ùh loh cleç

cô, 'noh đac haq enh gùng nòi clam clôiq, ỏi ta aih i toq bìac hmoi rawah wa cadrit hanenh.' "

Bìac Hadrah ma Atiq

³¹ "Jò Con Mangai jah trùh ỏi ti 'ngah 'ngai lem Haq pajùm ti 'bài 'bình plình, èh Haq jah ha'ngui ti gèq bùa 'ngah 'ngai da Haq. ³² Dìq ca jàn rìm Diac jah tagop enh ngìa ca Haq, hi khoi Haq lah baiq phàn tiàh ca mangai ban trùu lah trùu wa bubi. ³³ Haq òiđiq trùu ti pah 'ma Haq, bubi òiđiq pah 'ngeo.

³⁴ "Jò aih bùa jah doi ca wì ỏi ti pah 'ma Haq: 'Ôi 'bài mangai Baq Au ma am xôq ramõt, trùh ta cô beq, nhàn yõc Diac Plình khoi padon òiđiq ca pì jò baxèm broq plình crõng taneh, ³⁵ taiq jò Au pangot, pì am Au pua caq. Jò Au croh ranõng, pì am Au diac ôq. Jò Au mangai tamoi ma pì ùh canao, èh pì pèh 'mang thê Au mùt. ³⁶ Jò Au rahòng cwàn, pì am ca Au eo cwàn. Jò Au ùh hrõc, pì lam hmàih Au. Jò Au ỏi tù, pì lam trùh ti Au.'

³⁷ "Jò aih wì mangai ta-atoq bòch Haq: 'Chuaq ôi, jò leq nhèn hnoq ìh pangot, ma am ca ìh pua caq, croh ranõng, am ca ìh ôq diac? ³⁸ Jò leq nhèn loq ca ìh mangai tamoi ùh canao ma pèh 'mang ca ìh, loq thiùq ca eo cwàn ma am ca ìh caxùnh? ³⁹ Jò leq nhèn hnoq ìh ùh hrõc, loq ỏi ta hnem tù ma lam hmàih ca ìh?'

⁴⁰ "Bùa jah doi ca wì: 'Joq 'nàng Au doi ca pì, jò pì broq am ca mòiq ngai òiđiq ca jaq ùh nèn ỏi ta oh daq Au, aih pì khoi broq ca Au.'

41 “Khoi èh Haq doi ca wì ma òi pah 'ngeo haq: ‘Òi mangai ma 'bìq waiq hanip, wia hangai ca Au beq, mùt ta nòi 'bau ùnh khoi padon ca can kiac Satan wa can kiac haq. 42 Ma jah 'màng aih, Au pangot, pì ùh am ca Au pua caq. Au croh ranông, pì ùh am ca Au diac ôq. 43 Au mangai tamoi ùh canao, pì ùh pèh 'mang ca Au. Au thiùq ca eo cwàn, pì ùh am ca au. Au ùh hróc wa òi ta hnem tù, pì ùh lam hmàih ca Au.’

44 “Khoi èh wì padreo hlài bàu doi: ‘Chuaq òi, jò leq nhèn hnoq Chuaq pangot wa croh ranông, mangai tamoi ùh canao, thiùq ca eo cwàn, ùh hróc òi ta hnem tù, nhèn ùh jùp òò ìh?’

45 “Haq doi ca wì: ‘Joq 'nàng Au doi ca pì, jò pì ùh broq bìac aih ca mòiq ngai ta 'bài mangai òiq ca jaq ùh nèn cô, aih pì hadai ùh broq ca Au.’

46 “ ‘Màng aih, 'bài mangai cô mùt nòi chiùq baxa hloi hloi, mahaq wì mangai ta-atoq mùt nòi rìh hloi hloi.”

26

Bìac Pađim Jêh Cađac Chuaq Jêxu (Mốc 14:1-2; Luc 22:1-2; Jon 11:45-53)

1 Jò Chuaq Jêxu khoi gêh hnài wì òiq ca bàu aih, Haq doi dèh ca 'bài mangai hóc tiaq: 2 “Pì loq, òi baiq hì hòm, trùh Hì Lè Lam Cwa, èh Con Mangai jah jao am ta tì wì ma tiang òinh Haq ta long pagat.”

3 Jò aih 'bài wì pajàu càn wa 'bài craq broq gàu phôq, wì tagop dabau ti xàn enh ngìa hnem pajàu ha'nhèq Caiphe. 4 Wì pađim ca dabau chaq trong òòiq jah rùp jêh đac Chuaq Jêxu. 5 Wì haq

doi: “Ùh khòh broq bìac aih trom hì lè, yùq wì jàn loq baxrông tajêh.”

Chuaq Jêxu Chiuq Xùt Dàu ta 'Bê-tha-ni
(Môc 14:3-9; Jon 12:1-8)

⁶ Jò Chuaq Jêxu òi plài 'Bê-tha-ni ta hnem Simôn, adroi nèh haq mangai bacùn. ⁷ I mòiq ngai gu cadrì wê cabi taboc broq xam ngôc, tah dàu xua thùm canaq 'bac lam trùh ti Haq, ùc ta gàu Haq jò Haq 'nang ha'ngui acaq.

⁸ Mangai hóc tiaq hnoq 'màng aih, loh nòih, doi: “Gleq ma ùc 'ngwan ca dàu 'màng cô? ⁹ Dàu cô tech jah bàc 'bac òi am ca mangai pa.”

¹⁰ Chuaq Jêxu loq bìac aih, hi doi ca wì: “Gleq pì ma jah broq xa ca haq? Haq khoi broq bìac lem am ca Au. ¹¹ Ma jah 'màng aih, pì i mangai pa òi ti pì hloi hloi, ✧ mahaq Au ùh i òi ti pì hloi hloi. ¹² Haq ùc dàu xua thùm òi ti chac Au, aih padon catùh Au. ¹³ Joq 'nàng Au doi ca pì: Dìq ca crông taneh, jang leq Bàu Lem cô jah anoi hlài, hadai jah anoi hlài bìac gu cadrì cô khoi broq òi am ca haq.”

Mangai Blòq Chuaq
(Môc 14:10-11; Luc 22:3-6)

¹⁴ I mòiq ngai ta wì 12 ngai, mangai hóc tiaq, hiniq haq Juda Ich-ca-ri-ôt, trùh ta 'bài pajàu càn, ¹⁵ bòch wì: “Tàng au jao am ca pì Chuaq Jêxu, èh pì baha au toq leq?” Wì am ca haq 30 capiac 'bac. ¹⁶ Pàng jò aih, haq chaq jò ta'nàih òi am ca Chuaq Jêxu.

✧ 26:11 26:11 RAH 15:11.

¹⁷ Hi baxèm Lè 'Benh Ùh Tah Blo, mangai hõc tiaq lam haten ca Chuaq Jêxu doi ca Haq: "Ìh enh waq nhèn padon ìh caq Lè Lam Cwa òi ta leq?"

¹⁸ Haq doi ca wì: "Pì mùt ta phôq, glàm mòiç ngai ta aih, doi ca haq: 'Mangai Thài doi: Jò Au ten trùh, Au wa mangai hõc tiaq Au enh caq Lè Lam Cwa òi ta hnem ìh.' " ¹⁹ Mangai hõc tiaq broq tiaq bàu Chuaq Jêxu, padon dahwèq caq lè.

²⁰ Trùh jò xèq, Chuaq Jêxu 'nang ha'ngui acaq ti 12 ngai, mangai hõc tiaq. ²¹ Jò wì caq, Chuaq Jêxu doi: "Joq 'nàng Au doi ca pì, i mòiç ngai òi ti pì jah blòq Au."

²² 'Bàì mangai hõc tiaq loh ca mango. Tang ngai bòch Haq: "Chuaq ôi, au ùh xài?"

²³ Haq doi: "Mangai leq chùq 'benh ta dõt adrình ca Au, aih mangai blòq Au. ²⁴ Con Mangai loh lam tìah ca bàu khoi achìh ta Sech Hadròih, mahaq nan xa am ca mangai ma blòq Au! Tàng ùh xa-ông ca haq yi lem."

²⁵ Juda, mangai blòq Chuaq, bòch: "Thài ôi, au ùh xài?"

Chuaq doi ca haq: "Joq 'nàng tìah ca bàu ìh ma khoi doi."

Lè Hiniang Hadròih

(Mõc 14:22-26; Luc 22:14-20; 1Cò 11:23-25)

²⁶ Jò 'nang caq, Chuaq Jêxu yõc 'benh manè apôi, èh goh am ca mangai hõc tiaq. Haq doi: "Yõc caq beq. Cô chac Au."

²⁷ Haq yõc doi chrõng, manè apôi, èh am ca mangai hõc tiaq. Haq doi: "Dìq ca pì ôq beq.

²⁸ Cô mahem Au, mahem da bìac wêh jao ma

neo, khoi ùc 'noh òiq jah baxǒng tôiq ca bàc ngai. ²⁹ Mahaq Au doi ca pì, pàng cô ta èh, Au ùh ôq diac pli nho cô hòm, trùh hi Au jah ôq pli nho ma neo pajùm ca pì òi ta Diac Baq Au.”

³⁰ Jò wì khoi calêu 'bǒi Hadròih, Chuaq Jêxu wa mangai hǒc tiaq Haq loh enh aih tǒc ta wang Ôliu.

*Chuaq Jêxu Doi Èh Pêtrô Hangah Haq
(Mǒc 14:27-31; Luc 22:31-34; Jon 13:36-38)*

³¹ Hi khoi, Chuaq Jêxu doi ca wì: “Mang cô pì catǒih cro ta manoh taiq Au, tiaq bàu Sech Hadròih khoi achìh:

“‘Au jah jêh Mangai Ban Triu,
èh triu cadàu tac mac.’[☆]

³² Mahaq atiq ca Au rìh hlài, Au lam ta gùng Ga-li-lê adroi ca pì.”

³³ Pêtrô doi: “‘Nhac ca òiq ca wì cadac Ìh, au ùh jò leq cadac Ìh.”

³⁴ Chuaq Jêxu doi ca haq: “Jòq 'nàng Au doi ca ìh, mang cô, ia 'nhòq rǒng, ìh jah doi piq yàng, ìh ùh loq ca Au.”

³⁵ Pêtrô doi ca Haq: “‘Nhac ca au cachit ti Ìh, au xôq ùh hangah Ìh.” Dìq ca mangai hǒc tiaq hadai doi 'màng aih.

*Bàu Chuaq Waiq Khàn ta Wùn
(Mǒc 14:32-42; Luc 22:39-46)*

³⁶ Khoi èh, Chuaq Jêxu wa mangai hǒc tiaq lam trùh ta wùn Ghêt-sê-ma-nê. Haq doi: “Ha'ngui gòm Au jang cô. Au lam waiq khàn jang tau.”

³⁷ Haq 'ràng Pêtrô wa baiq ngai con Xê-bê-đê lam

☆ **26:31** 26:31 Xach 13:7.

ti Haq. Haq loh ca mango chàu dìq ca jaq. ³⁸ Haq doi: “Mahua Yiang Au loh ca mango trùh cachit. Pì phai òi rìu ti Au ta cô.”

³⁹ Hi khi, Haq lam toq 'biaq hòh, cùp mat ta taneh. Haq waiq khàn, doi: “Baq òi, tàng gleg jah, xìn dõih doi chrõng cô hangai ca Con, mahaq ùh tiaq manoh Con, tiaq manoh Baq.”

⁴⁰ Khi ca aih, Haq lam trùh ti mangai hõc tiaq hnoq wì cùi. Haq doi ca Pêtrô: “Pì ùh jah rìu pajùm ca Au mòiq jò 'mòh? ⁴¹ Rìu beq, yòng waiq khàn, waq ca pì ùh mùt trong padô 'nùt. Manoh loq enh, mahaq chac xech ùh i cwiang 'blêq.”

⁴² Haq lam yàng baiq waiq khàn. Haq doi: “Baq òi, tàng doi cô ùh jah hangai ca Con, tàng Con phai ôq, xìn broq gêh tiaq manoh Ìh.”

⁴³ Mòiq yàng hòh Haq trùh ti wì, hnoq mangai hõc tiaq 'nang cùi, taiq mat wì pi jah blêch.

⁴⁴ Haq lam khi ca wì, waiq khàn yàng piq, capoch bàu 'màng ca yàng adroi.

⁴⁵ Khi èh, Haq lam trùh ti mangai hõc tiaq doi ca wì: “Jò cô pì xôq òi cùi padài 'mòh? Khi trùh jò Con Mangai 'bìq jao mùt ta tì wì mangai dù.

⁴⁶ Yòng beq, tau mangai blòq Au khi trùh.”

⁴⁷ Jò Chuaq Jêxu 'nang doi, Jũđa, aih mòiq ngai òi ta 12 ngai hõc tiaq trùh, 'nong wì bàc ngai wê chang wa long. Wì aih trùh enh pajàu càn wa 'bài craq broq gàu ma khi thê wì lam.

⁴⁸ Mangai ma blòq Chuaq Jêxu khi doi ca wì adroi: “Mangai leq au ma hip Haq, aih raq Haq, rùp Haq beq.” ⁴⁹ Tajòi 'mòi Jũđa lam haten ca

Chuaq Jêxu, haq doi: “Ôi Thài!” Khoi èh hìp Haq.

⁵⁰ Mahaq Chuaq Jêxu doi ca haq: “Ê bua, broq gêh biac da ìh beq.”

Khoi èh wì rùp Chuaq Jêxu. ⁵¹ Ta'ngac jò aih, i mòiq ngai òi ti Chuaq Jêxu yốc chang jêh hapống pajàu ha'nhèq, pốt catech ca don hapống aih.

⁵² Chuaq Jêxu doi ca haq: “ 'Mùt hlài chang ìh ta hnup beq, ma jah 'màng aih, cabô ma wèq chang, mangai aih cachit ca chang. ⁵³ Ìh ùh 'nì, Au jah xin Baq Au, tajòì 'mòi Haq jah am ca Au yì hnao ca 70.000 'bình plình 'mòh? ⁵⁴ Mahaq tàng broq 'màng aih, èh jah tiaq bàu Sech Hadròih 'màng leq, bàu ma khoi doi adroi biac cô?”

⁵⁵ Jò aih Chuaq Jêxu doi ca wì: “Pì wê chang wa long lam rùp Au cô tìah ca mangai atùng 'mòh? Rìm hì Au ha'ngui hnài òi ti Hnem Cùh Waiq. Jò aih gleq pì ùh rùp Au? ⁵⁶ Mahaq dìq ca biac cô, aih broq xit hlài wì pajàu Boc Plình khoi achìh adroi.” Khoi èh dìq ca mangai hóc tiaq cađac Chuaq, cadàu mot.

Chuaq Jêxu Enh Ngìa Caiphe

(Mốc 14:53-65; Luc 22:54-55,63-71; Jon 18:13-14,19-24)

⁵⁷ Bàì mangai ma rùp Chuaq Jêxu 'ràng Haq trùh ta pajàu ha'nhèq Caiphe. Wì thài ranenh wa wì craq broq gàu phôq tagop ti aih. ⁵⁸ Pêtrô lam tiaq Haq òi hangai, mùt ta xàn pajàu ha'nhèq, ha'ngui ti wì mangai lình, waq ca jah ngan ro dìq ca biac cô jah loh 'màng leq?

⁵⁹ Wì mangai pajàu càn, xam dìq ca craq hadrah enh 'nhèq chaq mangai òiđiq capoch

amòng kian Chuaq Jêxu, waq ca wì jah i trong jêh đăc Haq. ⁶⁰ I bəc ngai capoch amòng kian Haq, mahaq wì chaq xôq 'nhòq hnoq i biac cleq ma đăng ca jêh Haq.

Khoi èh i baiq ngai lam trùh doi: ⁶¹ “Mangai cô doi: ‘Au jah raliang đăc Hnem Cùh Waiq Boc Plình, khoi èh Au broq hlài trom piq hì.’ ”

⁶² Pajàu ha'nhèq yòng doi ca Haq: “Wa cô kian ìh 'màng aih, ìh ùh tèo hlài 'mòh?” ⁶³ Mahaq Chuaq Jêxu ùh doi cleq.

Pajàu ha'nhèq doi hòm ca Haq: “Au thê ìh pachac enh ngĩa ca Boc Plình ìh, doi ca nhèn loq, ìh joq Crich Con Boc Plình ùh?”

⁶⁴ Chuaq Jêxu tèo haq: “Jòq troi bàu ìh khoi doi, mahaq Au doi ca pì, hì atìq pì jah hnoq Con Mangai ha'ngui ỏi ti pah 'ma Boc Plình. Haq i cwìang itai dìq đống, Haq lam trùh ti yùc plình.”[☆]

⁶⁵ Pajàu ha'nhèq hich dèh eo rai doi: “Haq khoi capoch bàu 'mèq ðùng Boc Plình. Bèn ỏi nhet cleq ca chaq mangai kian Haq hòm? Pì khoi tàng Haq capoch 'mèq ðùng Boc Plình ùh? Pì hèm 'màng leq?”

⁶⁶ Dìq ca wì tèo: “Haq đăng ca cachìt.”

⁶⁷ Wì cachôh ta hadrò Haq, clàc Haq wa tep Haq. ⁶⁸ Wì doi: “Crich ôi, tàng ìh Mangai capoch thai Boc Plình, thê ìh doi ca nhèn loq cabô ma hwat ìh beq?”

[☆] **26:64** 26:64 BCP 110:1; Đan 7:13.

Pêtrô Hangah Chuaq Jêxu
(Môc 14:66-72; Luc 22:56-62; Jon 18:15-18,25-27)

⁶⁹ Jò Pêtrô xôq ha'ngui enh gùng õi ta xàn hnem, i mòiq ngai hapõng cadri trùh haten doi ca haq: "Ìh hadai õi ti Chuaq Jêxu Mangai Ga-li-lê."

⁷⁰ Mahaq Pêtrô hangah enh ngìa dìq ca wì doi: "Au ùh 'nì tàng bàu aih."

⁷¹ Jò haq loh ti 'mang ngo, i mòiq ngai hapõng gu cadri 'noi q doi ca wì õi ti aih: "Mangai cô hadai õi ti Chuaq Jêxu Mangai Na-xa-ret."

⁷² Mòiq yàng hòm Pêtrô hangah xam bàu pachac: "Au ùh loq ca Mangai aih."

⁷³ Atìq ca aih 'bài mangai ma yòng kenh aih doi ca Pêtrô: "Jòq 'nàng ìh õi ti wì. Ìh hadai capoch bàu Ga-li-lê."

⁷⁴ Mahaq Pêtrô hanip wa pachac rai doi: "Au ùh 'nì ca Mangai aih."

Tajòi 'mòi ia rống. ⁷⁵ Pêtrô hmàng hlài bàu Chuaq khoi doi ca haq: "Adroi ca ia rống, ìh doi piq yàng, ìh ùh loq ca Au." Pêtrô loh enh gùng, hmoi ra-ua dìq jaq.

27

¹ Trùh xroìh xroq dìq ca pajàu càn wa 'bài cra q broq gàu jàn tagop, capoch tùang ca dabau chaq trong jêh đac Chuaq Jêxu. ² Wì cật Haq, 'ràng Haq loh lam am ca tỉnh trùang Philat.

Juđa Ich-ca-ri-ôt Cachit
(BYH 1:18-19)

³ Jò aih Juda, haq ma khoi blòq Chuaq, hnoq wì padon jêh cachit Chuaq. Haq hèm ùh khwài, wìh hlài, wê 30 'bac, am hlài da wì pajàu càn wa 'bài craq broq gàu. ⁴ Haq doi: “Au khoi i tòi, au khoi blòq Mangai ta-atoq.”

Wì tèo haq: “Bìac aih ùh xài bìac nhèn, aih hi mac ca da ìh,”

⁵ Juda hwenh cađac 'bac aih ta Hnem Cùh Waiq. Haq loh lam hanöc dađeh.

⁶ Mahaq wì pajàu càn töch 'bac aih doi: “Ùh jah 'mùt 'bac cô ta kho Hnem Cùh Waiq, taiq 'bac cô khoi broq ta-ùc mahem.” ⁷ Hi khoi, wì pajàu càn tình ca dabau: “Yöc 'bac aih röt ðùng mangai thòq broq padri ðòi, catùh hanang mangai ùh canao enh hangai.” ⁸ ðùng aih, trùh manaiq xôq wì creo ðùng Mahem. ⁹ Bìac cô tìah ca bàu Jê-rê-mi, aih mangai capoch thai Boc Plinh, khoi doi adroi: “Wì yöc 30 'bac, 'bac ma khoi tech Haq, aih jaq con caiq Is-ra-ên khoi pachì ca Haq. ¹⁰ Wa am 'bac aih röt ðùng mangai ma broq padri, tìah ca bàu Chuaq khoi doi adroi.”

*Chuaq Jêxu Yòng Enh Ngìa Philat
(Möc 15:2-5; Luc 23:3-5; Jon 18:33-38)*

¹¹ Chuaq Jêxu yòng enh ngìa ca tình trùang ma bòch Haq: “Ìh ajoq Bùa mangai Yothaiq ùh?”

Chuaq Jêxu tèo: “Joaq troi bàu ìh ma doi.”

¹² Jò wì pajàu càn wa 'bài craq broq gàu kian Haq, Haq ùh tèo hlài. ¹³ Philat doi ca Haq: “Wì i bàc bìac kian ìh. Ìh ùh tàng 'mòh?” ¹⁴ Chuaq Jêxu ùh tèo hlài haq mòiq nà leq, 'màng aih broq ca tình trùang hamàih ta manoh ðiq jaq.

15 Trùh hì Lè Lam Cwa tiaq ranenh, tình trùang jah ca'naih mòiq ngai tù, mahaq tiaq manoh enh jàn. 16 Jò aih i mòiq ngai mangai tù, bàc mangai canao loq haq, hiniq haq 'Ba-ra-ba. 17 Jò wì tagop hi bàc, Philat bòch wì: “Pì enh au ca'naih mangai leq, 'Ba-ra-ba loq Chuaq Jêxu ma wì creó Crich?” 18 Ma jah 'màng aih Philat loq, ùh xài Chuaq Jêxu broq dù, mahaq taiq wì i manoh tarènh ca Haq ma wì rùp jao am Haq.

19 Jò Philat ha'ngui òi ta gèq hadrah, mai haq thê wì lam doi ca Haq: “Apaq broq cleq ca Mangai ta-atoq 'mat, ma jah 'màng aih xèq nèh au khi ai hnoq, au chiùq xalep òiq jaq taiq biác Haq.”

20 Mahaq wì pajàu càn wa wì craq broq gàu, thê wì mangai pajùm ca'naih 'Ba-ra-ba, jêh cađac Chuaq Jêxu.

21 Tình trùang bòch wì: “Wa baiq ngai cô pì enh au ca'naih ma leq?”

Wì tèo: “ 'Ba-ra-ba.”

22 Philat bòch: “Chuaq Jêxu cô ma wì creó Crich, èh au broq 'màng leq ca Haq?”

Òiq ca wì tèo haq: “Tiang ðinh Haq ta long pagat!”

23 Tình trùang bòch: “Mahaq Mangai cô khi broq dù biác leq?”

Wì cachech yi ðêh hòm: “Tiang ðinh Haq ta long pagat beq!”

24 Philat hnoq ðađeh pi 'blêq ca bàu wì. Wì ta-ùang yi hnao hòm. Haq yóc ðiac 'nheo tì enh ngìa ca wì, rai doi: “Au ùh pòq tôiq ca mahem Mangai cô, biác 'mat lènh ca ða pì.”

²⁵ Dìq dǒng ca wì padreo hlài bàu doi: “Xìn mahem Haq ta-ùc ca nhèn wa con caiq nhèn.”

²⁶ Philat ca'naih ca wì 'Ba-ra-ba, am wì blai Chuaq Jêxu, hi khoi jao ca wì ðoìq wì tiang ðình Haq ta long pagat.

²⁷ Khoi èh wì mangai lình da tình truang 'ràng Chuaq Jêxu mùt ta hnem da mangai lình, hi tagop ðìq ca lình òi dudan ca Haq. ²⁸ Wì lêh eo Haq, caxùnh òn ca Haq eo yôh gòh. ²⁹ Wì ðenh cadoh xam hila, pacôi ta gàu Haq, wa ðoìq cadia ta tì pah 'ma Haq. Hi khoi, hacùn cràng enh ngĩa ca Haq, halê Haq doi: “Waiq Bùa jàn Yothaiq!” ³⁰ Wì cachôh ca Haq, yôc cadia blai gàu Haq. ³¹ Jò wì khoi hêq ca halê Haq, wì lêh eo gòh Haq ma 'nang caxùnh, caxùnh hlài da Haq eo. Khoi èh, 'nong Haq lam ðoìq tiang ðình Haq ta long pagat.

Chuaq Jêxu ta Long Pagat

(Môc 15:21–32; Luc 23:26–43; Jon 19:17–27)

³² Jò wì loh lam, wì hnoq mòiq ngai enh gùng Siren, hiniq haq Simôn. Wì thê haq xùì long pagat Chuaq Jêxu. ³³ Trùh nòi wì creo Gô-gô-tha, aih i hiniq Go Cadôh. ³⁴ Wì alôn alac wa clong mat xang am ca Haq ôq, mahaq jò Haq liah ngan, Haq ùh waq ôq. ³⁵ Jò wì khoi tiang ðình Haq ta long pagat, wì pàih panàih troq ca ma leq jah eo cwàn Haq. ³⁶ Hi khoi, wì ha'ngui ti aih gòm wèq Haq. ³⁷ Wì achìh chù ta long ban ðoìq enh 'nhèq ca gàu Haq ma i bàu kian Haq, doi: **Cô Chuaq Jêxu Bùa Mangai Yothaiq.**

³⁸ Hadai jò aih, wì tiang ðình baiq ngai, mangai atùng, mòiq pah 'ma, mòiq pah 'ngeo ca Haq.

³⁹ 'Bài wì ma lam cwa trong aih, do halê Haq, rai

ngu nguì gàu, doi: ⁴⁰ “Ìh ma raliang đac Hnem Cùh Waiq, èh broq hlài trom piq hì, dèch dađeh beq! Tàng Ìh Con Calô Boc Plình, loh enh long pagat beq!”

⁴¹ 'Bài pajàu càn, 'bài thài ranenh, wa 'bài craq broq gàu, wì halê đac Haq doi: ⁴² “Haq khoi dèch wì ma 'noiq, mahaq Haq ùh jah dèch dađeh. Tàng joq Haq broq Bùa Is-ra-ên, Haq phai loh khoi enh long pagat, èh nhèn ma lùì Haq. ⁴³ Haq khoi canòm ca Boc Plình, òiđiq Boc Plình dõih dèch Haq tàng Boc Plình bùi manoh ca Haq, ma jah 'màng aih Haq khoi doi: ‘Au cô Con Calô Boc Plình.’ ” ⁴⁴ Wa baiq ngai atùng ma 'bìq tiang đình ti Haq hanoh haníp Haq, lech ca Haq 'màng aih.

⁴⁵ Enh 'ne hì trùh piq jò chùu, òiđiq ca gùng loh ca clam clòiq đõng òiđiq. ⁴⁶ Trùh piq jò, Chuaq Jêxu creo bàu dêh: “Êli, Êli, La-ma-sa-bach-tha-ni,” aih: “Boc Plình Au ôi, Boc Plình Au ôi, gleq Ìh ma cađac Au?”✠

⁴⁷ I toq bìađ ngai yòng kenh aih, tàng bàu cô, wì haq doi: “Haq creo ca Êli.”

⁴⁸ I mòiđiq ngai ta 'bài wì cadàu lam yõc mòiđiq cato capaih, chùđiq ta diac jòđiq, xrep ta long cadia am ca Haq ôđiq. ⁴⁹ Mahaq mangai 'noiđiq doi: “Đòđiq 'màng 'mat rađ, ngan thù Êli loh dèch Haq ùh?”

⁵⁰ Chuaq Jêxu creo bàu dêh mòiđiq yàng hòh, hi khoi Haq thê dèh mahua yiang Haq loh, hi pat hihèm.

⁵¹ 'Màng cô, bai prình ta Hnem Cùh Waiq, dahich enh 'nhèđ trùh ta ha'neđ, brođ baiđ phàn. Taneđ dalàđ, hmu càn padah. ⁵² Ralùng hanang

✠ 27:46 27:46 BCP 22:1.

tapèh, wa bàc hanang da mangai hadròih khoi cachit jah rih hlài, ⁵³ loh enh ralùng atiq ca Chuaq Jêxu rih hlài, èh mùt ta phôq hadròih, mahno loh ca bàc ngai hnoq.

⁵⁴ Jò aih wì mangai òi q truang linh wa wì ma òi gòm wèq Chuaq Jêxu, hnoq taneh dalac wa bàc biac ma 'noi q hò m. Wì yùq crè di q ca jaq, doi: "Mangai cô joq 'nàng Con Calô Boc Plinh."

⁵⁵ Hada i bàc gu cadri yòng ngan Haq enh hangai, aih mangai khoi tiaq Chuaq Jêxu enh Gali-lê òi q patih biac Haq. ⁵⁶ Òi ta wì aih i Mari Ma-đò-len, Mari miq Jacò wa Jòsep, wa miq baiq toq con Xê-bê-đê.

Biac Catùh Chuaq Jêxu

(Môc 15:42-47; Luc 23:50-56; Jon 19:38-42)

⁵⁷ Trùh xèq, i mòiq ngai padròng can òi phôq A-ri-ma-thê, hiniq haq Jòsep, mangai ma hadai tiaq Chuaq Jêxu. ⁵⁸ Haq lam trùh nòi Philat, xìn hanang Chuaq Jêxu. Philat thê wì mangai linh am ca haq. ⁵⁹ Jòsep yòc hanang hi xom xam bai habùac lem hreo, ⁶⁰ 'ràng òi q ta ralùng neo ma cla haq khoi pùng ta còp hmu am ca dadèh. Haq cadre mòiq toq hmu càn broq calap gup ralùng aih, hi khoi haq lam. ⁶¹ I Mari Ma-đò-len wa Mari 'noi q òi ta aih ha'ngui ta jang enh ngia ca ralùng.

⁶² Trùh hi da èh, aih atiq ca Hì Padon Caq Lè, wì pajàu càn wa mangai Pha-ri-si lam trùh ti Philat doi: ⁶³ "Tinh Truang ôi, nhèn hmàng hlài bàu Mangai loq amòng cô, jò Haq òi rih, i doi: 'Atiq ca piq hi, Au jah rih hlài.'" ⁶⁴ Xìn ìh thê wì wèq ralùng di q jaq hagao haghình trùh hi piq, yùq mangai hóc tiaq Haq lam trùh yòc atùng

hanang Haq, hi khoi wì doi ca mangai 'noiç: Haq khoi rih hlài. 'Màng cô biac aih padô 'nùt wì yi hnao ca adroi hòm.”

⁶⁵ Philat doi ca wì: “Pì i lình wèq, lam wèq ma cajap beq tiaq manoh pì.” ⁶⁶ 'Màng aih wì lam broq teo hadrô jang 'mang ralùng, èh thê mangai lình wèq cajap dìq jaq.

28

Bìac Chuaq Jêxu Rih Hlài

(Môc 16:1-10; Luc 24:1-12; Jon 20:1-10)

¹ Atìq ca hì Sabat, hì gàu tùang lè, xrõih xroq bu 'ngah, i Mari Ma-đò-len wa Mari ma 'noiç lam hmàih ca ralùng.

² Ta'ngàc jang cô i taneh dalàc dèh dìq jaq, taiq i mòiq 'bình plình Chuaq loh enh plình lam ca cadre hmu, hi khoi ha'ngui enh 'nhèq ca hmu aih. ³ Hadrò haq 'ngah tiah ca camlet, eo taboc tiah ca capaih. ⁴ Hnoq 'màng aih, 'bài mangai lình ma wèq ralùng yùq crè loh ca tarit, bu dăng mangai cachit.

⁵ Mahaq 'bình plình aih doi ca wa gu cadrì aih: “Chôp apaq yùq. Au loq chôp chaq Chuaq Jêxu, Mangai khoi chiùq tiang đình ta long pagat. ⁶ Haq ùh i òi ta cô. Haq khoi rih hlài tiah ca bàu Haq khoi doi ca pì. Lam ngan nòi wì ma òiç hanang Haq beq, ⁷ èh lam ma renh doi ca mangai hõc tiaq Haq loq, Haq khoi rih hlài enh can cachit. Haq lam adroi ca wì cwa gùng Ga-li-lê. Wì jah hnoq Haq ta aih. Cô bàu au khoi doi am ca chôp loq.”

⁸ Wa baiq ngai gu cadrì aih cadàu loh khi enh nòi ralùng, rai manè, rai yùq crè, cadàu lam doi ca 'bài mangai hóc tiaq loq. ⁹ Chuaq Jêxu glàm wa gu cadrì aih, Haq doi: “Bùi ta manoh beq!” Wa trùh ti Haq, oc jènh Haq rai cùh waiq Haq. ¹⁰ Khi èh, Chuaq Jêxu doi ca wa: “Apaq yùq, lam doi ca 'bài oh đaq: Au lam gùng Ga-li-lê, jah hnoq Au ta aih.”

¹¹ Jò wa 'nang lam ti trong, i toq 'biaq ngai linh ma wèq ralùng, mùt ta phôq doi ca wì pajàu càn loq òiq ca biac aih. ¹² Jò wì craq broq gàu tình biac aih gèh, wì am ca linh aih 'bac khi èh doi ca wì: ¹³ “'Ne mang jò nhèn cùi, mangai hóc tiaq Haq lam trùh yóc atùng hanang Haq. ¹⁴ Tàng tình truang tàng biac cô, èh bèn chaq trong anoi hlài ca haq, waq ca pì ùh hiaq troq cleq.” ¹⁵ 'Bài linh aih yóc 'bac wa broq tiaq bàu tanap aih. Bàu aih jah ràu yôt òi ta jàn Yotheidh enh jò aih trùh manaiq.

Chuaq Mahno Loh ta Gùng Ga-li-lê

(Mốc 16:14-18; Luc 24:36-49; Jon 20:19-23; BYH 1:6-8)

¹⁶ 12 ngai hóc tiaq lam gùng Ga-li-lê, tóc ta wang ma Chuaq khi doi ca wì. ¹⁷ Jò hnoq Haq, wì cùh waiq Haq, mahaq i toq 'biaq ngai òi ra'ngòt ta manoh. ¹⁸ Chuaq Jêxu trùh haten doi ca 'bài mangai hóc tiaq bàu cô: “Òiq ca cwiang itai òi ta plình wa ta crống taneh khi am ca Au. ¹⁹ 'Màng aih, pì phai lam anoi hnài rìm jàn broq wì haq wìa mangai hóc tiaq Au, canòm ca hiniq Baq, hiniq Con, hiniq Yiang Hadròih, broq 'baptem ca wì, ²⁰ wa anoi hnài wì wèq òiq rìm

bìac Au khoi hnài pì. Au ỏi hloi ti pì enh cô trùh
hì atìq lùch.”

cv

Sech Hadròih
Sech Hadròih

copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

e5023a07-9831-5256-a315-1cae0f33043d